



Ragam Panyambahan
Adat dan Budaya Minangkabau

Musra Dahrizal Katik Jo Mangkuto



*Ragam Penyambahan
Adat dan Budaya Minangkabau*



*Ragam Penyambahan
Adat dan Budaya Minangkabau*

Musra Dahrizal Katik Jo Mangkuto

Minangkabau Press

**Ragam Panyambahan
Adat dan Budaya Minangkabau**

Penulis:

Musra Dahrizal Katik Jo Mangkuto

Penyunting:

**Srimutia Elpalina
Suharmono**

Desain Sampul:

Bahren

Tata Letak:

Faricha

Cetakan I 2025

x + 373 hlm, 14x20,5 cm

ISBN:978-623-7749-46-2

Diterbitkan pertama kali oleh:

Minangkabau Press

Perumahan Unand Blok D I – 07 – 04 Gadut

Padang, Sumatera Barat

Kontak Person Bahren: 0852 6390 3352 e-mail: minangkabau.press99@gmail.com

Hak Cipta dilindungi Undang-Undang.

Dilarang mengutip atau memperbanyak sebahagian atau seluruh isi buku

tanpa izin tertulis penerbit

Isi diluar tanggung jawab percetakan

Ketentuan Pidana Pasal 72 UU No. 19 Tahun 2002

1. Barang siapa dengan sengaja dan tanpa hak melakukan perbuatan sebagaimana dimaksud dalam pasal 2 ayat (1) atau pasal 49 ayat (1) dan ayat (2) dipidana dengan pidana penjara paling singkat 1 (satu) bulan dan/atau denda paling sedikit Rp 1.000.000,- (satu juta rupiah) atau pidana penjara paling lama 7 (tujuh) tahun dan/atau denda paling banyak Rp 5.000.000.000,- (lima milyar rupiah).
2. Barang siapa dengan sengaja menyiarkan, memamerkan, mengedarkan atau menjual kepada umum suatu ciptaan atau barang hasil pelanggaran Hak Cipta atau Hak terkait sebagaimana dimaksud pada ayat (1), dipidana dengan pidana penjara selama 5 (lima) tahun dan/atau denda paling banyak Rp 500.000.000,- (lima ratus juta rupiah).

SAKAPUA SIRIAH DARI PANULIH

Kaganti siriah nan sakapua, bagaikan rokok nan sabatang, lah tacinto bajawek tangan, jo diri dunsanak nan basamo, iyo lah datuak jo pamhulu, sarato urang ampek jinih, langkok jo alim jo ulama, nan niaik di dalam hati ambo, nak manatiang carano basa, babantuak sabuah buku, barisi ragam panyambahan, nan lazim tapakai dalam alek, nan mamakai lareh koto piliang, baiak alek batagak gadang, malewakan gala pangulu, kok untuang pambari Allah, ragam panyambahan nan ambo susun, dapek kasuri ka tuladan, ka cupak taladan batuang, dek nan ketek mudo matah, padoman dek angku jo pangulu, sarato dunsanak nan basamo, sabab ba alah dek baitu, jikok nyo alua panyambahan, nan tapakai di maso kini, kalau dalam pandangan ambo, lah jauh bana barubah nyo, kan samo dapek kito caliak, manti jo pandito lah samo gadang, baitu juo nan lain nyo, antaro sutan jo pangulu, maso barundiang dalam alek, manti lah ba datuak ka pangulu, kato *angku* indak tapakai lai, padohal dalam barih adaik, jikok nan diri pangulu itu, nyato basuo bak pitua, ba tinggi kan baliu sarantiang, nyato nyato di dalam adaik, ba dahulu kan baliu salangkah, pado wakatu iko kini, jaleh nyato dalam barundiang, baliu lah samo gadang sajo.

Nan niaik di hati ambo, indak cengeh karano laku, indak somboang karano pandai, hanyo mencari ridha Allah, untuang tasarah ka bagian, walau ka angok angok ikan, bogo ka nyawo nyawo patuang, patah kapak batungkek paruah, namun nan niaik dalam hati, mungkasuik tatap basampai kan, di cubo manulih bagulambek, molah di ansua bak bajalan, kok indak bilo ka sampai, mungkin kawan balari kancang, ambo bajalan basiensuik, kok lai dapek jalan maminteh, indak manampuah rusuak jalan, kok untuang basuo nan di angan.

Hanyo harapan dari ambo, kapado dunsanak nan basamo, iyo lah datuak jo pangulu, sarato urang ampek jinih, imam katik samo di dalam, aluran badan diri ambo, tantangan tulih manulih, aka singkek pandapek kurang, ilmu di tuhan tasimpan nyo, kok basuo kalimaik nan tak jaleh, titiak jo koma nan salah latak, usah di cacek langkah sumbang, sabab baitu kato ambo, dalam diri ambo lah yakin, kalau lah dunsanak nan basamo, sarato angku jo pangulu, tantu bakandak tabu nan manih, kok tabu tibarau tasuo, itu nan ado di ambo, pado manjadi upek puji, jan jatuah di himpok janjang, nak jan mambarek ka akiraik, ambo nak mintak di ma'afkan.

*di sangko bulek daun nipah
kiro nyo picak ba pasagi
di liek lipek tak barubah
di kambing tabuak tiok ragi*

pado wakatu iko kini, lalok sakalok ba rasian, pikia nan palito hati, nanang nan baribu aka, aniang itu hulu bicaro, dalam tanang bana mandatang, paham tibo aka baranti, bana lah timbua sandiri nyo, asah kamudi di samo kan, jikok padoman di batua kan, samo mancinto ka nan baiak, kok indak tajajak tanah tapi, indak kudaraik dari kito, hanyo kuaso dari tuhan, sasek suruik talangkah kumbali, pulang nyo ka balabeh juo, baitu adaik nan bapakai, kok sasek di ujuang jalan, ba baliak ka pangka jalan, kito pilin aka nan tigo, suatu nan jahia janyo aka, kaduo mustahia janyo aka, katigo nan wajib janyo aka, ambo cari kato mufakaik, baiyo iyo jo adi, ba tido tido jo kako, barundiang niniak jo mamak, sarato nan tuo cadiaik pandai, langkok jo imam jo tuangku, nan mudo arih budiman, bundo kanduang samo di dalam, dalam lingkungan barih juo, mari kito samo bahimpun, kito satu kan pamikiran, mambangkik batang tarandam, buliah tatabuih gadai lamo, untuak palawan dunia urang, nak ta tantang matohari, asah sapakaik

kito bakarajo, kudaraik sahabih tulang, pikiran sa habih aka, asah lai duduak jo mupakaik, nak dapek bulek nan sagoloang, nak buliah picak nan salayang, saukua kito nan basamo, nan tacicia kito piliahi, nan taserak kito kampuangan.

Sabuah lai nan takana, kok hanyo buku nan ambo susun, banamo ragam panyambahan, nan acok tapakai di nagari, nan jadi padoman diri ambo, di dalam manulih buku, kan ado duo kalarasan, suatu lareh budi caniago, kaduo lareh koto piliang, kok di dalam budi caniago, pitua nyo nan kito pakai, iyo lah duduak sa amparan, indak mamakai kato titah, indak ado kato manyambah, nan ado hanyo bapakai, gadang muliakan di nan rami, kalau barundiang dalam alek, sabalun gala di imbaukan, mamakai kato *angku*, sabalun di sabuik gala, jikok di daerah agam ateh, ba *inyiak* maso barundiang, indak buliah ba *datuak* sajo, kalau katik pangka gala nyo, di tambah jo *angku katik*, baitu juo ka nan lain.

Buku nan ambo susun ko, indak buku nan paliang santiang, nan ado di maso kini, mungkin banyak buku nan lain, nan alah ado sabalun ko, nan mungkasuik ambo, ambo cubo mampabedokan :

Pertanyaan nyo

- Kapado siapa kito manitah
- Siapa sajo nan buliah manitah
- Bukan kah titah itu datang nyo dari rajo
- Buliah kah kito mamakai kato sambah
- Bukankah kito sabagai urang ba agami islam kito kan hanyo manyambah kapado tuhan
- Kapado siapa kito manyambah
- Siapa urang nan manyambah pado hakikaik
- Kapado siapa kito barundiang

Dalam adaik sabatang panjang
Pusako kito luak nan tigo
Sampai ka koto jo nagari
Tak guno tulisan di papanjang
Salam jo simpuah dari ambo
Jo wassalam pena baranti.

DAFTAR ISI

Sakapua Siriah dari Panulih.....	v
Daftar Isi	ix
1. Panyambahan Karajo Ka Dimulai	1
2. Panyambahan Mintak Izin Janang Kamanatiang	33
3. Panyambahan ka Makan	35
4. Panyambahan Manjapuik Marapulai	72
5. Panyambahan Ma Anta Marapulai	109
6. Panyambahan Ma Anta Marapulai (Batang Sajo)	154
7. Panyambahan Manyiriah	161
8. Panyambahan Batanyo Susudah Sirih Di Cabiak	205
9. Panyambahan Manyiriah (Nan Panjang)	208
10. Panyambahan Manyusun Duduak.....	221
11. Panyambahan Maminang	253
12. Panyambahan Minum Kawa	286
13. Panyambahan Urak Selo Batang Sajo.....	290
14. Panyambahan Urak Selo	293
15. Bareh Kuniang	340
16. Panyambahan Maanta Tando.....	346
17. Bareh Kuniang Anak Daro.....	349
18. Panyambahan Manjanguak Di Babarapo Nagari	352
19. Pangka Balabeh.....	355

Panyambahan Karajo Ka Dimulai

Dari si pangka ka si alek 1

Mano angku
Sayo angku
Ka angku rundiang ba tiboan
Laluan lah angku

Adaik mancupak lah di papek
Nan sapadi bapantang luak
Baitu adaik ranah minang
Jo salam tangan sayo angkek
Rila jo maaf sayo mintak
Jo bana angku sayo jalang

Sungguah pun kapado angku
Rundiang sayo ba tiboan
Dalam niaik manganduang naza
Batin tasimpan nak taruah
Taga dek luruih batujuan
Rundiang nan tibo bakeh angku ...

Jari tasusun kanan rapek
Kapado angku jo pangulu
Sarato urang ampek jinih
Salam kapado nan basamo

Ka hadapan sagalo alek kami
Nan duo barih kaduduak kan
Nan tigo langgam pa seloan
Sabujua rumah nan panjang
Salega rumah nan gadang
Salam di sinan di tiboan

Ado pun salam nan ka sayo tiboan
Mahadok kapado angku
Ma hukum di ateh kato

Manyiang tampek nan tumbuah
Manimbang bakeh nan ado

Tumbuah sarupo iko kini
Di caliak kapado langgam adaik
Panek lah raso baparantian
Palak lah raso ba paranginan

Lah tarang cahayo adaik
Lah tampak bangun pusako
Dek hari basarang tinggi
Nak jan lamo batang tasanda
Jan lamo baban talatak

Lah buliah ko karajo kito ansua
Nak babari dek angku pitua nyo
Pulang ma'alum pado angku

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Kok hanyo rundiang nan mandatang
Nan talimpah di muko rapek
Nan tatumpah ka diri sayo
Rundiang kok ado ba nan sumbang
Rila jo maaf di patapek
Ka angku ... rundiang kumbali nyo

Nan jadi bana di angku tadi
Mahado kapado sayo
Di hadapan angku jo pangulu
Sarato ka urang ampek jinih

Di danga lah baiak bunyi
Di pandang lah rancak rupo

Nyato di barih paek makan
Kalau di tareh di salisiah
Alah nyato titian budi
Tarang di batin ka arifan

Kurang tak ado ka panukuak
Senteang tak ado ka pambilai
Tapi samantang pun baitu
Bana nyo di bao lalu

Di ateh duduak nan sa amparan
Di tagak nan sa pematang
Libago duduak tengah rapek
Lamak siriah lega carano
Lamak kato di lega bunyi

Samantaro sayo balega
Mancari kato nan sa ukua
Rundiang jo angku di latak an
Kato di simpan dalam barih
Pulang ma'alum pado angku

Jawek si pangka ka si alek 1

Lah sampai di angku
Sakiro alah angku
Ka angku lai
Laluan lah angku

Nampak basuriah bak sipasin
Jajak bak bakiak alah nyato
Dalah aia guriah mangasan
Nak suci lahia jo batin
Barilah maaf badan sayo
Ka angku ... rundiang batiboan

Parundiangan angku...nan katangah
Di bunyi nan sayo danga
Di rupo nan sayo pandang
Di ateh duduak nan sa amparan

Tagak nan sa pematang

Sa pihak ka diri angku
Nak ma ambiak duduak baiyo
Tagak bakato jo bamolah
Sipaik mananti malah sayo
Bana baitu kato angku

..... Iyo bana
Sapanjang buah kabanaran angku ...
Nan talimpah di muko rapek
Rundiang sabuah sayo pacik
Kato sapatah sayo ganggam
Silang tak ado ka pa ampang
Patuik tak ado ka pa ungkai
Insya Allah, sayo nanti

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Kato daulu basitina
Kamudian rundiang basicapek
Dek nan sunaik wajib kok tingga
Ba sicapek sayo jo angku

Kalaluan nyo ba sicapek
Di bunyi nan sayo danga
Di rupo nan sayo pandang
Di hadapan baliau nan basamo

Kandak buliah pintak balaku
Insya Allah sayo laluan

Jawek si pangka ka si alek 1

Insya Alah sayo nanti

*Ket : baiyo dulu si pangka 1 jo pangka 2 sasudah baiyo,
rundiang di kumbalian*

Pakolahan untuak mencari kato mufakat

Dari si Alek 1 ka si alek 2

Mano angku

Sayo angku

Ka angku rundiang ba taboan

Laluan lah angku

Kamudiak balai kamuniang

Kabaruah ka subang anak

Balimo suku di sinan

Rundiang kok ado nan ba sandiang

Rila jo maaf sayo mintak

Ka angku rundiang ba tiboan

Arati nyo rundiang nan sayo tiboan

Mahadok kapado angku

Lah datang parundiangan dari si pangka

Kapado kito sakalian alek

Buah rundiang baliau nantun

Nan tatabua di tangah rapek

Bisiak lah samo kadangaran

Ma imbau nan alah kalampauan

Di hadapan kito nan basamo

Buah rundiang baliau nantun

Nan gayuang mangandaki sambuik

Nan kato mangandaki jawab

Ba'a nan kini nangko

Di ma ka tumbuhan ibaraik bijo

Di ma katabik nan bak padi

Iko lah bana sayo tiboan

Mahadok kapado angku

Pulang ma alum pado angku

Jawek : si alek 2 ka si alek 1

Lah sampai di angku

Sakiro alah angku

Ka angku lai

Laluan lah angku

Assalamu'alaikum dari muluik
Warahmatullah panyudahi
Tando nyo kito sa andiko
Rundiang kok salah dek manyabuik
Rila jo maaf pamanuahi
Ka angku ... rundiang kumbali nyo

Arati nyo nan jadi bana di angku ...
Mahadok kapado sayo
Di hadapan baliu nan basamo
Lah tibo parundiangan dari si pangka

Kapado kito sakalian alek
Buah rundiang baliu nantun
Bisiak lah samo kadangaran
Jikok imbau alah talampau

Sapihak ka diri angku

Nak sadagam rantak jo gandang
Lahia jo batin sa ukuran
Pulang ma alum pado sayo
Bana baitu kato angku

..... Iyo bana

Kabanaran angku nan katangah

Lah dalam barih jo balabeh
Di kandung adat jo pusako
Bana nyo di bao lalu

Lalu nyo di kaji nan sado itu
Sapihak ka diri sayo
Bukik nan tinggi nak di daki
Lurah dalam nak baturuni
Mancari bijo gak sabuah
Bijo di tanam musim kini

Jikok babuah jo babungo
Bungo nak samo di pasuntieng
Buah nak samo kito makan
Lai koh adat nan baitu
Nyato pusako nan bak kian
Pulang ma alum pado angku

Jawek : si alek 1 ka si alek 2

Lah sampai di angku
Sakiro alah angku
Ka angku lai
Laluan lah angku

Kain palakaik unduang unduang
Salendang sutan ka kualo
Basah di timpo hujan pagi
Jo salam tangan sayo anjuang
Gawa jo khilaf kok basuo
Ka angku rundiang kumbali

Nan jadi bana di angku tadi
Mahadok kapado sayo
Di ateh duduak nan sa amparan
Malengoang angku ka ilia
Tampak lah tanjuang mangajuju
Mancaliak angku ka mudiak
Taluak baliku batu ampa

Tambang urai sungai nyo ameh
Jalan nan jauh ka di turuik
Kelok jo liku ka di tampuah
Mancari gandang ka paningkah
Isi nyo talempong ka panalun
Jalan nan jauh angku turuik

Mananti sayo dalam barih
Lai koh adat nan baitu
Nyato pusako nan bak kian
Pulang ma lum pado sayo
Bana baitu rundiang angku

..... Iyo bana

Di kabanaran angku... nan ka tengah
Kurang tak ado kapanukuak
Senteang tak ado ka pambilai
Bana nyo di bao lalu

Lalu nyo di kaji nan sado itu
Nan rajo kato mufakaik
Nan bana kato saiyo
Ka bapakai manuruik adat
Sayo pakai sipaik mananti

Jawek : si alek 2 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato ba sitina
Kamudian rundiang ba sicapek
Ulah Qamat wakatu cupua
Ba sicapek sayo jo angku

Kalaluan nyo ba sicapek

Kandak buliah pintak balaku
Insya Allah, angku
Sayo rantang bagaikan tali
Sayo serak an bak manjalo
Mananti angku

Jawek : si alek 1 ka si alek 2

Insya Allah sayo nanti

*Ket : musti nyo baiyo dulu **si pangka 2** jo **si pangka 3** dll
tapi contoh baiyo **si pangka 2** jo **si pangka 3** indak
di buek kito anggap salasai, mako rundiang di
kumbalian*

Rundiang di kumbalian

Dari si alek 2 ka si alek 1

Mano angku
Sayo angku
Ka angku rundiang ba kumbalian
Laluan lah angku

Di timbang tujuan kato
Dalam sari'aik nan bapakai
Lah dalam bungka jo taraju
Buah rundiang nampak mambayang
Hakikaik paham alah samo
Lahia jo batin tak batikai
Barilah maaf dek pangulu
Jo bana angku sayo jalang

Arati nyo bana nan ka sayo pulangan
Mahadok kapado angku
Di hadapan baliu nan basamo
Antaro sayo jo angku
Di ateh tagak nan tananang
Kutiko duduak ta antaro

Mancari bulek nan sagiliang
Mancari pipiah nan salicak
Jikok di sayo lah tadi tu
Duduak kato bapaiyoan

Tagak kato ba pamolahan
Dapek lah bulek nan sagiliang
Basuo pipiah nan salayang
Bahimpun kato ka mupakaik
Manyuruikan sirih ka gagang
Mangumbalian pinang ka tampuak
Nak di angku tarabik nyo
Pulang ma alum pado angku

Jawek si alek 1 ka si alek 2

Lah sampai di angku
Sakiro alah angku
Ka angku lai
Laluan lah angku

Warih nan dari bundo kandung
Nyato pusako tigo luak
Lukisan adat nan usali
Pusako dari niniak moyang
Jo salam rundiang sayo anjuang
Rila jo maaf sayo mintak
Langkah kok panjang pado kaki
Jo bana angku sayo jalang

Nan jadi bana dek angku tadi
Mahadok kapado sayo
Di ateh duduak nan sa amparan
Di tagak nan sapamatang

Antaro sayo jo angku
Panek nan bakeh baranti
Patang nan bakeh bamalam
Tarago angku duduak baiyo

Tagak bakato jo bamolah

Jikok di angku lah tadi tu
Duduak kato ba paiyokan
Tagak kato ba pa molahan
Lah dapek bulek nan sa giliang
Basuo picak nan salayang

Manyuruikan siriah ka gagang nyo
Mangumbalian pinang katampuak
Mamintak bunyi dari sayo
Bana baitu kato angku

..... Iyo bana

Di kabanaran angku nan katangah
Lah dalam barih jo balabeh
Di lingkuang adat jo limbago
Tapi samantang pun baitu

Nan jadi bana di sayo
Mahadok kapado angku
Nak balega siang jo malam
Nak baganti patang jo pagi

Manyuruik kan siriah ka gagang
Mangumbalian pinang ka tampuak
Elok nak bunyi dari angku
Pulang ma alum pado sayo

Jawek si alek 2 ka si alek 1

Lah sampai di angku
Sakiro alah angku
Ka angku lai
Laluan lah angku

Batutua manuju bana
Mufakaik duduak barapak
Tando baradat di nagari

Jadi padoman ranah minang
Dahulu kato basitina
Rila jo maaf sayo mintak
Elok lah kato di simpani
Jo bana angku sayo jalang

Arati nyo nan jadi bana di angku ...
Mahadok kapado sayo
Di hadapan baliau nan basamo
Nak tibo kudarang di nan hitam
Lakek kasumbo ka nan sirah

Manyuruik kan siriah ka gagang
Mangumbalian pinang ka tampuak
Elok nak bunyi dari sayo
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku ...
Mahadok kapado sayo
Kurang tak ado ka panukuak
Senteang tak ado ka pambilai
Lah nyato adat nan bapakai

Tapi samantang pun baitu
Nan jadi bana di sayo
Mahadok kapado angku

Rancak bakato jo nan pandai
Elok bajalan jo nan tuo

Manyuruik kan siriah ka gagang
Mangumbalian pinang ka tampuak
Sayo mintak bunyi dari angku
Jo mufakat sayo samoi
Pulang ma alum pado angku

Jawek si alek 1 ka si alek 2

Lah sampai di angku
Sakiro alah angku
Ka angku lai
Laluan lah angku

Pihak di rundiang nan katangah
Takilek bagai caramin
Mambayang umpamo paneh
Dari timua datang nyo cewang
Ka tuhan tangan tatadah
Nak samo suci lahia batin
Kok untuang di gunjai nan tauleh
Jo bana angku sayo jalang

Arati nyo nan jadi bana di angku ...
Mahadok kapado sayo
Aluran badan diri angku
Elok bajalan jo nan tuo
Rancak bakato jo nan pandai

Manyuruik kan siriah ka gagang
Mangumbalian pinang ka tampuak
Angku mintak bunyi dari sayo
Jo mufakat angku samoi
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku ...
Mahadok kapado sayo
Elok bak paneh sudah hujan
Janiah bak bulan ampek baleh
Tarang dek kito nan basamo

Antaro sayo jo angku
Kaba unyuik unyuik indak patuih

Ka bapilin pilin indak sariang
Indak lah banamo patuik

Tuah ka samo kito cari
Malu ka samo kito japuik
Ba'a nan kini nangko
Insya Allah, angku

Sayo suruik kan siriah ka gagang nyo
Pinang di kumbalian ka tampuak nyo
Tapi nan jadi bana di sayo
Mahadok kapado angku

Karano kaki ka talangkah
Nan tangan akan ta jambo
Alam nan basifat gawa
Manusia basifat khilaf
Rumah tampak jalan tak tantu
Pulang ma alum pado angku

Jawek si alek 2 ka si alek 1

Lah sampai di angku
Sakiro alah angku
Ka angku lai
Laluan lah angku

Jikok pakaian bundo kandung
Ka padoman luak nan tigo
Makin di kakeh makin kabua
Lah di sapuah mako manggulang
Adaik salam lah sayo anjuang
Kok salah indak di sangajo
Maaf kan kato kok talanjua
Jo bana angku sayo jalang

Nan jadi bana di angku
Mahadok kapado sayo
Di bunyi nan sayo danga

Di rupo nan sayo pandang
Sapihak ka diri angku
Karano kaki ka talangkah
Nan tangan ka tajambo

Alam nan basifat gawa
Manusia basifat khilaf
Rumah tampak jalan tak tantu
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku ...
Mahadok kapado sayo
Lah nyato luruih bak di banang
Bantuak di makan siku siku
Karano baliu lai rapek duduak di siko
Indak ka bapabia tagamang angku do
Alah ka sanang hati angku

Jawek si alek 1 ka si alek 2

Lah sampai di angku
Sakiro alah angku
Ka angku lai
Laluan lah angku

Daulu kato basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Kabanaran angku ... nan katangah
Di bunyi nan sayo danga
Di rupo nan sayo pandang
Kok sasek lai ka basapo
Tadoroang lai ka basintak

Nan sayo tuntuik kapado angku
Iyo lah kato nan sado itu

Ba'a nan kini nangko
Karano kandak alah buliah
Nan pintak alah balaku

Insya Allah, angku
Sayo suruik kan siriah ka gagang
Sayo kumbalian pinang katampuak
Basimak kan dek angku

Jawek si alek 2 ka si alek 1

Insya Allah, angku
Baliau basamo manyimak kan

Rundiang di kumbalian

Dari si alek 1 ka si pangka 1

Mano angku
Sayo angku
Ka angku rundiang ba kumbalian
Laluan lah angku

Pitalah jo bungo tanjuang
Ka tigo jo gunuang rajo
Anak koto dari batipuah
Kabasaran nyo dek tuan gadang
Salam jo rundiang sayo anjuang
Khilaf kilafaik kok basuo
Sayo susun jari nan sapuluah
Jo bana angku sayo jalang

Arati nyo bana nan ka sayo tiboan
Mahadok kapado angku
Sapihak parundiangan kito tadi
Tinggi batang lambek ka jatuah

Jauah bajalan lamo babaliak

Mancari bulek nan sagiliang
Mancari picak nan salayang
Hukum takanak pado sayo
Sawajah gayuang manyambuik
Limbago kato manjawab
Tatumpah ka diri sayo

Jikok di sayo lah kini tu
Baban lah tibo di kapalo
Barek raso nyo ka di pikua
Ringan raso nyo ka sayo jinjiang

Tapi samantang pun baitu
Antaro sayo jo angku
Bakaji malang jo mujua
Jikok di kaji kamujuran nyo
Lai tasungkuik bak manjalo
Lai tatampuah di ruang nyo

Jikok di kaji kamalangan nyo
Indak tatampuah di ruang nyo
Indak tasungkuik bak manjalo
Ikan tarayun jalo putuih

Jikok panjang parundiangan angku..
Singkek di sayo ka bari nyo
Manggulang ameh di sapuah
Iko lah bana nan sayo tiboan
Mahadok kapado angku
Pulang ma alum pado angku

Jawek si pangka ka si alek 1

Lah sampai di angku
Sakiro alah angku
Ka angku lai
Laluan lah angku

Bintiak jo ragi jan batuka
Basamo kito mamaham kan
Jadi pusako ranah minang
Adaik ba kato ba sitina
Rila jo maaf di puhun kan
Jo bana angku sayo jalang

Arati nyo nan jadi bana di angku ...
Mahadok kapado sayo
Antaro sayo jo angku
Tinggi batang lambek ka jatuah
Jauah bajalan lamo babaliak

Mancari bulek nan sagiliang
Mancari picak nan salayang
Hukum takanak pado angku
Sawajah gayuang manyambuik
Limbago kato manjawab
Ka diri angku tatumpah nyo

Jikok di angku lah kini tu
Baban lah tibo di kapalo
Barek raso nyo ka di pikua
Ringan raso nyo ka ba jinjiang
Barek tak mungkin di geleangan
Ringan tak mungkin di tinggakan

Tapi samantang pun baitu
Antaro sayo jo angku
Bakaji malang jo mujua
Jikok di kaji kamujuran nyo
Lai tasungkuik bak manjalo
Lai tatampuah di ruang nyo

Jikok di kaji kamalangan nyo
Indak tatampuah di ruang nyo
Indak tasungkuik bak manjalo
Ikan tarayun jalo putuih

Jikok panjang parundiangan sayo...
Singkek di angku ka bari nyo
Mangulang ameh di sapuah
Iko lah bana nan ba tiboan
Mahadok kapado sayo
Pulang ma alum pado sayo
Bana baitu kato angku

..... Iyo bana

Di bana angku nan katangah
Lah dalam barih jo balabeh
Di kanduung adaik jo limbago
Alah dalam cupak jo gantang

Hanyo harapan dari sayo
Antaro sayo jo angku
Tantangan labiah jo kurang
Singkek di ambiak ka ukuran
Panjang di ambiak ka balabeh
Samo kito pakai sajo kaduo nyo
Alah ka sanang hati angku

Jawek si alek 1 ka si pangka

Daulu kato basitina
Kamudian rundiang basicapek
Basicapek sayo jo angku

Nan jadi bana di angku
Di bunyi nan sayo danga
Di rupo nan sayo pandang
Panjang di ambiak ka balabeh
Singkek di ambiak ka ukuran
Samo kito pakai kaduo nyo
Kan bana baitu rundiang angku ...

..... iyo bana

Nan sayo tuntuik nyato
Kahadapan angku
Iyo lah rundiang nan sado itu

Ba'a nan iko kini
Kandak buliah pintak balaku
Insya Allah, sayo kumbalian
Ba simakan di angku

Jawek si pangka ka si alek 1

Insya Allah
Di simakan baliu nan basamo

Dari si alek 1 ka si pangka 1

Mano angku
Sayo angku
Ka angku... rundiang ba kumbalian
Laluan lah angku

Alua patuik jalan batampuah
Suri banang tuladaan kain
Cupak panuah pusako tatap
Manuruik barih cupak gantang
Gantang tatap sukatan panuah
Bungka sapadi tak bamain
Rila jo ma'af sayo mintak
Jo bana angku sayo jalang

Arati nyo bana nan ka sayo kumbalian
Mahado kapado angku
Mahukum di ateh kato
Manyiang tampek nan tumbuah
Manimbang tampek nan ado
Tumbuah sarupo iko kini

Di caliak kapado langgam adaik
Sapihak kapado alek jamu

Panek lah raso baparantian
Palak lah raso ba paranginan

Lah tarang cahayo adaik
Lah tampak bangun pusako
Nak jan lamo batang tasanda
Jan lamo baban talatak

Nak jan siang bahabih hari
Jan malam bahabih minyak
Lah buliah ko biduak kito dayuang
Nak capek tibo di subarang
Nak babari dek angku pitua nyo
Pulang ma' alum pado sayo
Bana baitu rundiang angku

..... Iyo bana

Nan jadi bana di angku tadi
Mahadok kapado sayo
Jikok di sayo lah tadi tu
Sakiro gayuang baru nan basambuik
Sakiro kato baru nan bajawek

Ba' a nan kini nangko
Karano ayam lai barinduak
Nan siriah lai bajunjuang
Di kandak nan ka mambari
Di pintak nan ka mampalakuan

Sayo sangkuik kan ka nan tinggi
Sayo sandakan ka nan gadang
Mananti angku samantaro
Pulang ma alum pado angku

Jawek si pangka ka si alek 1

Lah sampai di angku
Sakiro alah angku
Ka angku lai

Laluan lah angku

Sungai jambu jo lubuak atan
Camin taruih di koto pili
Dalam tambo acok tasabuik
Jambo kok panjang pado tangan
Salam jo simpuah pamanuahi
Jo bana angku sayo runuik

Arati nyo nan jadi bana di angku ...
Mahadok kapado sayo
Di rundiang angku tadi tu
Sakiro gayuang baru nan basambuik
Sakiro kato baru nan bajawek

Ba'a nan kini nangko
Gantiang putuih biang nak tabuak
Nan siriah lai bajunjuang
Karano ayam lai barinduak

Di kandak nan ka mambari
Di pintak nan ka mampalakuan
Sayo sangkuik kan ka nan tinggi
Sayo sandakan ka nan gadang

Antaro sayo jo angku
Rundiang di simpan dalam barih
Kato di simpan jo mufakat
Mananti angku samantaro
Bana baitu kato angku

..... Iyo bana

Di kabanaran angku.... nan katangah
Karano lah jalan adat nan bapakai
Silang tak ado ka pa amfang
Patuik tak ado ka pa ungkai
Insya Allah, sayo nanti

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Daulu kato ba sitina
Dek azan wakatu cupua
Ulah Qamat wakatu habih
Elok lah rundiang ba sicapek
Ba sicapek sayo jo angku

Di bunyi nan sayo danga
Di rupo nan sayo pandang
Sapihak rundiang angku
Angku lepeh biduak nak balayia
Pelang mananti di muaro
Kan bana baitu rundiang angku ...

..... Iyo bana
Di kabanaran angku nan katangah
Nan sayo tuntuik ka hadapan angku...
Iyo lah rundiang nan sado itu
Karano kandak buliah pintak balaku
Sayo laluan angku

Jawek si pangka ka si alek 1

Insya Allah, sayo nanti

*Ket : manyangkuik kan ka nan tinggi
atau mintak jawaban ka nan tuo
contoh **si alek 1 ka si alek 4***

Dari si alek 1 ka si alek ka 4 atau pangulu

Mano angku
Sayo angku

Ka angku rundiang ba tiboan
Laluan lah angku

Salam talayang tantang alua
Tiok suatu kan bapangka
Niaik jo naza balabuahan
Adat limbago bapancalang
Rundiang kok ado nan basaua
Lahia jo batin kok batuka
Rila jo maaf di puhun kan
Jo bana angku sayo jalang

Arati nyo rundiang na ka sayo tiboan
Mahadok kapado angku
Di parundiangan sayo tadi
Jo diri silang nan bapangka

Sakiro jajak baru nan batikam
Batang baru nan sayo titih
Nan kandak alun lai babari
Pintak alun bapalakuan

Ba'a nan kini nangko
Di kandak nan kamambari
Di pintak nan kamampalakuan

Di ma katumbuah ibaraik bijo
Di ma katabik umpamo padi
Iko lah bana sayo tibo kan
Mahadok kapado angku
Pulang ma alum pado angku

Jawek si alek 4 ka si alek 1

Lah sampai di angku
Sakiro alah angku
Ka angku lai
Laluan lah angku

Aia mancuwa jo kayu tanam

Ujuang dek luak tanah data
Masuak ka ranah pasia jambak
Lapeh ka padang ujuang karang
Niniak mamak kunjuangan salam
Bintiak jo ragi kok batuka
Barilah maaf banyak banyak
Jo bana angku sayo jalang

Arati nyo nan jadi bana di angku ...
Jo diri silang nan bapangka
Sakiro jajak baru nan batikam
Sakiro batang baru nan batitih
Nan kandak alun babari
Pintak alun ba palakuan

Ba'a nan kini nangko
Di kandak nan kamambari
Di pintak nan kamampalakuan
Iko lah bana nan batiboan
Mahadok kapado sayo
Bana baitu kato angku

..... Iyo bana

Di kabanaran angku nan katangah
Lah dalam barih jo balabeh
Di lingkuang cupak jo gantang
Tapi samantang pun baitu
Sapihak kapado diri sayo

Sayo tabang kayu sabatang
Sayo karek ujuang jo pangka
Di sisiak dahan jo rantiang
Sayo ambiak di tengah tengah
Kok lai dapek ka tonggak tuo

Samantaro sayo batenggang
Mananti angku dalam adaik
Pulang ma alum pado angku

Jawel si alek 1 ka si alek 4

Lah sampai di angku
Sakiro alah angku
Ka angku lai
Laluan lah angku

Patitih pamenan andai
Gurindam pamenan kato
Warih parpatiah nan sabatang
Bintiak jo ragi kok batikai
Rila jo maaf dari sayo
Jo bana angku sayo jalang

Arati nyo nan jadi bana di angku ...
Mahadok kapado sayo
Sapihak ka diri angku

Nak manabang batuang sabatang
Angku karek ujuang jo pangka
Ba sisiak buku jo rantiang
Angku ambiak di tengah tengah
Hanyo sakiro nan paguno
Di sinan kandak kito bari

Samantaro angku batenggang
Mananti sayo dalam adaik
Pulang ma alum pado sayo
Bana baitu rundiang angku

..... Iyo bana
Di kabanaran angku..... nan katangah
Lah dalam barih jo balabeh
Di lingkuang adaik jo pusako
Bana nyo di bao lalu
Lalu nyo di kaji nan sado itu
Insya Allah, sayo nanti angku

Jawek si alek 4 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah kamat wakatu habih
Elok lah rundiang di simpani
Rila jo maaf sayo mintak
Basicapek sayo jo angku

Lalu nyo di kaji basicapek
Di bunyi nan sayo danga
Di rupo nan sayo pandang
Di hadapan baliau nan basamo
Kandak buliah pintak balaku
Insya Allah, sayo laluan

Jawel si alek 1 ka si alek 4

Insya Allah sayo nanti

*Ket : mancari kato baiyo antaro si alek 4 jo si alek 5 dll
Sasudah baiyo kato di kumbalian
Contoh nyo indak kito buek*

Kato bakumbalian

Dari si alek 4 ka si alek 1

Mano angku
Sayo angku
Ka angku..... rundiang ba kumbalian
Laluan lah angku

Minangkabau punyo pitua
Jadi pakaian niniak jo mamak
Tando baradat di nagari

Dalam adat sabatang panjang
Dahulu kato basitina
Rila jo maaf sayo mintak
Elok lah kato di simpani
Jo bana angku sayo jalang

Arati nyo bana nan ka sayo kumbalian
Mahadok kapado angku
Sapihak parundiangan kito tadi
Tinggi batang lambek ka jatuah
Jauah bajalan lamo babaliak
Tarago sayo dek batenggang
Mancari kato nan saiyo

Isi nyo rundiang nan sa ukua
Tantangan kandak ka mambari
Di pintak nan ka mampalakuan
Tatumpah juo ka diri sayo
Jikok di sayo lah kini tu
Babulek kan aia ka pambuluah
Ba himpun kato ka mufakaik
Bakandak kami ka angku

Jan ayam sikua duo dabiah nyo
Apo nan tacoreang tabarih di angku ..
Jo mufakaik sayo samoi
Kami basamo lah dalam itu
Pulang ma alum pado angku

Jawek si alek 1 ka si alek 4

Lah sampai di angku
Sakiro alah angku
Ka angku lai
Laluan lah angku

Di bukik si ulang ali
Di pintu balai nan gadang
Aua sarumpun di ateh nyo
Aua kiramat ba namoan

Langkah kok panjang pado kaki
Rundiang ko ado bana nan sumbang
Rila jo maaf dari sayo
Bana ka angku sayo tiboan

Arati nyo nan jadi bana di angku ...
Di bunyi nan sayo danga
Di rupo nan sayo pandang
Jan ayam sikua duo dabiah nyo
Apo nan tacoreang tabarih dek sayo
Angku alah di dalam itu
Jo mufakaik angku samoi
Kan bana baitu rundiang angku ...
..... Iyo bana

Di bana angku nan katangah
Lah di dalam barih jo balabeh
Di lingkuang adat jo pusako
Bana nyo di bao lalu

Lalu nyo di kaji nan sado itu
Insya Allah, angku
Di agiah kandak pihak si pangka

Saketek nyolai angku
Karano kaki ka malangkah
Di tangan nan ka tajambo
Alam nan basipaik gawa
Manusia basipaik khilaf
Pulang ma alum pado angku

Jawek si alek 4 ka si alek 1

Lah sampai di angku
Sakiro alah angku
Ka angku lai
Laluan lah angku

Di kana tujuan rundiang
Di hadapan niniak jo mamak

Urang sa adaik sapusako
Dalam bulek kok nampak sandiang
Barilah maaf banyak banyak
Ka angku bana kumbali nyo

Arati nyo nan jadi bana di angku ...
Mahadok kapado sayo
Karano kaki ka malangkah
Di tangan nan ka tajambo

Alam nan basipaik gawa
Manusia basipaik khilaf
Pulang ma alum pado sayo
Bana baitu rundiang angku

..... Iyo bana

Di kabanaran angku nan katangah
Takilek bagai padoman
Tabayang umpamo paneh
Batang lah tampak tasanda nyo

Insya Allah, angku
Karano baliu lai basamo
Indak ka bapabia tagamang angku...
Alah ka sanang hati angku

Jawek si alek 1 ka si alek 4

Da ulu kato ba sitina
Kamudian rundiang ba sicapek
Ba sicapek sayo jo angku

Kalaluan nyo ba sicapek
Karano kandak alah buliah
Nan pintak alah balaku
Sayo kumbalian ka asa nyo angku...
Basimak kan di angku

Jawek si alek 4 ka si alek 1

Insya Allah, angku
Di simak kan baliu nan basamo

Rundiang di kumbalian

Dari si alek 1 ka si pangka 1

Mano angku
Sayo angku
Ka angku rundiang ba kumbalian
Laluan lah angku

Salam ta'azim dari sayo
Randah nan di anjuang tinggi
Ketek nan di amba gadang
Dek alah mupakaik dau lu nyo
Rila jo ma'af pamanuahi
Jo bana angku sayo jalang

Arati nyo bana nan ka sayo tiboan
Mahadok ka diri angku
Pihak parundiangan kito tadi
Antaro sayo jo angku

Panek nan bakeh baranti
Patang nan bakeh bamalam
Tarago sayo bausaho
Manyanguik kan ka nan tinggi
Manyandakan ka nan gadang

Jikok di sayo lah tadi tu
Basanguik kan ka nan tinggi
Basandakan ka nan gadang
Lah dapek buah ka bari nyo

Di kabanaran angku tadi
Jan siang ba habih hari
Nak jan malam ba habih minyak
Jan lamo batang tasanda

Nak jan lamo baban talatak
Lah buliah ko karajo kito ansua
Bana baitu kato angku

..... iyo bana

Di kabanaran angku nan katangah
Lah dalam barih jo balabeh
Di lingkuang adaik jo pusako
Elok kacak gamak lah sedang
Bana nyo di bao lalu

Lalu nyo di kaji nan sado itu
Balayia nak sampai ka pulau
Kutiko angin sedang rancak
Rancak parahu di layia kan
Lah elok bana di ansua bakarajo
Pulang ma'alum pado angku

Jawek si pangka ka si alek 1

Lah sampai di angku

Sakiro alah angku

Ka angku lai

Laluan lah angku

Daulu kato basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Di bunyi nan sayo danga
Di rupo nan sayo pandang
Di hadapan baliau nan basamo
Kandak buliah pintak balaku
Iyo alah manyanang dalam hati
Lah sunyi dalam kiro kiro
Insya Allah, ba amakan sajo lai

Panyambahan Mintak Izin **Janang Kamanatiang**

Dari si pangka 1 ka si alek 1

Mano angku
Sayo angku
Ka angku rundiang ba tiboan
Laluan lah angku

Tantangan sambah jo manyambah
Kok kurang taratik jo mujilih
Kok kurang lelo jo sopan
Dek cameh sumangek hilang
Sambah manyambah kapado Allah
Kok talipua sayo di barih
Maaf ka angku di puhunkan
Jo bana angku sayo jalang

Nan jadi bana di sayo
Mahadok kapado angku
Sagalo alek jamu kami
Nan duo barih ka duduak'an
Nan tigo langgam paseloan

Sahinggo paran picak malintang naiak
Bandua pipih malintang turun
Sabujua rumah nan gadang
Salega rumah nan gadang
Manyasak ka papan sariang
Sampai ka sandi alua adaik
Salam di sinan di tiboan

Adaik limbago iko kini
Mahukum di ateh kato
Kalau manyiang di nan tumbuah
Jikok manimbang di nan ado

Pado wakatu iko kini
Sadang tananang bana datang
Pikiran baiak nan lah tumbuhan
Mufahum kokoh nan lah timbua
Paham tibo aka baranti

Ka banaran batiboan bakeh angku ...
Rundiang nan ka sayo tiboan
Mahadok kapado angku

Dek karano janang kamatiang
Kaki nan ka talangkah
Nan tangan lah ka tajambo
Alam nan basipaik gawa
Manusia basipaik kilaf

Kok takirahi angku dek bajalan
Nak babari suko jo rila
Pulang ma'alum pado angku

Panyambahan ka Makan

Dari si pangka 1 ka si alek 1

Mano angku
Sayo angku
Ka angku rundiang ba tiboan
Laluan lah angku

Batutua manuju bana
Mufakaik duduak barapak
Tando baradaik di nagari
Jadi padoman ranah minang
Dahulu kato basitina
Rila jo maaf sayo mintak
Elok lah kato di simpani
Jo bana angku sayo jalang

Sungguah pun iyo angku surang
Sayo tiboan salam jo parundiangan
Samego tumpuan puntiang
Sari'aik adaik nan bapakai
Naza kapado nan basamo

Niniak mamak kunjuangan salam
Sarato alim jo ulama
Rang tuo nan arih bijak
Langkok sagalo cadiak pandai
Bako baki jo pasumandan

Karik baik samo di cinto
Bundokanduang samo di dalam
Dalam imbauan sayo juo
Salam di sinan di tiboan

Ada pun salam nan ka sayo tiboan
Mahadok kapado angku
Manyang tampek nan tumbuah
Manimbang tampek nan ado

Tumbuhan sarupo iko kini

Pakaian syarak nan lazim
Siang malam jadi anjuran
Patang pagi samo di cinto
Dunia sah langgam badiri

Habih hari babilang pakan
Habih pakan babilang bulan
Habih bulan tahun batuka
Adaik bapakai salamo nyo

Rumah gadang rangkiang lancang
Nan sasak dek alua patuik
Cupak adaik labuahan kato
Nareco lautan budi
Dalam ibo rusuah mandatang
Tak anggak batapuak tangan
Mancaliak dunia lah takambang

Pihak hidangan nan katangah
Lah tibo di hadapan angku
Tibo di muko nan basamo
Basusun di ruang tengah

Balampih piriang di dalam
Piriang haluih buatan japang
Balilih jo aia ameh
Basalo jo bungo inai
Bungo kiambang dalam kolam

Babagai rupo isi piriang
Banamo ragam bungo adaik
Tak guno di sabuik bana
Sadang lah nan sado itu
Sadundun cibiak jo galeh
Sairiang tadah jo cangkia
Lah kandak adaik jo limbago

Kilek baliuang lah ka kaki
Kilek camin alah kamuko

Parahu lah lamo dek basauah
Laia lah lamo dek baguluang
Parahu nak mintak di laiakan
Laia nak mintak angku kambang
Kilek jo bayang kito pakai
Pulang ma alum pado angku ...

Jawek si pangka ka si alek 1

Lah sampai di angku
Sakiro alah angku
Ka angku lai
Laluan lah angku

Loroang di rundiang nan lah tibo
Takilek bagai caramin
Mambayang umpamo paneh
Kandungangan buek lah mambayang
Batang lah tampak tasanda nyo
Nak samo suci lahia batin
Rila jo maaf di pakameh
Jo bana angku sayo jalang

Nan jadi bana di angku
Mahadok kapado sayo
Di ateh andak alai nyo
Tibo gayuang takanak sambuik
Tibo kato badiri jawab
Tapi samantang pun baitu
Sapihak ka diri sayo

Dek duduak barih basusun
Limbago duduak tengah rapek
Lamak siriah lega carano
Rancak kato di lega bunyi

Samantaro sayo balega
Dielah kato jo mupakaik
Sayo ambiak duduak baiyo
Tagak bakato jo bamolah
Rundiang di simpan dalam adaik
Pulang ma alum pado angku ...

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Adaik kato mahadang bana
Kamudian rundiang ba sicapek
Ulah kamat wakatu habih
Hari nan elok jan tabuang
Bintiak jo ragi jan batuka
Jo maaf rundiang sayo angkek
Indak sayo malipua barih
Jo bana angku sayo jalang

Arati nyo bana nan ka sayo tibo an
Mahadok kapado angku
Di bunyi nan sayo danga
Di rupo nan sayo pandang
Sapihak ka diri angku

Lamak siriah lega carano
Lamak kato di lega bunyi
Samantaro angku balega
Nak ba ambiak duduak baiyo
Tagak bakato jo bamolah
Sipaik mananti malah sayo
Bana baitu rundiang angku

..... Iyo bana
Di kabanaran angku nan ka tengah
Kapeh sahalai sayo pacik

Pilinan niniak jo mamak
Jadi buatan ayah bundo
Sayo lapeh pelang nak balayia
Sampan mananti di muaro
Alah ka sanang hati angku

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Nan jadi bana di angku
Di bunyi nan sayo danga
Di rupo nan sayo pandang
Angku lapeh pelang nak balayia
Sampan mananti di muaro
Kan bana baitu rundiang angku...

..... iyo bana

Di kabanaran angku nan katangah
Nan sayo tuntuik nyato
Iyo lah rundiang nan sado itu

Ba'a nan kini nangko
Karano kandak alah buliah
Nan pintak alah balaku
Insya Allah, angku
Sayo rantang bagai kan tali
Sayo serak kan bagai manjalo
Mananti angku

Jawek si pangka ka si alek 1

Insya Allah, sayo nanti

Ket : baiyo dulu si pangka 1 jo pangka 2 sasudah
baiyo, rundiang di kumbalian

Pakolahan untuak mencari kato mufakat

Dari si Alek 1 ka si alek 2

Mano angku
Sayo angku
Ka angku ... rundiang ba tiboan
Laluan lah angku

Aia nan mahantam turun
Pulai nan bapangkek naiak
Maninggakan rieh jo buku
Jadi pusako ranah minang
Jari sapuluah sayo susun
Rundiang nan raib kok tabatiak
Mamintak maaf ka pangulu
Jo bana angku sayo jalang

Arati nyo rundiang nan sayo tiboan
Mahadok kapado angku....
Lah ba dantuang guruah dari hulu
Ba bunyi gaga di lauiktan
Kalam kabuik cando nyo hari
Bakumpa gabak ateh langik
Turun lah hujan di udaro

Turun bak suto di ampaian
Jimek sado nyo tanah basah

Sumua panuah danau malimbak
Taganang aia di daratan
Taganang nan balun ba iliran

Ilia nan balun ba muaro
Muaro nan balun basudahi

Ba'a nan kini nagko
Di tanang nan ka ma iliran
Muaro nan kamanyudahi
Di ma ka tumbuhan ibaraik bijo
Dima katabik nan bak padi

Iko lah bana sayo tiboan
Mahadok kapado angku
Di harok bunyi nak kumbali
Pulang ma alum pado angku ...

Jawek : si alek 2 ka si alek 1

Lah sampai di angku
Sakiro alah angku
Ka angku lai
Laluan lah angku

Lubuak nan tigo alah tantu
Bahagian lareh caniago
Ganggaman parpatiah nan sabatang
Rundiang kok ado ba nan ragu
Rila jo maaf dari sayo
Jo bana angku sayo jalang

Arati nyo nan jadi bana di angku...
Mahadok kapado sayo
Lah badantuang guruah dari hulu
Babunyi gaga di lauiktan
Kalam kabuik cando nyo hari
Bakumpa gabak nak ka gunuang
Turun lah hujan di udaro

Turun bak suto di ampaian
Jimek sado nyo tanah basah
Sumua panuah danau malimbak
Taganang aia di daratan

Taganang nan balun ba iliran
Ilia nan balun ba muaro
Muaro nan balun basudahi

Ba'a nan kini nagko
Di tanang nan ka ma iliran
Muaro nan kamanyudahi
Di ma ka tumbuah ibaraik bijo
Di ma katabik nan bak padi

Pulang ma alum pado sayo
Di harok bunyi nak kumbali
Bana baitu rundiang angku

..... Iyo bana

Kabanaran angku nan katangah
Lah dalam barih jo balabeh
Di kanduang adat jo pusako
Bana nyo di bao lalu
Lalu nyo di kaji nan sado itu
Sapihak ka diri sayo
Malengoang sayo ka mudiak
Tampak lah ranah tanjuang alam
Taluak baliku batu ampa

Mancaliak sayo ka ilia
Tambang urai sungai ameh
Lantak batu, paga nyo ruyuang
Tabayang ranah bukik gombak

Jalan nan jauah ka di turuik
Kelok jo liku ka di tampuah
Mancari bijo gak sabuah
Bijo di tanam musim kini

Jikok babuah jo babungo
Bungo nak samo di pasuntiang
Buah nak samo kito makan
Lai koh adat nan baitu

Nyato pusako nan bak kian
Di harok bunyi nak kumbali
Pulang ma alum pado angku

Jawek : si alek 1 ka si alek 2

Lah sampai di angku
Sakiro alah angku
Ka angku lai
Laluan lah angku

Ikua koto kapalo koto
Baitu juo di sabuik kan
Masuak ganggaman tuan gadang
Di atok langik jo bicaro
Bumi nan indak katirisan
Jo bana angku sayo jalang

Nan jadi bana di angku tadi
Mahadok kapado sayo
Malengoang angku ka ilia
Tampak lah tanjuang mangajuju

Mancaliak angku ... ka mudiak
Taluak baliku batu ampa
Tambang urai sungai nyo ameh
Jalan nan jauh ka di turuik
Kelok jo liku ka di tampuah

Mancari gandang ka paningkah
Isi nyo talempong ka panalun
Mananti sayo dalam barih
Lai koh adat nan baitu
Nyato pusako nan bak kian
Pulang ma lum pado sayo
Di harok bunyi nak kumbali
Bana baitu rundiang angku

..... Iyo bana

Di kabanaran angku nan ka tangah
Kurang tak ado kapanukuak
Senteang tak ado ka pambilai
Bana nyo di bao lalu

Lalu nyo di kaji nan sado itu
Nan rajo kato mufakaik
Nan bana kato saiyo
Ka bapakai manuruik adat
Alah pakaian di pangulu
Sayo pakai sipaik mananti

Jawek : si alek 2 ka si alek 1

Lah sampai di angku
Sakiro alah angku
Ka angku lai
Laluan lah angku

Nan titian biaso lapuak
Janji kok mungkia padanan nyo
Tantu talalai manyubarang
Agak batanang angku duduak
Gawa jo khilaf kok basuo
Jo bana angku sayo jalang

Nan jadi bana di angku
Mahadok kapado sayo
Di bunyi nan sayo danga
Di rupo nan sayo pandang

Dek angku urang pamurah
Lakeh babari kandak sayo
Kan bana baitu rundiang angku...

..... Iyo bana

Nan sayo tuntuik bakeh angku...
Iyolah rundiang nan sado tu
Ba'a nan kini nangko

Dek kandan alah buliah
Nan pintak alah balaku

Alhamdulillah angku
Sayo rantang bagaikan tali
Sayo serak kan bak manjalo
Mananti angku

Jawek : si alek 1 ka si alek 2

Daulu kato basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Sapihak ka diri angku
Di bunyi nan sayo danga
Lah ka barantang bagaikan tali
Baserak'an bagai manjalo
Insya Allah, angku
Sayo nanti kabanaran angku ...

Jawek : si alek 2 ka si alek 1

Insya Allah sayo laluan

Ket : musti nyo baiyo dulu si pangka 2 jo si pangka 3 dll
tapi contoh baiyo si pangka 2 jo si pangka 3 indak di
buek kito anggap salasai, mako rundiang di
kumbalian

Rundiang di kumbalian

Dari si alek 2 ka si alek 1

Mano angku
Sayo angku
Ka angku... rundiang ba kumbalian

Laluan lah angku

Nan tabincang dek bundo kanduang
Ka padoman luak nan tigo
Makin di gali makin kabua
Tiok di sapuah nyo manggulang
Warih salam lah sayo anjuang
Kok salah indak di sangajo
Maaf kan kato nan talanjua
Jo bana angku sayo jalang

Arati nyo bana nan ka sayo pulangan
Mahadok kapado angku
Antaro sayo jo angku
Panek nan bakeh baranti
Patang nan bakeh bamalam

Tarago sayo duduak baiyo
Tagak bakato jo bamolah
Mancari bulek nan sagiliang
Mancari pipiah nan salicak

Jikok di sayo lah tadi tu
Dek yakin hati ka dapek
Duduak kato bapaiyoan
Tagak kato bapamolahan

Dapek lah bulek nan sagiliang
Basuo pipiah nan salayang
Bahimpun kato ka mupakaik

Manyuruikan sirih ka gagang
Mangumbalian pinang ka tampuak
Nak di angku tarabik nyo
Pulang ma alum pado angku

Jawek si alek 1 ka si alek 2

Lah sampai di angku
Sakiro alah angku
Ka angku lai

Laluan lah angku

Kato pitua bundo kanduang
Jadi pakaian rakyat banyak
Bapakai juo sampai kini
Dalam adat acok tabincang
Jo salam rundiang sayo anjuang
Rila jo maaf sayo pintak
Langkah kok panjang pado kaki
Jo bana angku sayo jalang

Nan jadi bana dek angku ...tadi
Mahadok kapado sayo
Di ateh duduak nan sa amparan
Di tagak nan sapamatang

Antaro sayo jo angku
Panek nan bakeh baranti
Patang nan bakeh bamalam
Tarago angku duduak baiyo
Tagak bakato jo bamolah

Jikok di angku lah tadi tu
Duduak kato ba paiyokan
Tagak kato ba pamolahan
Lah dapek bulek nan sa giliang
Basuo picak nan salayang

Manyuruikan siriah ka gagang nyo
Mangumbalian pinang katampuak
Mamintak bunyi dari sayo
Bana baitu rundiang angku

..... Iyo bana

Di kabanaran angku nan katangah
Lah dalam barih jo balabeh
Di lingkuang adat jo limbago
Tapi samantang pun baitu

Nan jadi bana di sayo
Mahadok kapado angku
Nak balega siang jo malam
Nak baganti patang jo pagi

Manyuruik kan siriah ka gagang
Mangumbalian pinang ka tampuak
Elok nak bunyi dari angku
Di harok bunyi nak kumbali
Pulang ma alum pado angku ...

Jawek si alek 2 ka si alek 1

Lah sampai di angku
Sakiro alah angku
Ka angku lai
Laluan lah angku

Di timbang tujuan kato
Dalam sari'aik nan bapakai
Lah dalam bungka jo taraju
Dalam rundiang nampak mambayang
Hakikaik paham alah samo
Lahia jo batin tak batikai
Barilah maaf dek pangulu
Jo bana angku sayo jalang

Arati nyo an jadi bana di angku tadi
Mahadok kapado sayo
Nak balega siang jo malam
Nak baganti patang jo pagi

Manyuruik kan siriah ka gagang
Mangumbalian pinang ka tampuak
Elok nak bunyi dari sayo
Di harok bunyi nak kumbali
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku
Mahadok kapado sayo
Lah dalam barih jo balabeh
Di lingkuang cupak jo gantang
Lah nyato adat nan bapakai

Tapi samantang pun baitu
Nan jadi bana di sayo
Rancak bakato jo nan pandai
Elok bajalan jo nan tuo

Manyuruik kan siriah ka gagang
Mangumbalian pinang ka tampuak
Sayo mintak bunyi dari angku
Jo mufakat sayo samoi
Pulang ma alum pado angku

Jawek si alek 1 ka si alek 2

Lah sampai di angku
Sakiro alah angku
Ka angku lai
Laluan lah angku

Barakik rakik ka hulu
Baranang ranang ka tapi
Samo di ambiak ka padoman
Rundiang kok ado ba nan ragu
Bari maaf manyusun jari
Bana ka angku ba tiboan

Arati nyo nan jadi bana di angku tadi
Mahadok kapado sayo
Nan jadi bana di angku
Elok bajalan jo nan tuo
Rancak bakato jo nan pandai

Manyuruik kan siriah ka gagang
Mangumbalian pinang ka tampuak

Angku mintak bunyi dari sayo
Jo mufakat sayo samoi
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku
Mahadok kapado sayo
Elok bak paneh sudah hujan
Tarang bak bulan ampek baleh
Nyato dek kito nan basamo

Antaro sayo jo angku
Kaba unyuik unyuik indak patuih
Ka bapilin pilin indak sariang
Indak lah banamo patuik

Tuah ka samo kito cari
Malu ka samo kito japuik
Ba'a nan kini nangko
Insya Allah, angku

Sayo suruik kan siriah ka gagang nyo
Pinang di kumbalian ka tampuak nyo
Tapi nan jadi bana di sayo
Mahadok kapado angku

Karano kaki ka talangkah
Nan tangan ka tajambo
Alam nan basifat gawa
Manusia basifat khilaf
Rumah tampak jalan tak tantu
Pulang ma alum pado angku

Jawek si alek 2 ka si alek 1

Lah sampai di angku

Sakiro alah angku

Ka angku lai

Laluan lah angku

Sikilang jo aia bangih
Pasia banda sapuluah
Itu lah rantau banamoan
Mamaek kok indak tantang barih
Sayo susun jari nan sapuluah
Bana ka angku ba tiboan
Nan jadi bana di angku
Di bunyi nan sayo danga
Di rupo nan sayo pandang
Sapihak ka diri angku
Karano kaki ka talangkah
Nan tangan ka tajambo

Alam nan basifat gawa
Manusia basifat khilaf
Rumah tampak jalan tak tantu
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku
Mahadok kapado sayo
Lah dalam barih jo balabeh
Di kandung adat jo pusako

Tabang lah nuri ka udaro
Eten ka langik nan katujuah
Mamutuih kan undang jo bidaran
Kok tadabok jatuah ka tanah
Dukun sadio manantikan
Alah ka sanang hati angku

Jawek si alek 1 ka si alek 2

Lah sampai di angku

Sakiro alah angku

Ka angku lai

Laluan lah angku

Daulu kato basitina
Dek azan wakatu cupua
Ulah Qamat wakatu habih
Elok lah rundiang ba sicapek
Ba sicapek sayo jo angku

Nan jadi bana di angku

Di bunyi nan sayo danga
Di rupo nan sayo pandang
Di hadapan baliu nan basamo

Tabang lah nuri ka udaro
Eten ka langik nan ka tujuh
Mamutuihkan undang jo bidaran
Kok tadabok jatuh ka tanah
Dukun sadio manantikan
Kan bana baitu rundiang angku...

..... iyo bana

Nan sayo tuntuih nyato bakeh angku
Iyo lah rundiang nan sado itu
Ba'a nan kini nangko
Karano kandak alah buliah
Nan pintak alah balaku

Insya Allah, angku

Sayo suruik kan siriah ka gagang
Sayo kumbalian pinang katampuak
Basimak kan dek angku

Jawek si alek 2 ka si alek 1

Insya Allah
Baliu basamo manyimak kan

Rundiang di kumbalian

Dari si alek 1 ka si pangka

Mano angku
Sayo angku
Ka angku..... rundiang ba kumbalian
Laluan lah angku

Adaik jo syarak sajinjiangan
Dek sakato mako batuah
Kok salisiah kusuik nagari
Rila jo maaf di unjuak kan
Pado tuhan tangan tatadah
Ka angku rundiang kumbali

Arati nyo bana nan ka sayo kumbalian
Mahadok kapado angku
Antaro sayo jo angku
Samisa urang main catua
Duduak di meja pacaturan

Doroang mandoroang langkah gajah
Amaik ma amaik buah catua
Gajah tadoroang kudo masuk
Gajah lah mati sandiri nyo

Tasungkuik sayo di nan laweh
Tapikua sayo di nan barek
Sawajah gayuang manyambuik
Limbago kato ka manjawab
Tatumpah ka diri sayo

Jikok di sayo lah kini tu
Karih tasisik pado pnggang
Padang tasanda pado bahu
Baban lah tibo di kapalo
Sakiro barek ka sayo pikua
Sakiro ringan sayo jinjiang

Tapi samantang pun baitu
Antaro sayo jo angku
Bakaji malang jo mujua
Jikok di kaji kamujuran nyo
Lai tasungkuik bak manjalo
Lai tatampuah di ruang nyo

Jikok di kaji banamo malang
Indak tasungkuik bak manjalo
Indak tatampuang di ruang nyo
Ikan tarayun jalo putuih
Manggulang ameh di sapuah

Kok panjang parundiangan angku
Singkek di sayo ka bari nyo
Pulang ma alum pado angku ...

Jawek si pangka ka si alek 1

Lah sampai di angku
Sakiro alah angku
Ka angku lai
Laluan lah angku

Cucua ka bumi tampak nyato
Mamutiah bungo kambing api
Elok di singa paneh patang
Nyampang sukatan kok nyo ampo
Salam jo simpuah pamanuahi
Jo bana angku sayo jalang

Arati nyo nan jadi bana di angku...
Mahadok kapado sayo
Antaro sayo jo angku

Samisa urang main catua
Duduak di meja pacaturan

Doroang mandoroang langkah gajah
Amaik ma amaik buah catua
Gajah tadoroang kudo masuak
Gajah lah mati sandiri nyo

Tasungkuik angku... di nan laweh
Sawajah gayuang manyambuik
Limbago kato ka manjawab
Tatumpah ka diri angku

Jikok di angku lah kini tu
Karih tasisik pado pnggang
Padang tasanda pado bahu
Baban lah tibo di kapalo

Sakiro barek ka angku ... pikua
Sakiro ringan angku ... jinjiang
Tapi samantang pun baitu
Antaro sayo jo angku

Jikok di kaji kamujuran nyo
Lai bapucuak aka budi
Lai manjulai kiro kiro
Lai tasungkuik bak manjalo

Jikok di kaji kamalangan nyo
Indak bapucuak aka budi
Indak manjulai kiro kiro
Indak tasungkuik bak manjalo
Ikan tarayun jalo putuih

Kok panjang parundiangan sayo
Singkek di angku ka bari nyo
Pulang ma alum pado sayo
Bana baitu rundiang angku

..... Iyo bana

Di bana angku ... nan katangah
Lah dalam barih jo balabeh
Di kanduang adat jo limbago
Alah dalam cupak jo gantang

Hanyo harapan dari sayo
Antaro sayo jo angku
Tantangan labiah jo kurang
Singkek di ambiak kabalabeh
Panjang di ambiak ka ukuran
Samo kito pakai sajo kaduo nyo
Alah ka sanang hati angku

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Di bunyi nan sayo danga
Di rupo nan sayo pandang
Singkek di ambiak ka ukuran
Panjang di ambiak ka balabeh
Samo di pakai kaduo nyo
Kan bana baitu rundiang angku...

..... iyo bana

Insya Allah angku
Kandak buliah pintak balaku
Sayo kumbalian
Basimakan di angku

Jawek si pangka ka si alek 1

Insya Allah
Di simakan baliu nan basamo

Dari si alek 1 ka si pangka

Mano angku
Sayo angku
Ka angku rundiang ba tiboan
Laluan lah angku

Tasabuik tanjuang nan ampek
Lubuak nan tigo alah tantu
Ganggaman parpatiah nan sabatang
Jo salam tangan sayo angkek
Rila jo maaf ka pangulu
Jo bana angku sayo jalang

Arati nyo bana nan ka sayo kumbalian
Mahado kapado angku
Pado wakatu iko kini

Mahukum di ateh kato
Manyiang tampek nan tumbuah
Manimbang tampek nan ado
Tumbuah sarupo iko kini

Habih hari baganti hari
Habih pakan baganti bulan
Habih bulan tahun batuka
Adat bapakai salamo nyo

Dek capek janang manatiang
Manatiang cawan jo pinggan
Mahanta ka ruang tengah
Tibo di muko nan basamo
Babagai rupo isi piriang
Banamo ragam bungo adaik

Kilek baliauang lah ka kaki
Kilek camin alah ka muko
Umpamo kayu di banaman
Rasuak palanca alah cukuik
Barih balabeh lah takanak

Ukua jo jangko lah sasuai
Tingga di tukang bakarajo
Kilek jo bayang kito pakai
Sakitu sajo parundiangan
Di harok bunyi nak kumbali
Pulang ma'alum pado sayo
Bana baitu rundiang angku

..... Iyo bana

Nan jadi bana di angku tadi
Nan talimpah kapado sayo
Jikok di sayo lah tadi tu
Sakiro gayuang baru nan basambuik
Sakiro kato baru nan bajawek

Ba'a nan kini nangko
Karano ayam lai barinduak
Nan siriah lai bajunjuang
Di kandak nan ka mambari
Di pintak nan ka mampalakuan

Sayo sangkuik kan ka nan tinggi
Sayo sandakan ka nan gadang
Mananti angku samantaro
Pulang ma alum pado angku ...

Jawek si pangka ka si alek 1

Lah sampai di angku
Sakiro alah angku
Ka angku lai
Laluan lah angku

Ka ilia saranguah dayuang
Kamudiak sa antak galah
Kato pitua nan tajali
Sayo angkek tangan di anjuang
Pado tuhan tangan tatadah
Ka angku rundiang kumbali

Arati nyo nan jadi bana di angku.....
Mahadok kapado sayo
Sakiro gayuang baru nan basambuik
Sakiro kato baru nan bajawek

Ba'a nan kini nangko
Gantiang putuih biang nak tabuak
Nan siriah lai bajunjuang
Karano ayam lai barinduak

Di kandak nan ka mambari
Di pintak nan ka mampalakuan
Sayo sangkuik kan ka nan tinggi
Sayo sandakan ka nan gadang

Antaro sayo jo angku
Rundiang di simpan dalam barih
Kato di simpan jo mufakaik
Mananti angku samantaro
Bana baitu kato angku

..... Iyo bana

Di kabanaran angku nan katangah
Karano lah jalan adat nan bapakai
Mahawai nak sapanjang tangan
Mangaruak nak sahabih sauang

Silang tak ado ka pa amfang
Patuik tak ado ka pa ungkai
Insya Allah sayo nanti

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Warih nan dari bundo kanduang
Nyato pakaian tigo luak
Lukisan adat nan usali
Pusako dari niniak moyang
Jo salam rundiang sayo anjuang
Rila jo maaf sayo pintak
Langkah kok panjang pado kaki
Jo bana angku sayo jalang

Di bunyi nan sayo danga
Di rupo nan sayo pandang
Di hadapan baliau nan basamo

Sapihak rundiang angku... tadi
Karano lah adaik ka bapakai
Mahawai nak sapanjang tangan
Mangaruak nak sahabih sauang
Angku lapeh biduak nak balayia
Pelang mananti di muaro
Kan bana baitu rundiang angku

..... Iyo bana

Di kabanaran angku nan katangah
Nan sayo tuntuik ka hadapan angku...
Iyolah rundiang nan sado itu
Karano kandak buliah pintak balaku
Sayo laluan angku

Jawek si pangka ka si alek 1

Insya Allah sayo nanti

Dari si alek 1 ka si alek ka 4 atau pangulu

Mano angku
Sayo angku
Ka angku ... rundiang ba tiboan
Laluan lah angku

Sa ujuik salam jo simpuah
Sabarek bungka nan piawai
Nareco luruih main daun
Di dalam sidang karapatan
Sayo susun jari nan sapuluah
Nyampang tak tapek buah andai
Ka tuhan sayo mintak ampun
Rundiang ka angku batiboan

Arati nyo rundiang nan ka sayo tiboan
Mahadok kapado angku
Sapihak parundiangan sayo tadi
Jo diri silang nan bapangka

Sakiro jajak baru nan batikam
Batang baru nan sayo titih
Nan kandak alun lai babari
Pintak alun bapalakuan

Ba' a nan kini nangko
Di kandak nan kamambari
Di pintak nan ka mampalakuan
Di ma katumbuah ibaraik bijo
Di ma katabik umpamo padi

Iko lah bana sayo tibokan
Mahadok kapado angku
Pulang ma alum pado angku

Jawek si alek 4 ka si alek 1

Lah sampai di angku
Sakiro alah angku
Ka angku lai
Laluan lah angku

Nan tuo luak tanah data
Nan bunsu luak limo puluhan
Luak agam luak nan tengah
Jadi pusako ranah minang
Bintiak jo ragi kok batuka
Sayo susun jari nan sapuluah
Pado tuhan sayo manyambah
Jo bana angku sayo jalang

Arati nyo nan jadi bana di angku...
Jo diri silang nan bapangka
Sakiro jajak baru nan batikam
Sakiro batang baru nan batitih
Nan kandak alun babari

Ba'a nan kini nangko
Di kandak nan kamambari
Di pintak nan ka mampalakuan
Iko lah bana nan batiboan pado sayo
Bana baitu kato angku

..... Iyo bana

Di kabanaran angku..... nan katangah
Lah dalam barih jo balabeh
Di lingkuang cupak jo gantang
Tapi samantang pun baitu
Sapihak kapado diri sayo

Sayo tabang kayu sabatang
Sayo karek ujuang jo pangka
Di sisiak dahan jo rantiang
Sayo ambiak di tengah tangah

Kok lai dapek ka tonggak tuo
Samantaro sayo batenggang
Mananti angku dalam adat
Pulang ma alum pado angku ...

Jawel si alek 1 ka si alek 4

Lah sampai di angku
Sakiro alah angku
Ka angku lai
Laluan lah angku

Adaik mancupak lah di papek
Nan sapadi bapantang luak
Baitu adaik ranah minang
Jo salam tangan sayo angkek
Rila jo maaf sayo mintak
Jo bana angku sayo jalang

Arati nyo nan jadi bana di angku...
Mahadok kapado sayo
Sapihak ka diri angku
Nak manabang batuang sabatang
Bakarek ujuang jo pangka

Ba sisiak buku jo rantiang
Angku ambiak di tengah tengah
Hanyo sakiro nan paguno

Samantaro angku batenggang
Mananti sayo dalam adaik
Pulang ma alum pado sayo
Bana baitu rundiang angku

.....Iyo bana

Di bana angku ... nan katangah
Lah dalam barih jo balabeh
Di lingkuang adaik jo pusako

Bana nyo di bao lalu
Lalu nyo di kaji nan sado itu
Insya Allah, sayo nanti angku...

Jawek si alek 4 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah kamat wakatu habih
Elok lah rundiang di simpani
Rila jo maaf sayo mntak
Basicapek sayo jo angku

Lalu nyo di kaji basicapek
Di bunyi nan sayo danga
Di rupo nan sayo pandang
Dek angku urang pamurah
Capek babari kandak sayo

Ba'a nan kini nangko
Dek kandak alah buliah
Nan pintak alah balaku
Insya Allah, sayo laluan

Jawel si alek 1 ka si alek 4

Insya Allah sayo nanti

Ket : mencari kato baiyo antaro si alek 4 jo si alek 5 dll.
Sasudah baiyo kato di kumbalian
Contoh nyo indak kito buek

Rundiang ba kumbalian

Dari si alek 4 ka si alek 1

Lah sampai di angku
Sayo angku
Ka angku rundiang ba kumbalian
Laluan lah angku

Kain palakaik unduang unduang
Salendang sutan ka kualo
Basah di timpo hujan pagi
Jo salam rundiang sayo anjuang
Gawa jo khilaf kok basuo
Ka angku rundiang kumbali

Arati nyo bana nan ka sayo kumbalian
Mahadok kapado angku
Sapihak parundiangan kito tadi
Tinggi batang lambek ka jatuah
Jauah bajalan lamo babaliak
Tarago sayo dek batenggang
Mancari kato nan saiyo
Isi nyo rundiang nan sa ukua
Tantangan kandak ka mambari
Di pintak nan ka mampalakuan
Tatumpah juo ka diri sayo

Jikok di sayo lah tu kini
Babulek kan aia ka pambuluah
Ba himpun kato ka mufakaik

Bakandak kami ka angku
Jan ayam sikua duo dabiliah nyo
Apo nan tacoreang tabarih dek angku..
Kami basamo lah dalam itu
Pulang ma alum pado angku

Jawek si alek 1 ka si alek 4

Lah sampai di angku
Sakiro alah angku
Ka angku lai
Laluan lah angku
Di timbang tujuan kato
Dalam sari'aik nan bapakai
Lah dalam bungka jo taraju
Ujuik rundiang nampak mambayang
Hakikaik paham alah samo
Lahia jo batin tak batikai
Barilah maaf dek pangulu
Jo bana angku sayo jalang

Arati nyo nan jadi bana di angku.....
Di bunyi nan sayo danga
Di rupo nan sayo pandang
Di hadapan baliau nan basamo
Jan ayam sikua duo dabiah nyo

Apo nan tacoreang tabarih dek sayo
Angku alah di dalam itu
Jo mufakaik angku samoi
Kan bana baitu rundiang angku...
..... Iyo bana

Di bana angku ... nan katangah
Lah di dalam barih jo balabeh
Di lingkuang adat jo pusako
Bana nyo di bao lalu
Lalu nyo di kaji nan sado itu
Insya Allah, angku
Di agiah kandak pihak si pangka

Tapi karano kaki ka malangkah
Di tangan nan ka tajambo
Alam nan basipaik gawa
Manusia basipaik khilaf
Pulang ma alum pado angku.....

Jawek si alek 4 ka si alek 1

Lah sampai di angku
Sakiro alah angku
Ka angku lai
Laluan lah angku

Nyato tinggi batang baringin
Nan tumbuah di pintu koto
Rabah nyo ka tapi jalan
Nak suci lahia jo batin
Barilah maaf badan sayo
Ka angku ... rundiang ba tiboan

Arati nyo nan jadi bana di angku.....
Mahadok kapado sayo
Karano kaki ka malangkah
Di tangan nan ka tajambo

Alam nan basipaik gawa
Manusia basipaik khilaf
Di harok bunyi nak kumbali
Pulang ma alum pado sayo
Bana baitu rundiang angku

..... Iyo bana

Di kabanaran angku nan katangah
Di hadapan baliu nan basamo
Takilek bagai padoman
Tabayang umpamo paneh

Insya Allah angku
Karano baliu lai basamo
Indak ka bapabia tagamang angku...
Alah ka sanang hati angku

Jawek si alek 1 ka si alek 4

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Di bunyi nan sayo danga
Di rupo nan sayo pandang
Di hadapan baliau nan basamo

Hujan labek suluah kok padam
Lai banyak senter panarangi
Pulang ma alum pado sayo
Kan bana baitu rundiang angku...

..... iyo bana
Ba'a nan kini nangko
Karano kandak alah buliah
Nan pintak lai balaku
Sayo kumbalian ka asa nyo angku ...
Basimak kan di angku

Jawek si alek 4 ka si alek 1

Insya Allah
Di simak kan baliau nan basamo

Rundiang ba kumbalian

Dari si alek 1 ka si pangka

Mano angku
Sayo angku

Ka angku ... rundiang ba kumbalian
Laluan lah angku

Pikia nan palito hati
Nanang nan baribu aka
Aniang itu hulu bicaro
Sampi kini jadi padoman
Langkah kok panjang pado kaki
Bintiak jo ragi kok batuka
Barilah maaf badan sayo
Ka angku bana batiboan

Arati nyo nan jadi bana di sayo
Mahadok kapado angku
Pihak parundiangan kito tadi
Tarago sayo bausaho

Manyanguik kan nan tinggi
Manyandakan ka nan gadang
Jikok di sayo lah tadi tu
Dek yakin hati ka dapek
Pangana indak bacabang
Nan jadi bana di angku tadi
Pihak hidangan nan katangah
Lah tibo di muko nan basamo
Basusun di ruang tengah

Nan harum samo di singkok
Nan boneh samo kito kubiak
Pulang ma alum pado sayo
Di harok bunyi nak kumbali
Bana baitu rundiang angku

..... iyo bana

Nan jadi bana di angku tadi
Nan kajadi jawek nyo dekam kami basamo
Samisa jo bak hujan turun
Asah lai samo di raok nyo

Di elo ujuang pangka baroyak
Di garik pangka ujuang tabao
Sakitu sajo parundiangan
Pulang ma alum pado angku

Jawek si pangka ka si alek 1

Lah sampai di angku
Sakiro alah angku
Ka angku lai
Laluan lah angku

Nan senjang makanan papek
Nan sayuik samo di uleh
Nan senteang makanan bilai
Jo maaf rundiang sayo ankek
Tutua sayo kok tak tabateh
Jo maaf rundiang di pasampai

Di bunyi nan sayo danga
Di rupo nan sayo pandang
Di hadapan baliau nan basamo
Sapihak rundiangan kito tadi
Tarago angku basahho
Manyanguik kan ka nan tinggi
Manyandakan ka nan gadang
Jikok di angku lah tadi tu

Alah basanguik kan ka nan tinggi
Basandakan ka nan gadang
Buah jo bari dek baliau
Samisa bak hujan turun

Asah lai samo di raok nyo
Di elo ujuang pangka baroyak
Di garik pangka ujuang tabao
Bana baitu kato angku

..... Iyo bana

Di kabanaran angku nan katangah
Lah dalam barih jo balabeh
Di kandung adaik jo limbago
Bana nyo di bao lalu

Lalu nyo di kaji nan sado itu
Di ateh duduak nan sa amparan
Di tagak nan sapamatang
Dek lah baitu lo manuruik adaik

Mairik karajo jo usaho
Insya Allah, jo bismillah
kami mulai dari pangka
Ba iriangan di angku sakali

Jawek si alek 1 ka si pangka

Insya Allah, angku
Jo bismillah samo kito mulai.

Panyambahan Manjapuik Marapulai

Ket: panyambahan manjapuik marapulai iko, ado nan sarangkai jo panyambahan siriah, ado juo nan indak sarangkai, tapisah panyambahan siriah jo panyambahan manjapuik marapulai, kalau marapulai nan di japuik itu kamanakan kandung dek pangulu di kaum nyo, mako panyambahan siriah nyo buliah nan panjang, kalau urang biaso atau indak kamanakan kontan dek pangulu, mako panyambahan siriah nyo nan singkek sajo

Panyambahan Manjapuik Marapulai

*Ket : urang nan manjapuik di sabuik **si alek 1 ka si pangka 1***

Dari si alek 1 ka si pangka 1

Mano angku
Sayo angku
Ka angku..... rundiang ba tiboan
Laluan lah angku

Alua patuik jalan batampuah
Suri banang tuladaan kain
Cupak panuah pusako tatap
Manuruik barih cupak gantang
Gantang tatap sukatan panuah
Bungka sabunci tak bamain
Rila jo ma'af sayo mintak
Jo bana angku sayo jalang

Ado pun rundiang nan sayo tiboan
Mahadok pado angku
Pado wakatu kini nangko

Ma ukua di ateh kayu
Mahukum di ateh kato
Kalau basiang di nan tumbuhan
Jikok manimbang di nan ado
Tumbuhan sarupo iko kini

Takalo adaik ka badiri
Mulo limbago ka di tuang
Awa nyo adaik ka di pakai
Alah sudah cupak jo gantang

Habih hari baganti pakan
Habih pakan ba bilang bulan
Habih bulan tahun batuka
Adaik bapakai salamo nyo

Pado wakatu iko kini
Aluran badan diri kami
Ba himpun kato ka mufakaik
Alah bulek mangko di giliang
Lah pipiah mangko di layangan

Mulo satapak turun tanggo
Sajak salangkah turun janjang

Kami di lapeh niniak mamak
Sarato alim jo ulama
Suruahan ayah jo bundo
Mambao kato jo buatan
Labuah nan goloang kami tampuah
Jalan nan pasa kami turuik
Padan ba ukua ba tapati
Dalam janji kami lah tibo

Buah mungkasuik cinto hati
Isi nyo paham kandak bana
Kami manjapuik marapulai

Sarato andan pasumandan
Langkok jo tuo jo pangiriang

Angku ma anta nak nyo sampai
Turun di rumah tanggo iko
Naiak ka rumah tanggo kami

Limbak nan dari pado itu
Bajalan babuah batih
Malenggang babuah tangan
Adaik limbago sayo bao
Banamo ragam bungo adaik

Mintak di liek di pareso
Aluran barih nak bapaek
Aluran takuak nak batabang
Nak samo tibo di tampek nyo

Itu nyo rundiang nan katangah
Di harok bunyi nak kumbali
Pintak nak ba palakuan
Limbago kandak nak babari
Pulang ma alum pado angku ...

Jawek si pangka 1 ka si alek 1

Lah sampai di angku
Sakiro alah angku
Ka angku lai
Palalu lah angku

Sikilang jo aia bangih
Pasisia banda sapuluah
Itu lah rantau banamoan
Mamaek kok indak tantang barih
Sayo susun jari nan sapuluah
Bana ka angku ba tiboan

Na jadi bana di angku tadi
Mahadok kapado sayo
Di duduak nan sa amparan
Di ateh andak alai nyo
Tibo gayuang takanak sambuik

Datang kato badiri jawab

Tapi samantang pun baitu
Jikok di sayo lah tu kini
Nak ba pakai pitua adaik
Kato surang sayo bulati
Kato basamo ba paiyokan

Ba alah nan kini nangko
Sayo ambiak duduak baiyo
Tagak bakato jo bamo lah
Rundiang jo angku... di latak kan
Kato di simpan jo mupakaik

Samantaro sayo barundiang
Mancari bana nan sa ukua
Isi nyo rundiang nan saiyo
Mananti angku samantaro
Pulang ma alum pado angku ...

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Kok hanyo rundiang nan mandatang
Nan talimpah di muko rapek
Nan tatumpah ka diri sayo
Rundiang kok ado ba nan sumbang
Rila jo maaf di patapek
Ka angku... rundiang kumbali nyo

Di bunyi nan sayo danga
Di rupo nan sayo pandang
Sapihak ka diri angku

Nak ma ambiak duduak baiyo
Tagak bakato jo bamolah

Isi nyo rundiang nan saiyo
Mananti sayo dalam adaik
Bana baitu rundiang angku

..... Iyo bana

Sapanjang rundiang nan katangah
Lah dalam barih jo balabeh
Manuruik cupak jo gantang
Kurang tak ado ka panukuak
Senteang tak ado ka pambilai

Ba'a nan kini nangko
Dek jalan adaik nan ka bapakai
Insya Allah, angku

Sayo pakai sipaik mananti

Jawek si pangka 1 ka si alek 1

Lah sampai di angku

Sakiro alah angku

Ka angku lai

Laluan lah angku

Daulu kato basitina
Kamudiang rundiang basicapek
Ulah Qamat wakatu habih
Basicapek sayo jo angku

Lalu nyo di kaji ba sicapek

Nan jadi bana di angku tadi

Mahadok kapado sayo

Di bunyi nan sayo danga

Di rupo nan sayo pandang

Di hadapan baliau nan basamo

Dek angku urang pamurah
Kandak sayo capek babari
Nan pintak lai ba palakuan
Manyanang di dalam hati

Insya Allah, angku
Sayo rantang bagai kan tali
Sayo iliakan umpamo aia

Jawek si pangka 1 ka si alek 1

Insya Allah. Sayo nanti

*Ket : baiyo dulu **si pangka 1** jo **pangka 2** sesudah baiyo,
rundiang di kumbalian*

Mancari kato baiyo

Dari si pangka 1 ka si pangka 2

Mano angku
Sayo angku
Ka angku ... rundiang ba tiboan
Laluan lah angku

Cucua ka bumi tampak nyato
Mamutiah bungo kambang api
Elok di singa paneh patang
Nyampang sukatan kok nyo ampo
Salam jo simpuah pamanuahi
Jo bana angku sayo jalang
Arati nyo rundiang nan sayo tiboan
Mahadok kapado angku
Pado sabanta iko tadi

Lah tibo parundiangan dari si alek
Kapado kito silang nan bapangka
Jumlah karajo nan bajunjuang

Buah rundiang baliau nantun
Bisiak lah samo ka danganan
Jikok imbau alah talampau
Di hadapan kito nan basamo

Jikok di sayo lah tadi tu
Nan jajak alun batikam

Nan batang alun batitih
Nan kandak alun babari
Pintak nan alun ba palakuan

Ba'a nan kini nangko
Di kandak nan ka mambari
Di pintak nan ka mampalakuan

Di ma ka tumbuah ibaraik bijo
Di ma katabik nan bak padi
Iko lah bana sayo tiboan
Mahadok kapado angku
Pulang ma alum pado angku ...

Jawek : si pangka 2 ka si pangka 1

Lah sampai di angku
Sakiro alah angku
Ka angku lai
Palalu lah angku

Ninik moyang punyo pitua
Sampai kini jadi padoman
Jadi pakaian rang di minang
Adaik bakato ba sitina
Rila jo maaf di puhun kan
Jo bana angku sayo jalang

Arati nyo bana di angku ... tadi
Mahadok kapado sayo
Di ateh duduak nan sa amparan
Di tagak nan sapamatang

Pado sabanta iko tadi
Lah tibo parundiangan dari si alek
Kapado kito silang nan bapangka
Jumlah karajo nan bajunjuang

Buah rundiang baliau nantun
Bisiak lah samo kadangaran

Jikok imbau alah talampau
Di hadapan kito nan basamo

Sapihak ka diri angku
Ka ba anjak anjak bak manuga
Baganjua suruik bak batanam
Ba'a ka baiak ka elok nyo
Pulang ma alum pado sayo
Bana baitu kato angku

..... Iyo bana

Kabananan angku nan katangah
Lah dalam barih jo balabeh
Di kanduang adat jo pusako
Bana nyo di bao lalu
Lalu nyo di kaji nan sado itu

Sapihak ka diri sayo
Bukik nan tinggi nak di daki
Lurah dalam nak di turuni
Alam nan leba nak ba pandang
Mancari gandang ka paningkah
Isi nyo talempong ka panalun

Lai koh adat nan baitu
Nyato pusako nan bak kian
Antaro kito jo angku
Bana di simpan jo mufakaik
Rundiang di latak dalam barih
Pulang ma alum pado angku ...

Jawek : si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Kok di tiliak padoman alua

Tabayang mungkin jo patuik
Nareco kato lah di timbang
Kok untuang rundiang jan basaua
Kok kalu lidah dek manyabuik
Jo bana angku sayo jalang

Nan jadi bana di angku tadi
Mahadok kapado sayo
Ka ba jombo jombo bak basiang
Ba ganjua suruik bak batanam
Ba baliak baliak bak mamanggang

Lai koh adat nan baitu
Nyato pusako nan bak kian
Pulang ma lum pado sayo
Bana baitu rundiang angku

..... Iyo bana

Di bana angku nan ka tangah
Lah dalam barih jo balabeh
Di lingkuang adaik jo pusako
Kurang tak ado ka panukuak
Senteang tak ado ka pambilai
Bana nyo di bao lalu

Lalu nyo di kaji nan sado itu
Nan rajo kato mufakaik
Nan bana kato saiyo
Rancak batenggang pado adaik
Alah pakaian bana di pangulu
Saba mananti malah sayo

Jawek : si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Di bunyi nan sayo danga
Di rupo nan sayo pandang
Elok batenggang pado adaik
Sabab pakaian di pangulu
Kan bana baitu rundiang angku.....

..... iyo bana

Nan sayo tuntuik bakeh angku.....
Iyo lah rundiang nan sado itu
Dek angku urang pamurah
Capek ba agiah kandak sayo

Insya Allah, angku

Sayo lengoangan suok jo kida
Mananti angku

Jawek : si pangka 1 ka si pangka 2

Insya Allah sayo nanti

*Ket : musti nyo baiyo dulu **si pangka 2** jo **si pangka 3** dll
tapi contoh baiyo **si pangka 2** jo **si pangka 3** indak di
buek kito anggap salasai, mako rundiang di
kumbalian*

Rundiang di kumbalian

Dari si pangka 2 ka si pangka 1

Mano angku

Sayo angku.....

Ka angku rundiang di kumbalian

Laluan lah angku

Barakik rakik ka hulu
Baranang ranang ka tapi
Samo di ambiak ka padoman
Rundiang kok ado ba nan ragu
Bari maaf manyusun jari
Bana ka angku ba tiboan

Arati nyo nan jadi bana di sayo
Ba kumbalian kapado angku ...
Antaro sayo jo angku
Panek nan bakeh baranti
Patang nan bakeh ba malam
Tarago sayo duduak baiyo
Tagak bakato jo ba molah

Jikok di sayo lah tadi tu
Duduak kato ba pa iyokan
Tagak kato ba pamolahan
Mancari bulek nan sagiliang
Mancari pipiah nan salayang

Dek yakin hati ka dapek
Pangana indak bacabang
Duduak kato ba pa iyokan
Tagak kato ba pamolahan
Dapek lah bulek nan sagiliang
Basuo pipiah nan salayang
Bahimpun kato ka mupakaik

Manyuruikan sirih ka gagang
Mangumbalian pinang ka tampuak
Nak di angku tarabik nyo
Pulang ma alum pado angku ...

Jawek si pangka 1 ka si pangka 2

Lah sampai di angku
Sakiro alah angku
Ka angku lai

Laluan lah angku

Adaik limbago hutang tumbuah
Dalam undang tasabuik juo
Ameh samato tahan uji
Sayo susun jari nan sapuluah
Gawa jo khilaf kok basuo
Ka angku rundiang kumbali

Nan jadi bana dek angku ... tadi
Mahadok kapado sayo
Di ateh duduak nan sa amparan
Di tagak nan sapamatang

Antaro sayo jo angku
Panek nan bakeh baranti
Patang nan bakeh bamalam
Tarago angku duduak baiyo
Tagak bakato jo bamolah
Jikok di angku lah tadi tu
Duduak kato ba paiyokan
Tagak kato ba pamolahan
Lah dapek bulek nan sa giliang
Basuo picak nan salayang
Bahimpun rundiang ka mufakaik

Manyuruikan siriah ka gagang nyo
Mangumbalian pinang katampuak
Mamintak bunyi dari sayo
Bana baitu kato angku

..... Iyo bana

Di kabanaran angku nan katangah
Rimbun bak bungo ka cubuang
Rampak bak bungo kalikih
Lah dalam barih jo balabeh
Di lingkuang adat jo limbago
Tapi samantang pun baitu

Nan jadi bana di sayo
Mahadok kapado angku
Nak balega siang jo malam
Nak baganti patang jo pagi

Manyuruik kan siriah ka gagang
Mangumbalian pinang ka tampuak
Elok nak bunyi dari angku
Pulang ma alum pado angku ...

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Loroang di rundiang nan lah tibo
Takilek bagai caramin
Mambayang umpamo paneh
Kandungangan buek lah mambayang
Batang lah tampak tasanda nyo
Nak samo suci lahia batin
Rila jo maaf di pakameh
Jo bana angku sayo jalang

Nan jadi bana di angku tadi
Mahadok kapado sayo
Nak balega siang jo malam
Nak baganti patang jo pagi
Manyuruik kan siriah ka gagang
Mangumbalian pinang ka tampuak
Elok nak bunyi dari sayo
Pulang ma alum pado sayo
Bana baitu rndiang angku

..... Iyo bana

Di bana angku nan katangah
Tatumpah ka diri sayo

Lah dalam barih jo balabeh
Di lingkuang cupak jo gantang
Lah nyato adaik nan bapakai

Tapi samantang pun baitu
Nan jadi bana di sayo
Mahadok kapado angku
Aluran badan diri sayo

Lah sapantun jo gariang buto
Di hulu lukah rang tahan
Di baruah tikalak makan
Marapuang si rambang lakek
Mambanam tubo ta puok

Jalo suto ma ideh sisiak
Di tengah jariang babega
Agak sulik aka batenggang
Angku lah mambukak kapalo banda
Jo mufakat sayo samoi
Pulang ma alum pado angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Kok di agak tujuan kato
Nyato taraju tak ba paliang
Dalam sari'aik nan ba pakai
Bana nareco bayang adaik
Manuruik barih cupak gantang
Cupak lah tarang samato
Ibaraik bulek tak ba sandiang
Limbago nan sayuik kito bilai
Dalam sari'aik jo hakikaik
Jo bana angku sayo jalang

Arati nyo nan jadi bana di angku...
Mahadok kapado sayo
Aluran rundiang diri sayo
Nak nyato ba bunta adaik
Tantu di lipek jo limbago

Adaik nyo panggang ka babaliak
Nak tau masak matah nyo
Adaik nyo kato ka barulak
Nak tau asa mulo jadi
Nak tau rancak nyo bijo
Di samayan basahan baniah

Aluran gayuang ka manyambuik
Isi nyo kato ka manjawab
Rancak di angku tarabik nyo
Jo mufakaik angku samoi
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku...
Mahadok kapado sayo
Elok bak paneh sudah hujan
Bagai gunuang tarangkek kabuik
Tarang dek kito nan basamo

Antaro sayo jo angku
Kaba unyuik unyuik indak patuiah
Ka bapilin pilin indak sariang
Indak lah banamo patuik
Tuah ka samo kito cari
Malu ka samo kito japuik

Ba'a nan kini nangko
Insyallah, angku

Siriah di suruik kan ka gagang nyo
Pinang di kumbalian ka tampuak nyo

Tapi samantang pun baitu
Nan jadi bana di sayo
Mahadok kapado angku

Karano kaki ka talangkah
Nan tangan ka tajambo
Alam nan basifaik gawa
Manusia basifaik khilaf
Ikek jatuhah baju baluluak

Kok tasuo di kaji nan sado itu
Kok sasek mintak di sapo
Kok toderoang mintak di sintak
Sipi nak mintak di katangah kan
Pulang ma alum pado angku ...

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku
Nan sulik hanyuik ka hulu
Kalau bacupak di nan data
Baitu warih cupak gantang
Bari maaf sayo dek pangulu
Kato kok indak di nan bana
Jo bana angku sayo jalang

Di bunyi nan sayo danga
Di rupo nan sayo pandang
Di hadapan baliau nan basamo
Sapihak ka diri angku
Karano kaki ka talangkah
Nan tangan lah ka tajambo

Alam nan basifat gawa
Manusia basifat khilaf
Ikek jatuhah baju baluluak
Kok kurang mintak di tukuak

Kok senteang mintak di bilai
Bana baitu kato angku

..... Iyo bana

Arati nyo nan jadi bana di angku...
Mahadok kapado sayo
Lah dalam barih jo balabeh
Di kanduang adaik jo pusako

Karano baliu lai rapek duduak di siko
Indak ka bapabia tagamang angku do
Alah ka sanang hati angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Kato dauu basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Lalu nyo di kaji ba sicapek
Di bunyi nan sayo danga
Di rupo nan sayo pandang
Kok sasek lai ka basapo
Tadoroang lai ka basintak

Nan sayo tuntuik nyato bakeh angku
Iyo lah rundiang nan sado itu
Ba'a nan kini nangko
Karano kandak alah buliah
Nan pintak alah balaku

Insya Allah, angku
Sayo suruik kan siriah ka gagang
Sayo kumbalian pinang katampuak
Basimak kan dek angku

Jawek si pangka 2 ka si pangka 1

Insya Allah
Baliau basamo manyimak kan

Rundiang ba kumbalian

Dari si pangka 1 ka si alek 1

Mano angku
Sayo angku
Ka angku rundiang kumbali
Laluan lah angku

Tantangan sambah jo manyambah
Kok kurang taratik jo mujilih
Kok kurang lelo jo sopan
Dek cameh sumangek hilang
Sambah manyambah kapado Allah
Kok talipua sayo di barih
Maaf ka angku di puhunkan
Jo bana angku sayo jalang

Arati nyo bana nan ka di kumbalian
Mahadok kapado angku
Pihak parundiangan kito tadi
Nan talatak nan tasimpan
Talatak di dalam barih
Tasimpan dalam mufakaik

Antaro sayo jo angku
Lah bak umpamo rang bacatua
Duduak di meja pacaturan
Doroang mandoroang langkah gajah
Dongkak mandongkak langkah kudo

Amaik ma amaik buah catua
Gajah tadoroang kudo masuk
Rajo lah mati sandiri nyo

Bagaluik banang ka sikoci
Punta nan padek bak di simpai
Santuang nan indak lalu angin
Sawajah gayuang manyambuik
Limbago kato ka manjawab
Tatumpah ka diri sayo
Jikok di sayo lah kini tu
Karih tasisik pado pinggang
Padang tasanda pado bahu
Baban lah tibo di kapalo

Barek raso nyo ka bapikua
Ringan raso nyo ka bajinjiang
Barek tak mungkin di geleangan
Ringan tak mungkin di tinggakan
Tapi samantang pun baitu
Antaro sayo jo angku

Bakaji malang jo mujua
Rundiang sayo nan katangah
Lai taracak di limbago
Lai ta tonggok di pusako
Kok manabang lai di pangka
Manjuluak lai tantang buah
Tapuji baiak di nan rami

Jikok di kaji kamalangan nyo
Indak taracak di limbago
Indak tatonggok di pusako
Manabang indak di pangka
Manjuluak indak tantang buah
Tacemo sayo di nan rami

Kok tasuo nan sado itu
Iko lah bana nan sayo tiboan
Mahadok kapado angku

Tinggi batang lambek ka jatuah
Kok panjang parundiangan angku ...
Singkek di sayo ka bari nyo
Pulang ma alum pado angku ...

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Lubuak nan tigo alah tantu
Bahagian lareh caniago
Ganggaman parpatiah nan sabatang
Rundiang kok ado ba nan ragu
Rila jo maaf dari sayo
Jo bana angku sayo jalang

Arati nyo nan jadi bana di angku.....
Mahadok kapado sayo
Antaro angku jo sayo
Putuiah tak kunjuang ta hubuang
Tingga tak kunjuang tajapuik

Singkek tak kunjuang ta uleh
Tarago maninjau lurah jo gunuang
Mancaliak taluak nan baliku
Maliek pulau nan bajorok
Dek taluak liku baliku
Dek pulau jorok bajorok
Dek jalan simpang basapiah
Talayang sampan ka tengah
Tasanda tibo di karang

Sampan tasauah lah tapauik
Kato tak dapek lah tapikia
Pikia nan palito hati
Nanang nan baribu aka

Aniang itu hulu bicaro

Sadang tananang bana datang
Paham tibo aka baranti
Kato lah putuih sandiri nyo

Bagaluik banang ka sikuci
Punta nan padek bak di simpai
Santuang nan indak lalu angin
Sawajah gayuang manyambuik
Limbago kato manjawab
Tatumpah ka diri angku

Jikok di angku lah kini tu
Sabalun gayuang basambuik
Limbago kato bajawab
Antaro sayo jo angku

Bakaji malang jo mujua
Jikok di kaji kamujuran nyo
Lai taracak di limbago
Lai ta tonggok di pusako

Kok manabang lai di pangka
Manjuluak lai tantang buah
Lai di barih paek makan
Tapuji angku di nan rami

Jikok di kaji kamalangan nyo
Indak taracak di limbago
Indak tatonggok di pusako
Manabang indak di pangka
Manjuluak indak tantang buah

Indak di barih paek makan
Indak di takuak tabang tibo
Hino tumbuah cacian datang
Tacemo sayo di nan rami

Iko lah bana dari angku
Tinggi batang lambek ka jatuh
Kok panjang parundiangan sayo
Singkek di angku ka bari nyo

Lai koh adaik nan baitu
Nyato pusako nan bak kian
Pulang ma alum pado sayo
Bana baitu rundiang angku

..... iyo bana

Di bana angku ... nan katangah
Lah dalam barih jo balabeh
Di lingkuang adaik jo pusako
Bana nyo di bao lalu
Lalu nyo di kaji nan sado itu
Antaro sayo jo angku

Tinggi batang lambek ka jatuh
Jauah bajalan lamo babaliak
Kok talambek angku babaliak
Sayo bari suko jo rila

Tantangan panjang jo singkek
Singkek di ambiak ka ukuran
Panjang di ambiak ka balabeh
Samo di pakai kaduo nyo
Pulang ma alum pado angku ...

Iawek si pangka 1 ka si alek 1

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Di bana angku ... nan katangah
Di bunyi nan sayo danga

Di rupo nan sayo pandang
Di hadapan baliu nan basamo
Tantangan lamo jo lambek
Angku bari suko jo rila

Kok hanyo panjang jo singkek
Singkek di ambiak ka ukuran
Panjang di ambiak ka balabeh
Samo di pakai kaduo nyo
Kan bana baitu rundiang angku

..... iyo bana

Nan sayo tuntui kahadapan angku ...
Iyo lah rundiang nan sado itu
Dek angku urang pamurah
Nan kandak capek babari
Pintak lai ba palakuan

Insya Allah, angku
Sayo ulangan bagulambek
Basimak kan dekan angku

Jawek si alek 1 ka si pangka 1

Insya Allah, angku
Baliu basamo manyimak kan

Rundiang ba kumbalian

Dari si pangka 1 ka si alek 1

Mano angku
Sayo angku
Ka angku... rundiang di kumbalian
Laluan lah angku

Adaik kato mahadang bana
Kamudian rundiang basicapek
Ulah kamat wakatu habih

Hari nan elok jan tabuang
Bintiak jo ragi jan batuka
Jo maaf rundiang sayo angkek
Indak sayo malipua barih
Jo bana angku sayo jalang

Arati nyo bana nan ka sayo tiboan
Mahadok kapado sayo
Ma ukua di ateh kayu
Ma hukum di ateh kato
Manyiang tampek nan tumbuah
Tumbuah sarupo iko kini

Angku ... di lapeh niniak mamak
Sarato alim jo ulama
Suruahan ayah jo bundo
Mambao kato jo buatan

Labuah nan goloang lah ba tampuah
Jalan nan pasa lah ba turuik
Padan ba ukua batapati
Dalam janji angku lah tibo

Buah mungkasuik cinto hati
Isi nyo paham kandak bana
Angku ... manjapuik marapulai

Sarato andan pasumandan
Langkok jo tuo jo pangiriang
Kami ma anta nak nyo sampai
Turun di rumah tanggo iko
Naiak ka rumah tanggo angku ...

Limbak nan dari pado itu
Adaik limbago angku bao
Langkok jo siriah di carano
Banamo ragam bungo adaik

Mintak di liek di pareso
Aluran barih nak bapaek

Tibo di takuak nak batabang
Nak samo tibo di tampek nyo

Siriah sahalai nak bacabiak
Pinang sadidih nak bagatok
Itu nyo rundiang nan katangah

Di harok bunyi nak kumbali
Nan pintak nak ba palakuan
Limbago kandak nak babari
Pulang ma alum pado sayo
Bana baitu kato angku

..... Iyo bana

Nan jadi bana dek angku

Alah di barih paek makan
Nyato di takuak tabang tibo
Raso mandi di anak sungai
Bagai di kipeh angin lalu
Lah jalan adaik nan ba pakai

Tapi nan jadi bana di sayo
Mahadok kapado angku
Jikok di sayo lah tadi tu

Jajak baru nan batikam
Batang baru nan batitih
Nan kandak alun babari
Pintak alun ba palakuan

Ba'a nan iko kini
Di kandak nan ka mambari
Di pintak nan ka mampalakuan
Karano ayam lai barinduak
Kamanakan nyato ba mamak
Nan anak ba ayah bundo

Sayo sangkuik kan ka nan tinggi
Sayo sandakan bana ka batang nyo

Mananti angku samantaro
Pulang ma alum pado angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Kamudiak balai kamuniang
Kabaruah ka subang anak
Balimo suku di sinan
Rundiang sayo kok tampak sandiang
Rila jo maaf sayo mintak
Ka angku rundiang ba tiboan

Nan jadi bana di angku
Mahadok kapado sayo
Di bunyi nan sayo danga
Di rupo nan sayo pandang
Di hadapan baliau nan basamo

Jikok di angku lah tadi tu
Sakiro batang baru nan batitih
Jajak baru nan batikam
Nan kandak alun babari
Pintak alun ba palakuan

Ba'a nan iko kini
Di kandak nan ka mambari
Di pintak nan ka mampalakuan
Kamanakan nyato ba mamak
Nan anak ba ayah bundo
Angku.. sandakan bana ka batang nyo
Bana baitu rundiang angku

..... iyo bana

Di bana angku nan katangah
Lah dalam barih jo balabeh
Di kanduang adaik jo pusako
Bana nyo di bao lalu
Lalu nyo di kaji nan sado itu

Balayia mahadang pulau
Bajalan mahadang bateh
Malantiang mahadang tampuak
Tantu ka buah alamaik nyo

Buah nan masak nak nyo jatuah
Jan layua di timpo rinyai
Batenggang angku pado adaik
Sayo mananti barito nyo
Pulang ma alum pado angku

Jawek si pangka 1 ka si alek 1

Daulu kato basitina
Dek azan wakatu cupua
Ulah kamat wakatu habih
Elok lah rundiang basicapek
Basicapek sayo jo angku

Di bana angku nan katangah
Bunyi nan samo kito danga
Rupo nan samo kito pandang
Di hadapan baliau nan basamo
Malantiang mahadang tampek
Tantu ka buah alamaik nyo

Buah nan masak nak nyo jatuah
Jan layua di timpo rinai
Batenggang sayo pado adaik
Angku mananti barito nyo
Bana baitu rundiang angku

..... iyo bana

Di bana angku ... nan katangah
Nan sayo tuntuik jahadapan angku...
Iyo lah rundiang nan asdo itu

Ba ato nyo lai kini
Kandak buliah pintak balaku
Insya Allah, angku
Sayo sanda kan ka batang nyo
Sayo sangkuik'an ka nan tinggi
Mananti angku samantaro

Jawek si alek 1 ka si pangka 1

Insya Allah, angku
Sayo mananti barito nyo

Ket : baiyo dulu si pangka 1 jo si pangka 3

Dari si pangka 1 ka si pangka 3

Sungai jambu jo lubuak atan
Camin taruih di koto pili
Dalam tambo acok tasabuik
Jambo kok panjang pado tangan
Salam jo simpuah pamanuahi
Jo bana angku sayo runuik

Arati nyo bana nan ka sayo tiboan
Mahadok kapado angku
Jikok di sayo lah tadi tu
Sakiro jajak baru nan batikam
Hanyo batang baru nan batitih
Nan kandak alun babari
Pintak alun ba palakuan

Ba'a nan iko kini
Di kandak nan ka mambari
Di pintak nan ka mampalakuan

Di ma ka tumbuah ibaraik bijo
Di ma ka tabik umpamo padi
Iko lah bana sayo tiboan
Mahadok kapado angku
Pulang ma alum pado angku ...

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Ujuik andai buah rundiangan
Bapalun paham nan haluih
Dalam lilitan aka budi
Salam indak bajawek tangan
Lahia jo batin jan ba diguih
Ka angku rundiang kumbali

Arati nyo nan bana di angku ...
Mahadok kapado sayo
Di bunyi nan sayo danga
Di rupo nan sayo pandang
Rundiangan jo baliu tadi
Sakiro jajak baru nan batikam
Hanyo batang baru nan batitih
Nan kandak alun babari
Pintak alun ba palakuan

Ba'a nan iko kini
Di kandak nan ka mambari
Di pintak nan ka mampalakuan
Di ma ka tumbuah ibaraik bijo
Di ma ka tabik umpamo padi
Pulang ma alum pado sayo
Kan iyo baitu rundiang angku ...

..... iyo bana

Di bana angku ... nan katangah
Lah dalam barih jo balabeh
Di kandung adaik jo limbago
Bana nyo di bao lalu

Lalu nyo di kaji nan sado itu
Sapihak ka diri sayo
Nak malengoang suok jo kida
Supayo rantak nak sadagam
Bana nyo lenggang nak sarayun
Nak tibo bana di tampek
Mananti angku dalam adaik
Pulang ma alum pado angku ...

Jawek si pangka 1 ka si pangka 2

Daulu kato basitina
Kamudiang rundiang ba sicapek
Ba sicapek sayo jo angku
Kalaluan nyo ba sicapek

Di bunyi nan sayo danga
Di ruponan sayo pandang
Nak ma ambiak duduak baiyo
Tagak bakato jo ba molah
Supayo rantak nak sadagam
Bana nyo lenggang nak sarayun
Nak tibo bana di tampek nyo
Kan bana baitu rundiang angku...
..... iyo bana

Di bana angku ... nan katangah
Kapeh sahalai sayo pacik
Pilinan niniak jo mamak
Jadi buatan ayah bundo

Silang tak ado ka pa ampang
Patuik tak ado ka pa ungkai
Insya Allah, angku

Saba mananti malah sayo

Jawek si pangka 2 ka si pangka 1

Insya Allah, angku
Sayo lengoangan suok jo kida

*Ket : musti nyo baiyo dulu **si pangka 3** jo **si pangka 4** dll
tapi contoh baiyo indak kito buek, di anggap salasai*

Rundiang ba kumbalian

Dari si pangka 3 ka si pangka 1

Mano angku
Sayo angku
Ka angku ... rundiang di kumbalian
Laluan lah angku

Pikia nan palito hati
Nanang nan baribu aka
Aniang itu hulu bicaro
Sampi kini jadi padoman
Langkah kok panjang pado kaki
Bintiak jo ragi kok batuka
Barilah maaf badan sayo
Ka angku bana batiboan

Sapihak rundiang kito tadi
Nan talatak di dalam barih
Nan tasimpan dalam mufakakik
Tarago sayo bausaho
Manyanda kan ka batang nyo

Jikok di sayo lah tadi tu
Alah batanyoan ka nan punyo
Bahimpun kato ka mufakaik
Lah bulek aia ka pambuluah
Bulek bak ambacang ciek

Antaro sayo jo angku
Nan samo sabondoang lalu
Nan satariak satampuah suruik
Salangkah sapijak tapak
Sa ayun sapa kambaiyan

Di kandak nan ka mambari
Di pintak nan ka mampalakuan
Apo nan ta unjuak ta barian dek angku ..
Kami basamo lah dalam itu
Angku ... nan ma agiah kandak
Pihak si alek nan manjapuik
Jo mufakaik sayo samoi
Pulang ma alum pado angku ...

Jawek si pangka 1 ka si pangka 3

Lah sampai di angku
Sakiro alah angku
Ka angku lai
Laluan lah angku

Jalan nan pasa kito tampuah
Suri banang tuladan kain
Manuruik barih cupak gantang
Sayo susun jari nan sapuluah
Nak samo sunyi lahia batin
Jo bana angku sayo jalang

Arati nyo nan jadi bana di angku.....
Mahadok kapado sayo
Di bunyi nan sayo danga
Di rupo nan sayo pandang
Di hadapan baliau nan basamo

Antaro sayo jo angku
Salang kah sapijak tapak
Sa ayun sapakambaian
Apo nan tabarih di sayo
Angku lah di dalam itu

Bana baitu rundiang angku

..... iyo bana

Arati nyo nan jadi bana di angku...

Lah dalam barih jo balabeh

Di lingkuang adaik jo limbago

Bungka tatap sukatan panuah

Ka sa untuak balain tariak

Antaro sayo jo angku

Indak lah banamo patuik

Patuik nyo kandak kito bari

Nan pintak kito palakuan

Ba ato nyo lai kini

Karano kaki ka talangkah

Nan tangan akan tajambo

Alam nan basifaik gawa

Kok kurang mintak di tukuak

Kok senteang mintak di bilai

Pilang ma alum pado angku

Jawek si pangka 2 ka si pangka 1

Lah sampai di angku

Sakiro alah angku

Ka angku lai

Laluan lah angku

Adaik mancupak lah di papek

Nan sapadi bapantang luak

Baitu adaik ranah minang

Jo salam tangan sayo angkek

Rila jo maaf sayo mintak

Jo bana angku sayo jalang

Nan jadi bana di angku

Di bunyi nan sayo danga

Di rupo nan sayo pandang

Di hadapan baliu nan basamo
Nan kandak alah ka kito bari
Pintak alah ka bapalakuan

Tapi nan jadi bana di angku
Hulu malang salah galogok
Hulu mujua pandai batinggang
Marantang kok salah kakok
Suto jo bana kok tabuang

Karano kaki ka talangkah
Nan tangan akan tajambo
Alam nan basifaik gawa
Manusia basifaik khilaf
Pulang ma alum pado sayo
Bana baitu rundiang angku

..... iyo bana

Di kabanaran angku nan katangah
Lah nyato adaik nan bapakai
Bajalan baduo jan di tengah
Bajalan surang jan dauhu

Insya Allah, angku

Baliu lai basamo
Indak ka tagamang angku

Jawek si pangka 1 ka si pangka 2

Insya Allah, angku

Kandak buliah pintak balaku
Sayo kumbalian ka baliu angku

Rundiang ba kumbalian

Dari si pangka 1 ka si alek 1

Mano angku

Sayo angku

Ka angku.... rundiang di kumbalian
Laluan lah angku

Salam ta'azim dari sayo
Randah nan di anjuang tinggi
Ketek nan di amba gadang
Dek alah mupakaik dauhu nyo
Rila jo ma'af pamanuahi
Jo bana angku sayo jalang

Rundiang nan ka sayo kumbalian
Mahadok kapado angku
Pihak parundiangan kito tadi
Panek nan bakeh baranti
Patang nan bakeh ba malam

Tarago sayo duduak baiyo
Tagak bakato jo ba molah
Basilau bana ka batang nyo
Lah di pangka tumbuhan nyo bania
Jikok di sayo lah tadi tu
Duduak kato ba paiyokan
Lah sayo silau ka pangka nyo
Lah bulek jantuang ka kalupak
Bulek bak ambacang ciek

Kok singkek alah babuku
Kok panjang alah barueh
Nan jadi bana di angku tadi
Angku manjapuik marapulai

Sarato andan pasumandan
Langkok jo tuo jo pangiriang
Kami ... ma anta nak nyo sampai
Turun di rumah tanggo iko
Naiak ka rumah tanggo angku

Limbak nan dari pado itu
Langkok ho siriah di carano
Adaik limbago angku bao

Banamo ragam bungo adaik

Mintak di liek di pareso
Aluran barih nak bapaek
Aluran takuak nak batabang
Nak samo tibo di tampek nyo

Limbago kandak nak babari
Nan pintak ba palakuan
Kan bana baitu rundiang angku...

..... iyo bana

Di bana angku ... nan katangah
Kurang tak ado ka panukuak
Senteang tak ado ka pambilai

Bana nyo di bao lalu
Lalu nyo di kaji nan sado itu

Insya Allah, angku
Kandak angku kami bari
Nan pintak kami palakuan
Alah ka sanang hati angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah kamat wakatu habih
Eloklah rundiang basicapek
Basicapek sayo jo angku

Di bunyi nan kami danga
Di rupo nan kami pandang

Di ateh duduak nan sa amparan
Di hadapan baliu nan basamo
Kandak buliah pintak balaku
Lah sanang bana hati kami
Alhamdulillah kajawek nyo

Saketek nyo lai angku
Karano kandak alah buliah
Nan pintak alah balaku
Karajo elok di pacapek
Nak jan di timpo dek nan buruak
Balakek kan pakaian marapulai sakali

Jawek si pangka 1 ka si alek 1

Insya Allah, angku
Kami sugirokan

Panyambahan Ma anta Marapulai

Ket : panyambahan ma anta maapilai ko, dari banyak nagari di mulai jo panyambahan siriah nan barangkai jo panyambahan ma anta marapulai ko, walau ado juo nagari indak mamulai jo panyambahan siriah, lansuang sajo jo panyambahan ma anta marapulai

Panyambahan Ma anta Marapulai

Dari si alek 1 ka si pangka 1

Mano angku
Sayo angku
Ka angku rundiang ba tiboan
Laluan lah angku

Aia nan mahantam turun
Pulai nan bapangkek naiak
Manningakan rieh jo buku
Jadi pusako ranah minang
Jari sapuluah sayo susun
Rundiang nan raib kok tabatiak
Mamintak maaf ka pangulu
Jo bana angku sayo jalang

Ado pun rundiang nan di puhunkan
Mahadok kapado angku
Nan bak papatah kato adaik
Patitih cupak jo gantang

Sajak mulo sumua ka bakali
Takalo rantiang ka di patah
Pangulu badiri dalam nagari
Adaik bapakai dalam itu
Jalan nan duo nan di turuik
Kato nan duo nan di pakai
Tak guno di pacah bana

Dek abang wakatu habih
Dek sunaik paralu tingga

Hanyo ba ato nyolai kini
Tumbuhan wajah sarupo iko
Tapakai jalan nan duo
Suatu nan lazim janyo syarak
Kaduo nan kewi janyo adaik

Jikok nan lazim janyo syarak
Utang ayah kapado anak
Utang paralu di musajik
Di muko imam jo khatib
Badiri sasi jo wali
Di bacokan paradhu ‘ain
Aso baduo mangko jadi

Ado pun nan kewi janyo adaik
Tadiri di koroang kampuang
Di ateh rumah jo tanggo
Di hadapan niniak jo mamak

Dek adaik basandi syarak
Syarak basandi kitabullah
Walau kabek dapek di bukak
Namun buhua tak buliah guyah

Nan indak lapuak dek ujan
Nan indak lakang dek paneh
Jikok bubuik inyo layua
Kalau di asak inyo mati

Sajak mulo di rahim ibu
Baniaik ibu jo bapak
Kok lahia anak laki-laki
Walau pun anak parampuan
Duo sunat duo paralu

Di kato sunat nan duo
Ba kikh baguntieng gobak

Di kaji paralu nan duo
Bapitah basunaik rasul

Sajak ketek di nanti gadang
Alah gadang di nanti patuik
Alah patuik tungguan tibo
Adaik jo syarak batungguan

Tibo di anak laki laki
Wajahnyo tigo pakaro
Partamo kajadi imam
Kaduo kajadi khatib
Katigo kajadi pangulu
Cukuik ka ampek batompangan

Urang padang ma ani banang
Di punta mangko di lipek
Di lipek lalu di patigo
Kalau di rantang namuah panjang
Elok di punta nak nyo singkek
Di ambiak sakiro nan paguno
Iyo bak andai kato bida

Lah patah rantiang limau lunggo
Patah manimpo limau sundai
Maraok ka dalam parak
Dalam janji kami lah tibo
Mambao adaik nan bapakai
Di lapeh niniak jo mamak

Sajak salangkah turun janjang
Mulo satapak dari tanggo
Jalan nan luruih kami tampuah
Labuah nan goloang kami turuik
Satibo kami di halaman
Ka naiak pintu tabukak
Ka duduak lapiak takambang
Kini lah duduak di tengah rumah

Kok duduak alah taraselo
Kok tagak alah tarajali
Panek alah ba parantian
Di caliak kapado barih adaik
Alah sudah minum jo makan

Pado wakatu iko kini
Pihak kapado diri sayo
Sadang tananang bana datang
Paham tibo aka baranti
Pikiran baiak nan tumbuah
Iyolah umanaik kami bao

Tantangan badan diri kami
Kami ma anta marapulai
Langkok jo andan pasumandan
Sarato tuo jo pangiriang
Kini lah duduak di tampek nyo

Nak nyato anta ko sampai
Dek angku ... mintak batarimo

Kok hanyo diri marapulai
Nan jadi rang mando angku
Ba umua satahun jaguang
Badarah satampuak pinang
Aka singkek pandapek kurang
Ilimu alun lai barapo

Kok elok ratak lidah nyo
Kusuik di bao manyalasai
Karuah di bao manyaniahi

Kok elok ratak tangan nyo
Singkek di ambiak ka pauleh
Panjang di ambiak ka pangarek

Kok nyampang malang nan taraiah
Ikek jatuh baju baluluak
Hilang nak samo kito cari

Hanyuik nak samo kito pinteh
Luluuh nak samo kito salam
Kok sasek handak basapo
Kok tadoroang mintak di sintak

Bakandak kami lahia batin
Kapado angku nan basamo
Batin nyo silang nan bapangka
Jumlah karajo nan bajunjuang
Aluran diri marapulai
Nak babao dek angku ... nan basamo

Ka ilia saranguah dayuang
Ka mudiak sa antak galah
Ka bukik nak samo mandaki
Ka lurah nak samo manurun

Itu nyo pintak pinto kami
Kapado silang nan bapangka
Jumlah karajo nan bajunjuang
Bunyi di harok nak kumbali
Pulang ma alum pado angku...

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku

Adaik ampek asanyo ampek
Pituah dari tigo luak
Lapeh karantau katigo nyo
Pusako kito ranah minang
Jo salam rundiang sayo angkek
Rila jo maaf sayo mintak
Gawa jo kilaf kok tasuo
Jo bana angku sayo jalang

Arati nyo nan jadi bana dek angku ...
Mahadok kapado sayo
Di ateh duduak nan sa amparan
Di tagak nan sapamatang
Ujuik mungkasuik panyambahan
Tasimpan di diri sayo

Di ateh baretoang di nan cukuik
Jikok mambilang lai sampai
Tibo gayuang takanak sambuik
Tibo kato ta diri jawek

Tapi samantang pun baitu
Aluran badan diri sayo
Bukik nan tinggi nak badaki
Lurah dalam nak baturuni
Mancari gandang ka paningkah
Isi nyo talempong ka panalun

Samantaro sayo baiyo
Rundiang jo angku...kito simpan
Kato di elah jo mupakaik

Mananti angku dalam adaik
Pulang ma alum pado angku ...

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Kok di tiliak padoman alua
Tabayang mungkin jo patuik
Nareco kato lah di timbang
Kok untuang rundiang jan basaua
Nyampang kalu lidah dek manyabuik
Jo bana angku sayo jalang

Nan jadi bana di angku
Mahadok kapado sayo
Di bunyi nan sayo danga
Di rupo nan sayo pandang
Di hadapan kito nan basamo
Sapihak kadiri angku

Nak ma ambiak duduak baiyo
Tagak bakato jo bamolah
Rundiang jo sayo di latak an
Kato di simpan dalam barih
Mananti sayo sa kutiko
Bana baitu kato angku

..... Iyo bana

Di kanaran angku nan katangah
Lah dalam barih jo balabeh
Di lingkuang adaik jo pusako
Bana nyo di bao lalu
Lalu nyo di kaji nan sado itu
Karano jalan tarantang ka baturuik
Cupak tatagak kaba isi
Limbago tacakah ka batuang
Insya Allah, angku
Sayo nanti kabanaran angku ...

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Kamudiang rundiang basicapek
Basicapek sayo jo angku
Lalu nyo ba sicapek

Dek angku urang pamurah
Kandak sayo capek babari
Nan pintak lai ba palakuan

Insya Allah, angku
Sayo rantang bagai kan tali
Sayo iliakan umpamo aia
Mananti angku

Jawek si pangka 1 ka si alek 1

Insya Allah. Sayo nanti

*Ket : baiyo dulu **si pangka 1** jo **pangka 2** sasudah baiyo,
rundiang di kumbalian*

Pakolahan untuak mencari kato mufakat

Dari si pangka 1 ka si pangka 2

Mano angku
Sayo angku
Ka angku ... rundiang ba tiboan
Laluan lah angku

Kito sa ujuik sa pangana
Adaik berundiang dalam rapek
Tando baradaik di nagari
Mencari mufakaik dalam sidang
Da hulu kato basitina
Kamudian rundiang basicapek
Rila jo maaf pamanuahi
Jo bana angku sayo jalang
Arati nyo rundiang nan sayo tiboan
Mahadok kapado angku
Pado sabanta iko tadi

Lah tibo parundiangan dari si alek
Kapado kito silang nan bapangka
Jumlah karajo nan bajunjuang

Buah rundiang baliu nantun
Nan tatabua di tengah rapek
Bisiak lah samo ka dangaran
Jikok imbau alah talampau
Di hadapan kito nan basamo

Jikok di sayo lah tadi tu
Nan jajak alun batikam
Nan batang alun batitih
Nan kandak alun babari
Pintak nan alun ba palakuan

Ba'a nan kini nangko
Di kandak nan ka mambari
Di pintak nan ka mampalakuan

Di ma ka tumbuhan ibaraik bijo
Di ma katabik nan bak padi
Iko lah bana sayo tiboan
Mahadok kapado angku
Pulang ma alum pado angku ...

Jawek : si pangka 2 ka si pangka 1

Lah sampai di angku
Sakiro alah angku
Ka angku lai
Palalu lah angku

Nampak basuriah bak sipasin
Jajak bak bakiak alah nyato
Dalam aia guriah mangasan
Nak suci lahia jo batin
Barilah maaf badan sayo
Ka angku rundiang batiboan

Arati nyo bana di angku ... tadi
Mahadok kapado sayo
Pado sabanta iko tadi

Lah tibo parundiangan dari si alek
Kapado kito silang nan bapangka
Jumlah karajo nan bajunjuang

Buah rundiang baliau nantun
Nan talimpah di muko rapek
Bisiak lah samo kadangan
Jikok imbau alah talampau
Di hadapan kito nan basamo

Sapihak ka diri angku
Ka ba anjak anjak bak manuga
Baganjua suruik bak batanam
Ba'a ka baiak ka elok nyo
Pulang ma alum pado sayo
Bana baitu kato angku

..... Iyo bana
Kabanaran angku... nan katangah
Lah dalam barih jo balabeh
Di kanduang adat jo pusako
Bana nyo di bao lalu
Lalu nyo di kaji nan sado itu

Sapihak ka diri sayo
Bukik nan tinggi nak di daki
Lurah dalam nak di turuni
Alam nan leba nak ba pandang
Mancari gandang ka paningkah
Isi nyo talempong ka panalun

Lai koh adat nan baitu
Nyato pusako nan bak kian
Bana di simpan jo mufakaik
Rundiang di latak dalam barih
Pulang ma alum pado angku ...

Jawek : si pangka 1 ka si pangka 2

Lah sampai di angku

Sakiro alah angku
Ka angku lai
Laluan lah angku

Sikilang jo aia bangih
Pasia banda sapuluah
Itu lah rantau ba namoan
Mamaek kok indak tantang barih
Sayo susun jari nan sapuluah
Bana ka angku ba tiboan

Nan jadi bana di angku tadi
Mahadok kapado sayo
Ka ba jombo jombo bak basiang
Ba ganjua suruik bak batanam
Ba baliak baliak bak mamanggang

Lai koh adat nan baitu
Nyato pusako nan bak kian
Pulang ma lum pado sayo
Bana baitu rundiang angku

..... Iyo bana

Di bana angku nan ka tangah
Lah dalam barih jo balabeh
Di lingkuang adaik jo pusako
Kurang tak ado ka panukuak
Senteang tak ado ka pambilai
Bana nyo di bao lalu

Lalu nyo di kaji nan sado itu
Nan rajo kato mufakaik
Nan bana kato saiyo
Rancak batenggang pado adaik
Alah pakaian bana di pangulu
Saba mananti malah sayo

Jawek : si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Da hulu kato basitina
Dek azan wakatu cupua
Ulah Qamat wakatu habih
Elok lah rundiang ba sicapek
Ba sicapek sayo jo angku

Di bunyi nan sayo danga
Di rupo nan sayo pandang
Aluran badan diri sayo
Elok batenggang pado adaik
Sabab pakaian di pangulu
Kan bana baitu rundiang angku.....

..... iyo bana

Nan sayo tuntuik bakeh angku.....
Iyo lah rundiang nan sado itu
Dek angku urang pamurah
Capek ba agiah kandak sayo

Insya Allah, angku
Sayo lengoangan suok jo kida
Mananti angku

Jawek : si pangka 1 ka si pangka 2

Insya Allah, sayo nanti

*Ket : musti nyo baiyo dulu **si pangka 2** jo **si pangka 3** dll
tapi contoh baiyo **si pangka 2** jo **si pangka 3** indak di
buek kito anggap salasai, mako rundiang di
kumbalian*

Rundiang di kumbalian

Dari si pangka 2 ka si pangka 1

Mano angku
Sayo angku.....
Ka angku..... rundiang di kumbalian
Laluan lah angku

Barakik rakik ka hulu
Baranang ranang ka tapi
Samo di ambiak ka padoman
Rundiang kok ado ba nan ragu
Bari maaf manyusun jari
Bana ka angku ba tiboan

Arati nyo nan jadi bana di sayo
Ba kumbalian kapado angku ...
Antaro sayo jo angku
Panek nan bakeh baranti
Patang nan bakeh ba malam
Tarago sayo duduak baiyo
Tagak bakato jo ba molah

Jikok di sayo lah tadi tu
Duduak kato ba pa iyokan
Tagak kato ba pamolahan
Mancari bulek nan sagiliang
Mancari pipiah nan salayang

Dek yakin hati ka dapek
Pangana indak bacabang
Duduak kato ba pa iyokan
Tagak kato ba pamolahan
Dapek lah bulek nan sagiliang

Basuo pipiah nan salayang
Bahimpun kato ka mupakaik

Manyuruikan sirih ka gagang
Mangumbalian pinang ka tampuak
Nak di angku tarabik nyo
Pulang ma alum pado angku ...

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Nan senjang makanan papek
Nan sayuik samo di uleh
Nan senteang makanan bilai
Jo maaf rundiang sayo angkek
Tutua sayo kok tak ta bateh
Jo maaf rundiang di pasampai

Nan jadi bana dek angku tadi
Mahadok kapado sayo
Di ateh duduak nan sa amparan
Di tagak nan sapamatang
Antaro sayo jo angku

Panek nan bakeh baranti
Patang nan bakeh bamalam
Tarago angku duduak baiyo
Tagak bakato jo bamolah
Jikok di angku lah tadi tu
Duduak kato ba paiyokan
Tagak kato ba pamolahan
Lah dapek bulek nan sa giliang
Basuo picak nan salayang
Bahimpun rundiang ka mufakaik

Manyuruik'an siriah ka gagang nyo
Mangumbalian pinang katampuak
Mamintak bunyi dari sayo
Bana baitu kato angku

..... Iyo bana

Di kabanaran angku nan katangah
Elok bak paneh sudah hujan
Tarang bak bulan ampek baleh
Tapi samantang pun baitu

Nan jadi bana di sayo
Mahadok kapado angku
Nak balega siang jo malam
Nak baganti patang jo pagi

Manyuruik'an siriah ka gagang
Mangumbalian pinang ka tampuak
Elok nak bunyi dari angku

Pulang ma alum pado angku ...

Jawek si pangka 2 ka si pangka 1

Lah sampai di angku

Sakiro alah angku

Ka angku lai

Laluan lah angku

Nan tabincang dek bundo kandung
Ka padoman luak nan tigo
Makin di gali makin kabua
Tiok di sapuah nyo manggulang
Waruh salam lah sayo anjuang
Kok salah indak di sangajo
Maaf kan kato nan talanjua
Jo bana angku sayo jalang

Nan jadi bana di angku tadi
Mahadok kapado sayo

Di ateh duduak sa amparan
Di tagak nan sapamatang
Nak balega siang jo malam
Nak baganti patang jo pagi

Manyuruik'an siriah ka gagang
Mangumbalian pinang ka tampuak
Elok nak bunyi dari sayo
Pulang ma alum pado sayo
Bana baitu rndiang angku

..... Iyo bana

Di bana angku nan katangah
Tatumpah ka diri sayo
Lah dalam barih jo balabeh
Di lingkuang cupak jo gantang
Lah nyato adaik nan bapakai

Tapi samantang pun baitu
Aluran badan diri sayo
Di kana maso nan dauhu
Iyo malah bak hujan labek
Turun bak suto di ampaian

Sumua panuah danau malimpah
Dek gunuang tapatan kabuik
Hulu muaro nan dauhu
Kini lah kasiak pengeraian

Mangumbalian siriah ka gagang
Mamulangan pinang ka tampuak
Nak di angku tarabik nyo
Jo mufakat sayo samoi
Pulang ma alum pado angku

Jawek si pangka 1 ka si pangka 2

Lah sampai di angku

Sakiro alah angku
Ka angku lai
Laluan lah angku

Loroang di rundiang nan lah tibo
Takilek bagai caramin
Mambayang umpamo paneh
Kandungangan buek lah mambayang
Batang lah tampak tasanda nyo
Nak samo suci lahia batin
Rila jo maaf di pakameh
Jo bana angku sayo jalang

Arati nyo nan jadi bana di angku...
Mahadok kapado sayo
Aluran rundiang dari angku
Nak nyato ba bunta adaik
Tantu di lipek jo limbago

Adaik nyo panggang ka babaliak
Nak tau masak matah nyo
Adaik nyo kato ka barulak
Nak tau asa mulo jadi
Nak tau rancak nyo bijo
Di samayan basahan baniah

Aluran gayuang ka manyambuik
Isi nyo kato ka manjawab
Rancak di angku tarabik nyo
Jo mufakaik angku samoi
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku.....
Mahadok kapado sayo
Elok bak paneh sudah hujan
Tarang dek kito nan basamo

Antaro sayo jo angku
Kaba unyuik unyuik indak patuih
Ka bapilin pilin indak sariang
Indak lah banamo patuik
Tuah ka samo kito cari
Malu ka samo kito japuik

Ba'a nan kini nangko
Insya Allah, angku
Siriah di suruik kan ka gagang nyo
Pinang di kumbalian ka tampuak nyo

Tapi nan jadi bana di sayo
Karano kaki ka talangkah
Nan tangan ka tajambo
Alam nan basifaik gawa
Manusia basifaik khilaf
Ikek jatuhah baju baluluak

Kok tasuo di kaji nan sado itu
Rumah tampak jalan tak tantu
Kabua pandangan ba kuliliang
Pulang ma alum pado angku ...

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku
Nan salilik gunuang marapi
Saedaran gunuang pasaman
Barih balabeh ranah minang
Langkah kok panjang pado kaki
Rila jo maaf di puhun kan
Jo bana angku sayo jalang

Di bunyi nan sayo danga
Di rupo nan sayo pandang

Sapihak ka diri angku
Karano kaki ka talangkah
Nan tangan lah ka tajambo

Alam nan basifat gawa
Manusia basifat khilaf
Kok padam suluah di nan kalam
Kama lah langkah ka di bao

Ikek jatuh baju baluluak
Rumah tampak jalan tak tantu
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku.....
Mahadok kapado sayo
Lah dalam barih jo balabeh
Di kanduang adaik jo pusako
Karano baliiau lai rapek duduak di siko
Indak ka bapabia tagamang angku do
Alah ka sanang hati angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Kato daulu basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Lalu nyo di kaji ba sicapek
Di bunyi nan sayo danga

Di rupo nan sayo pandang
Di hadapan baliu nan basamo
Kok sasek lai ka basapo
Tadoroang lai ka basintak

Nan sayo tuntuiik nyato bakeh angku
Iyo lah rundiang nan sado itu
Ba'a nan kini nangko
Karano kandak alah buliah
Nan pintak alah balaku

Insya Allah, angku
Sayo suruik'an siriah ka gagang
Sayo kumbalian pinang katampuak
Basimak kan dek angku

Jawek si pangka 2 ka si pangka 1

Insya Allah, angku
Baliu basamo manyimak kan

Rundiang ba kumbalian

Dari si pangka 1 ka si alek 1

Mano angku
Sayo angku
Ka angku ... rundiang di kumbalian
Laluan lah angku

Di pikia tujuan kato
Niaik jo naza balabuahan
Rundiang sabuah sayo gamak
Lamo di bungkuieh kok nyo usang
Gawa jo kilaf kok basuo
Nyampang tasabuik di nan bukan
Rila jo maaf sayo mintak
Jo bana angku sayo jalang

Arati nyo bana nan ka di kumbalian
Mahadok kapado angku
Pihak parundiangan kito tadi
Tingga tak kunjuang tajapuik
Singkek tak kunjuang ta uleh

Tarago maninjau lurah jo gunuang
Mancaliak tanjuang nan bajorok
Dek jalan simpang basapiah
Dek taluak liku ba liku
Dek pulau jorok bajorok

Talayang sampan ka tengah
Sampan tasauah lah tapauik
Kato tak dapek lah pikia
Pikia nan palito hati
Nanang nan baribu aka

Aniang itu hulu bicaro
Sadang tanang bana datang
Paham tibo aka baranti
Kato lah putuih sandiri nyo

Bagaluik banang ka sikoci
Punta nan padek bak di simpai
Santuang nan indak lalu angin
Sawajah gayuang manyambuik
Limbago kato ka manjawab
Tatumpah ka diri sayo

Jikok di sayo lah kini tu
Karih tasisik pado pinggang
Padang tasanda pado bahu
Baban lah tibo di kapalo

Barek raso nyo ka bapikua
Ringan raso nyo ka bajinjiang
Barek tak mungkin di geleangan
Ringan tak mungkin di tinggakan
Tapi samantang pun baitu

Antaro sayo jo angku
Bakaji malang jo mujua

Jikok di kaji kamujuran nyo
Bak kacang tumbuah di lereang
Junjuang tagak aka lah naiak
Aka bapilin lai manjulai
Nan bungo manjadi putiak
Buah mangka manjadi masak

Jikok di kaji kamalangan nyo
Bak kacang tumbuah di lereang
Junjuang tagak aka tak naiak
Aka bapilin tak manjolai
Buah masak manjadi mangka
Putiak manjadi bungo pulo

Iko lah bana nan sayo tiboan
Mahadok kapado angku
Kok panjang parundiangan angku
Singkek di sayo ka bari nyo
Lai koh adaik nan baitu
Nyato pusako nan bak kian
Pulang ma alum pado angku ...

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Adaik limbago hutang tumbuah
Dalam undang tasabuik juo
Ameh samato tahan uji
Sayo susun jari nan sapuluah
Gawa jo khilaf kok basuo
Ka angku rundiang kumbali

Arati nyo nan jadi bana di angku...
Mahadok kapado sayo
Samisa urang bacatua
Duduak di meja pacaturan
Doroang badoroang langkah gajah
Amaik ma amaik buah catua
Gajah tadoroang kuda masuk
Rajo lah mati sandiri nyo

Bagaluik banang ka sikuci
Punta nan padek bak di simpai
Santuang nan indak lalu angin
Sawajah gayuang manyambuik
Limbago kato manjawab
Tatumpah ka diri angku

Jikok di angku lah kini tu
Karih tasisik pado pinggang
Baban lah tibo di kapalo

Barek raso nyo ka ba pikua
Ringan raso nyo ka bajinjiang

Barek tak mungkin di geleangan
Ringan tak mungkin di tingga kan
Tapi samantang pun baitu

Jikok di angku lah kini tu
Sabalun gayuang basambuik
Limbago kato bajawab
Antaro sayo jo angku
Bakaji malang jo mujua

Jikok di kaji kamujuran nyo
Bak kacang tumbuhan di lereang
Junjuang tagak aka lai naiak
Aka bapilin lai manjulai
Bungo baransua jadi putiak
Buah mangka manjadi masak

Jikok di kaji kamalangan nyo
Bak kacang tumbuah di lereang
Junjuang tagak aka tak naiak
Aka bapilin tak manjolai
Buah masak manjadi mangka
Putiak manjadi bungo pulo

Kok panjang parundiangan sayo
Singkek di angku ka bari nyo
Lai koh adaik nan baitu
Nyato pusako nan bak kian
Pulang ma alum pado sayo
Bana baitu rundiang angku

..... iyo bana

Di bana angku ... nan katangah
Lah dalam barih jo balabeh
Di lingkuang adaik jo pusako
Bana nyo di bao lalu
Lalu nyo di kaji nan sado itu
Antaro sayo jo angku
Bakato ndak sadang sapatah
Bajalan ndak sadang salangkah
Kok talalai angku di jalan
Sayo bari suko jo rila

Tantangan panjang jo singkek
Singkek di ambiak ka ukuran
Panjang di ambiak ka balabeh
Samo di pakai kaduo nyo
Pulang ma alum pado angku ...

Jawek si pangka 1 ka si alek 1

Daulu kato basitina
Dek azan wakatu cupua
Ulah Qamat wakatu habih
Elok lah rundiang ba sicapek
Ba sicapek sayo jo angku

Di bana angku ... nan katangah
Di bunyi nan sayo danga
Di rupo nan sayo pandang
Di hadapan baliu nan basamo
Tantangan lamo jo lambek
Tinggi batang lambek ka jatuah
Angku bari suko jo rila

Kok hanyo panjang jo singkek
Singkek di ambiak ka ukuran
Panjang di ambiak ka balabeh
Samo di pakai kaduo nyo
Kan bana baitu rundiang angku.....

..... iyo bana

Nan sayo tuntuik kahadapan angku...
Iyo lah rundiang nan sado itu
Dek angku urang pamurah
Nan kandak capek babari
Pintak lai ba palakuan

Insya Allah, angku
Sayo ulangan bagulambek
Basimak kan dekan angku

Jawek si alek 1 ka si pangka 1

Baliu basamo manyimak kan

Rundiang ba kumbalian

Dari si pangka 1 ka si alek 1

Mano angku
Sayo angku
Ka angku ... rundiang di kumbalian
Laluan lah angku

Batutua manuju bana
Mufakaik duduak barapak
Tando baradaik di nagari
Jadi padoman ranah minang
Dahulu kato basitina
Rila jo maaf sayo mintak
Elok lah kato di simpani
Jo bana angku sayo jalang

Aratinyo bana nan ka sayo tiboan
Mahadok kapado sayo
Ma ukua di ateh kayu
Ma hukum di ateh kato
Manyiang tampek nan tumbuah
Tumbuah sarupo iko kini

Sajak mulo sumua ka bakali
Takalo rantiang ka di patah
Pangulu badiri dalam nagari
Adaik bapakai dalam itu

Jalan nan duo nan di turuik
Kato nan duo nan di pakai
Tak guno di pacah bana
Dek abang wakatu habih
Dek sunaik paralu tingga
Elok lah kato di simpani

Hanyo ba ato nyolai kini
Tumbuah wajah sarupo iko
Tapakai jalan nan duo
Suatu nan lazim janyo syarak
Kaduo nan kewi janyo adaik

Jikok nan lazim janyo syarak
Utang ayah kapado anak
Utang paralu di musajik
Di muko imam jo khatib
Badiri sasi jo wali
Di bacokan paradhu 'ain

Aso baduo mangko jadi

Ado pun nan kewi janyo adaik
Tadiri di koroang kampuang
Di ateh rumah jo tanggo
Di hadapan niniak jo mamak

Dek adaik basandi syarak
Syarak basandi kitabullah
Walau kabek dapek di bukak
Namun buhua tak buliah guyah

Nan indak lapuak dek ujan
Nan indak lakang dek paneh
Jikok bubuik inyo layua
Kalau di asak inyo mati

Sajak mulo di rahim ibu
Baniaik ibu jo bapak
Kok lahia anak laki-laki
Walau pun anak parampuan
Duo sunat duo paralu

Di kato sunat nan duo
Ba kakah bagunting gobak
Di kaji paralu nan duo
Bapitah basunaik rasul

Sajak ketek di nanti gadang
Alah gadang di nanti patuik
Alah patuik tungguan tibo
Adaik jo syarak batungguan

Tibo di anak laki laki
Wajahnyo tigo pakaro
Partamo kajadi imam
Kaduo kajadi khatib
Katigo kajadi pangulu
Cukuik ka ampek ba tompangan

Urang padang ma ani banang
Di punta mangko di lipek
Di lipek lalu di patigo
Kalau di rantang namuah panjang
Elok di punta nak nyo singkek
Di ambiak sakiro nan paguno
Iyo bak andai kato bida

Lah patah rantiang limau lunggo
Patah manimpo limau sundai
Maraok ka dalam parak
Dalam janji kami lah tibo
Mambao adaik nan bapakai
Di lapeh niniak jo mamak

Sajak salangkah turun janjang
Mulo satapak dari tanggo
Jalan nan luruih kami tampuah
Labuah nan goloang kami turuik

Satibo kami di halaman
Ka naiak pintu tabukak
Ka duduak lapiak takambang
Kini lah duduak di tengah rumah

Kok duduak alah taraselo
Kok tagak alah tarajali
Panek alah ba parantian
Di caliak kapado barih adaik
Alah sudah minum jo makan

Pado wakatu iko kini
Pihak kapado diri sayo
Sadang tananang bana datang
Pikiran baiak nan tumbuah
Iyo lah umanaik kami bao

Tantangan badan diri kami
Kami ma anta marapulai
Langkok jo andan pasumandan

Sarato tuo jo pangiriang
Kini lah duduak di tampek nyo

Nak nyato anta ko sampai
Dek angku ... mintak batarimo

Kok hanyo diri marapulai
Nan jadi rang mando angku
Ba umua satahun jaguang
Badarah satampuak pinang

Aka singkek pandapek kurang
Ilimu alun lai barapo

Kok elok ratak lidah nyo
Kusuik di bao manyalasai
Karuah di bao manyaniahan

Kok elok ratak tangan nyo
Singkek di ambiak kapauleh
Panjang di ambiak ka pangarek

Kok nyampang malang nan taraijah
Ikek jatuh baju baluluak
Hilang nak samo kito cari
Hanyuik nak samo kito pinteh
Luluiah nak samo kito salam
Kok sasek handak basapo
Kok tadoroang mintak di sintak

Itu nyo rundiang nan katangah
Di harok bunyi nak kumbali
Nan pintak nak ba palakuan
Limbago kandak nak babari
Pulang ma alum pado sayo
Bana baitu kato angku

..... Iyo bana

Nan jadi bana dek angku
Rimbun bak bungo kacubuung
Rampak bak bungo kalikih
Alah di barih paek makan
Nyato di takuak tabang tibo
Lah jalan adaik nan ba pakai

Tapi nan jadi bana di sayo
Mahadok kapado angku
Jikok di sayo lah tadi tu
Jajak baru nan batikam
Batang baru nan batitih
Nan kandak alun babari
Pintak alun ba palakuan

Ba'a nan kini nangko
Di kandak nan ka mambari
Di pintak nan ka mampalakuan
Karano ayam lai barinduak

Sayo sangkuik kan ka nan tinggi
Sayo sandakan bana ka batang nyo
Mananti angku samantaro
Pulang ma alum pado angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Kamudiak balai kamuniang
Kabaruah ka subang anak
Balimo suku di sinan
Rundiang sayo kok tampak sandiang
Rila jo maaf sayo mintak
Ka angku rundiang ba tiboan

Nan jadi bana di angku
Mahadok kapado sayo
Di bunyi nan sayo danga
Di rupo nan sayo pandang
Di hadapan baliau nan basamo

Sakiro batang baru nan batitih
Jajak baru nan batikam

Nan kandak alun babari
Pintak alun ba palakuan

Ba'a nan kini nangko
Di kandak nan ka mambari
Di pintak nan ka mampalakuan
Sayo sangkuik kan ka nan tinggi
Sayo sandakan ka nan gadang
Nak tibo bana di batang nyo
Bana baitu rundiang angku

..... iyo bana

Di bana angku nan katangah
Lah dalam barih jo balabeh
Di kandung adaik jo pusako
Bana nyo di bao lalu
Lalu nyo di kaji nan sado itu

Balayia mahadang pulau
Bajalan mahadang bateh
Malantiang mahadang tempuak
Tantu ka buah alamaik nyo

Buah nan masak nak nyo jatuah
Jan layua di timpo rinyai
Batenggang angku ... pado adaik
Sayo mananti barito nyo
Pulang ma alum pado angku

Jawek si pangka 1 ka si alek 1

Di kana tujuan rundiang
Di hadapan niniak jo mamak
Urang sa adaik sapusako
Dalam bulek kok nampak sandiang
Barilah maaf banyak banyak
Ka angku bana kumbali nyo

Di bana angku ... nan katangah
Bunyi nan samo kito danga
Rupo nan samo kito pandang
Di hadapan baliau nan basamo

Malantiang mahadang tempuak
Tantu ka buah alamaik nyo
Buah nan masak nak nyo jatuah
Jan layua di timpo rinai

Batenggang sayo pado adaik
Angku mananti barito nyo
Bana baitu rundiang angku

..... iyo bana

Di bana angku ... nan katangah
Nan sayo tuntuik kahadapan angku
Iyo lah rundiang nan sado itu
Ba ato nyo lai kini
Kandak buliah pintak balaku

Insya Allah, angku
Sayo sanda kan ka batang nyo
Mananti angku samantaro

Jawek si alek 1 ka si pangka 1

Insya Allah, angku
Sayo mananti barito nyo

Ket : baiyo dulu si pangka 1 jo si pangka 3

Dari si pangka 1 ka si pangka 3

Sungai jambu jo lubuak atan
Camin taruih di koto pili
Dalam tsayo acok tasabuik
Jambo kok panjang pado tangan
Salam jo simpuah pamanuahi
Jo bana angku sayo runuik

Arati nyo bana nan ka sayo tiboan
Mahadok kapado angku
Jikok di sayo lah tadi tu
Sakiro jajak baru nan batikam
Hanyo batang baru nan batitih

Nan kandak alun babari
Pintak alun ba palakuan

Ba'a nan kini nangko
Di kandak nan ka mambari
Di pintak nan ka mampalakuan

Di ma ka tumbuhan ibaraik bijo
Di ma ka tabik umpamo padi
Iko lah bana sayo tiboan
Mahadok kapado angku
Pulang ma alum pado angku ...

Iawek si pangka 3 ka si pangka 1

Lah sampai di angku
Sakiro alah angku
Ka angku lai
Laluan lah angku

Patitih pamenan andai
Gurindam pamenan kato
Warih parpatiah nan sabatang

Bintiak jo ragi kok batikai
Rila jo maaf dari sayo
Jo bana angku sayo jalang

Arati nyo nan bana di angku ...
Mahadok kapado sayo
Di bunyi nan sayo danga
Di rupo nan sayo pandang
Di hadapan baliu nan basamo

Rundiangan jo alek tadi
Sakiro jajak baru nan batikam
Hanyo batang baru nan batitih
Nan kandak alun babari
Pintak alun ba palakuan

Ba'a nan kini nangko
Di kandak nan ka mambari
Di pintak nan ka mampalakuan
Di ma ka tumbuah ibaraik bijo
Di ma ka tabik umpamo padi
Pulang ma alum pado sayo
Kan iyo baitu rundiang angku ...

..... iyo bana

Di bana angku ... nan katangah
Lah dalam barih jo balabeh
Di kanduung adaik jo limbago
Bana nyo di bao lalu

Lalu nyo di kaji nan sado itu
Sapihak ka diri sayo
Duduak di anjun kiro kiro
Tagak di ganjua palangkahan

Nak mancaliak ilia jo mudiak
Raso tabayang liku pulau
Gunuang tinggi puncak barasok
Angkuah badusun bataratak

Nak malengoang suok jo kida
Dusun rancak medan nyo rami
Dusun banamo langkah dewa
Tanam karambia atok tungku

Labuah lakah cindai tajelo
Bapaga pudiang aia ameh
Pudiang geni babatang batang
Pudiang hitam barunpun runpun
Raso ka tinggi rang pangkasi
Raso ka randah ba anjuang kan

Raso ka jauh sayo bajalan
Kelok jo liku ka di tampuah
Nak tibo bana di tampek nyo
Mananti angku dalam adaik
Pulang ma alum pado angku

Jawek si pangka 1 ka si pangka 2

Daulu kato basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Di bunyi nan sayo danga
Di ruponan sayo pandang
Sapihak ka diri angku
Nak ma ambiak duduak baiyo
Tagak bakato jo ba molah
Nak tibo bana di tampek nyo
Pulang ma alum pado sayo
Kan bana baitu rundiang angku.....

..... iyo bana

Di bana angku ... nan katangah
Kapeh sahalai sayo pacik
Pilinan niniak jo mamak
Ganggam buatan ayah bundo

Silang tak ado ka pa ampang
Patuik tak ado ka pa ungkai
Insya Allah, angku
Saba mananti malah sayo

Jawek si pangka 2 ka si pangka 1

Insya Allah, angku
Sayo lengoangan suok jo kida

*Ket : musti nyo baiyo dulu **si pangka 3** jo **si pangka 4** dll
tapi contoh baiyo indak kito buek, di anggap salasai*

Rundiang ba kumbalian

Dari si pangka 3 ka si pangka 1

Mano angku
Sayo angku
Ka angku ... rundiang di kumbalian
Laluan lah angku

Adaik kato mahadang bana
Kamudian rundiang basicapek
Ulah kamat wakatu habih
Hari nan elok jan tabuang
Bintiak jo ragi jan batuka
Jo maaf rundiang sayo angkek
Kok talipua sayo di barih
Jo bana angku sayo jalang

Sapihak rundiang kito tadi
Nan tasimpan dalam mufakaik
Tarago sayo bausaho
Manyanguik kan ka nan tinggi

Manyandakan ka batang nyo

Jikok di sayo lah tadi tu
Alah batanyoan ka nan punyo
Basanda kan bana ka batang nyo
Bahimpun kato ka mufakaik
Lah bulek aia ka pambuluah

Antaro sayo jo angku
Salang kah sapijak tapak
Sa ayun sapa kambaian
Di kandak nan ka mambari
Di pintak nan ka mampalakuan

Apo nan tabarih di angku
Kami basamo lah di dalam
Di angku rundiang... tarabik nyo
Jo mufakaik sayo samoi
Pulang ma alum pado angku ...

Jawek si pangka 1 ka si pangka 3

Lah sampai di angku
Sakiro alah angku
Ka angku lai
Laluan lah angku

Assalamu'alaikum dari muluik
Warahmatullah panyudahi
Tando nyo kito sa andiko
Rundiang kok salah dek manyabuik
Maaf jo rila pamanuahi
Ka angku rundiang tatumpah nyo

Arati nyo nan jadi bana di angku.....
Mahadok kapado sayo
Di bunyi nan sayo danga
Di rupo nan sayo pandang
Di hadapan baliau nan basamo

Antaro sayo jo angku
Di ateh atok lah bagisia
Di bawah bandua lah badiguih
Di halaman nan salalu
Sa untuak indak ka balain tariak

Lah salangkah sapijak tapak
Sa ayun sapakambaian
Apo nan tabarih di sayo
Angku lah di dalam itu
Bana baitu rundiang angku

..... iyo bana

Arati nyo nan jadi bana di angku.....
Alah dalam barih jo balabeh
Di lingkuang adaik jo limbago
Ka sauntuak balain tariak
Antaro sayo jo angku
Indak lah banamo patuik

Patuik nyo kandak kito bari
Nan pintak kito palakuan

Ba ato nyo lai kini
Karano kaki ka talangkah
Nan tangan akan tajambo

Alam nan basifaik gawa
Manusia baifaik khilaf
Kok kurang mintak di tukuak

Kok senteang mintak di bilai
Pulang ma alum pado angku.....

Jawek si pangka 3 ka si pangka 1

Lah sampai di angku
Sakiro alah angku
Ka angku lai

Laluan lah angku

Daulu kato ba sitina
Kamudian rundiang ba sicapek
Ba sicapek sayo jo angku

Lalu nyo ba sicapek
Di bunyi nan sayo danga
Di rupo nan sayo pandang
Di hadapan baliau nan basamo
Nan kandak alah ka kito bari

Tapi nan jadi bana di angku

Karano kaki ka talangkah
Nan tangan akan tajambo
Alam nan basifaik gawa
Manusia basifaik khilaf

Kok gadang aia dari hulu
Sugiro sayo maminteh
Pulang ma alum pado sayo
Bana baitu rundiang angku

..... iyo bana

Di kabanaran angku nan katangah
Lah nyato adaik nan bapakai
Bajalan baduo jan di tengah
Bajalan surang jan daulu

Insya Allah, angku

Baliau lai basamo lai rapek
Indak ka tagamang angku

Jawek si pangka 1 ka si pangka 3

Kandak buliah pintak balaku
Insya Allah, angku

Sayo kumbalian ka baliau angku

Ket : mencari runding mufakat lebih dahulu sesama si pangka, sesudah bermufakat runding dikembalikan

Runding di kumbalian :

Jawek si pangka 1 ka si alek 1

Mano angku
Sayo angku
Ka angku ... runding dikumbalian
Laluan lah angku

Di bukik si ulang ali
Di pintu balai nan gadang
Aua sarumpun di ateh nyo
Aua kiramat banamoan
Langkah kok panjang pado kaki
Runding ko ado bana nan sumbang
Rila jo maaf dari sayo
Bana ka angku sayo tiboan

Pihak rundingan kito tadi
Balayia alun sampai ka pulau
Bajalan alun tibo di bateh
Karano sayo duduak baiyo
Tagak bakato jo bamolah
Mancari bana nan sa ukua
Isi nyo kandak ka mambari

Jikok di sayo lah tadi tu
Duduak nyo kato lah baiyo
Tagak nyo kato lah bamolah
Jauah bajalan lah babaliak

Pado wakatu iko kini
Bulek sagiliang alah dapek
Picak salayang lah basuo
Di gayuang nan ka manyambuik
Di kato nan ka manjawek
Di sayo juo tatumpah nyo

Nan ka jadi jawek dek kami
Tantangan diri marapulai
Insya Allah, ko sasek kami sapo
Jikok tadoroang kami sintak
Kami bao sa ilia jo sa mudiak
Alah ka sanang hati angku

Tapi samantang pun baitu
Ulak gampo nyo dari sayo
Tapuak alang nyato bajawek
Tampuak siriah nyato babaleh

Tantangan diri anak daro
Rang gadih joloang ka gadang
Ba umua satahun jaguang
Badarah satampuak pinang

Dek litak inyo takasa
Dek mamang sampai tarabo
Bukan dek ayah tak ba aja
Manjo lai ketek kok tabao

Kok tasuo gawa jo kilaf
Kok sasek andak basapo
Tadoroang mintak di sintak
Kok sipi ba katangahan
Sakitu rundiang dari sayo
Pulang ma alum pado angku ...

Jawek si alek 1 ka si pangka 1

Lah sampai di angku

Sakiro alah angku

Ka angku lai

Laluan lah angku

Ikua koto kapalo koto
Baitu juo di sabuik kan
Masuak ganggaman tuan gadang

Di atok langik jo bicaro
Bumi nan indak katirisan
Jo bana angku sayo jalang

Di bunyi nan sayo danga
Di rupo nan sayo pandang
Tantangan diri marapulai
Kok sasek lai ka basapo

Tadoroang lai ka basintak
Hilang ka samo kito cari
Luluih ka samo kito salam
Alhamdulillah ka jawek nyo

Tapi dek angku... ado nan takana
Ulak gampo nyo untuak kami
Tantangan diri anak daro
Rang gadih joloang ka gadang
Ba umua satahun jaguang
Badarah satampuak pinang

Dek litak inyo takasa
Dek mamang sampai tarabo
Bukan dek ayah tak ba aja
Manjo lai ketek kok tabao

Tasuo gawa jo kilaf
Kok sasek andak basapo
Tadoroang mintak di sintak
Kok sipi ba katangahan
Sakitu rundiang dari kami
Pulang ma alum pado sayo
Bana baitu kato angku

..... Iyo bana

Nan jadi bana dek angku

Lah dalam barih jo balabeh
Di lingkuang adaik jo pusako
Bana nyo di bao lalu

Lalu nyo di kaji nan sado itu
Di bana angku ... nan katangah
Sapihak kadiri sayo
Kato surang sayo bulati
Nan basamo sayo paiyoan

Kasuok dapek malengoang
Kakida buliah mancaliak
Tembak nak tibo di alamaik
Pandang nak tibo di tujuan

Ba ato nyo lai kini
Sayo ambiak duduak baiyo
Tagak bakato jo bamolah
Nak tibo bana di tampek nyo
Mananti angku dalam adaik

Jawek si alek 1 ka si pangka 1

Jalan tarantang ka ba turuik
Insya Allah, sayo nanti

Jawek si pangka 1 ka si alek 1

Insya Allah sayo laluan

*Ket : musti nyo dulu kepada nan ma anta marapulai nan
terakir batanyoan ka marapulai karano marapulai
nan ka bagaua siang jo malam baru rundiang di
kumbalian*

Rundiang di kumbalian :

Dari si alek 1 ka si pangka 1

Mano angku
Sayo angku
Ka angku ... rundiang dikumbalian
Laluan lah angku

Adaik ampek cupak nan duo
Jatuh ka alam tigo luak
Tigo limbago nan tajali
Gantiang putuih di tuan gadang
Salam jo rundiang dari sayo
Rila jo maaf banyak banyak
Sambah jo simpuah manjalani
Jo bana angku sayo jalang

Arati nyo bana nan ka sayo tiboan
Mahadok kapado angku
Sapihak rundiangan kito tadi
Tarago sayo bausaho
Kapadang marantang tali
Ka sungai manyerak jalo

Jikok di sayo lah tadi tu
Tali nan panjang lah barantang
Jalo nan leba lah baserak
Lah dapek hasia dek usaho
Iyo bana bak kato urang

Sayo lapeh rundiang bagamak
Mancari kato kabulatan
Lah bulek rundiang niniak mamak
Ka marapulai sayo sakuik an

Buah jo bari dek baliau

Insyah Allah, angku
Tantangan diri anak daro
Kok sasek ka kami sapo
Tadoroang ka kami sintak
Kok sipi kami katangahan
Alah ka sanang hati angku

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku
Daulu kato ba sitina
Kamudian rundiang ba sicapek
Basicapek sayo jo angku

Kalaluan nyo ba sicapek
Di bunyi nan sayo dangan
Di rupo nan sayo pandang
Kandak buliah pintak balaku
Alah manyanang dalam hati
Alhamdulillah kajawek nyo

Saketek nyo lai angku
Dek kandak lah samo buliah
Pintak alah samo balaku
Nak tasanda ka tiang panjang
Nak tapati ka tonggak tuo
Mamintak kami ka angku
Nak ba bacoan do'a salamaik
Sakitu rundiang nan katangah
Pulang ma alum pado angku.....

Panyambahan Maanta Marapulai **(Batang Sajo)**

Ket : batang panyambahan ma anta marapulai ko, buliah
untuak pamulai atau paniboan, buliah juo untuak
panikam atau panitih batang dari urang

Panyambahan maanta marapulai batang sajo

Mano angku
Sayo angku
Ka angku rundiang ba tiboan
Laluan lah angku

Jalan nan pasa kito tampuah
Suri banang tuladan kain
Manuruik barih cupak gantang
Sayo susun jari nan sapuluah
Nak samo sunyi lahia batin
Jo bana angku sayo jalang

Sungguah pun iyo angku surang
Nan di tuntuik nan basabuik gala
Batin dek adat nan basamo
Pangana batin ka nan rapek
Ujuik nyo salam ka nan banyak

Nyato tawalak ka ukuran
Tabayang barih jo balabeh
Iyo bak andai kato bida
Takana curiang nan dauhu
Di andai pusako lamo

Mahukum di ateh kato
Manyiang tampek nan tumbuah
Manimbang tampek nan ado
Tumbuah sarupo iko kini

Tapakaian jalan nan duo
Kato nan ampek nan di pakai
Jalan nan duo kok di pacah
Partamo nan lazim janyo syarak
Kaduo nan kawi janyo adaik

Kok nyo nan lazim kato syarak
Hutang bapak kapado anak
Hutang paralu di musajik
Di muko imam jo katik
Badiri saksi jo wali
Di bacokan paradu 'ain
Aso kaduo mangko jadi
Itu nan lazim pado syarak

Jokok nan kawi kato adaik
Tadiri di korong kampuang
Di ateh rumah jo tanggo
Di hadapan niniak jo mamak

Mako lakek lah pulo pitua nyo
Adaik nan basandi syarak
Sarak basandi kitabullah
Walau kabek dapek di bukak
Nan buhua tak buliah guyah

Adaik dari datuak katumanggungan
Undang dari datuak Parpatiah
Tapakai adaik nan balukih
Paham ka undang ba limbago

Di dalam adaik nan ampek
Ampek pulo langgam bagi nyo
Nan partamo adaik nan di pakai
Nan kaduo undang di pamenan
Nan katigo pusako di ronggohi
Nan ka ampek limbago nan di tuang

Nan jadi ujuik mungkasuik nyo
Aia nan janiah nan di sauak

Suri tarantang nan batanun
Limbago tacakah nan di tuang
Labuah nan goloang nan di tampuah

Jikok di bincang limbago adaik
Iyo lah anam parakaro
Partamo cupak usali
Ka duo cupak buatan

Ka tigo kato mupakaik
Ka ampek pusako di ronggohi
Ka limo kato da hulu batapati
Ka anam kato kudian kato bacari

Adaik hiduik di ateh dunia
Iyo lah bakorong jo ba kampuang
Dalam nyo balabuah jo batapian
Tantu ba sasok jo bajarami
Ado pandam ba pakuburan
Baranak ba kamanakan

Ada pun anak jo kamanakan
Duo pulo bagi nyo
Partamu anak kamanakan
Isilam si laki laki
Kaduo anak kamanakan
Isilam si parampuan

Jikok nyo anak kamanakan
Nan isilam si laki laki
Duo sunaik duo nan pardhu

Di kaji sunaik nan duo
Ba khikah batariak abuak
Di kaji pardhu nan duo
Ba pitah ba sunaik rasul

Wajah nyo tigo parkaro
Partamo kajadi imam
Ka duo kajadi katik

Ka tigo kajadi pangulu
Cukuik ka ampek ba tompangan
Nan di sabuik barumah tanggo

Jikok nyo anak kamanakan
Nan isilam si parampuan
Iyo bak cando itu pulo

Duo sunaik duo nan pardhu
Di kaji sunaik nan duo
Ba khikah batariak abuak
Di kaji pardhu nan duo
Ba pitah ba sunaik rasul

Di kaji sajak mulo ketek
Di tatah di aja makan
Di baok mandi katapian
Lakek lah badak jo bakasai

Di bari bagombak limo
Gombak banamo ka limo nyo
Di kaniang mantari tabik
Pamenan niniak jo mamak

Di kida bintang cumaro
Ganti sumandan dalam kampuang
Di suok bintang sinawa
Pamenan ibu jo bapo

Di tengah awan bajompu
Jumpu bajompu kaudaro
Ka ganti subang jo galang
Di kuduak tupai managun
Ka ganti cincin di jari
Bagombak bagalang kaki
Ba ganto bagiriang giriang
Pamenan kampuang jo halaman
Wajah nyo ampek parakaro

Nan ampek kok di patarang
Bacarian jodoh suami nyo

Sajak kaciak di nanti gadang
Lah gadang di nanti patuik
Lah patuik tungguan tibo
Sampai bauamua duo puluh
Barutang ibu jo bapo nyo

Pado wakatu iko kini
Kok hutang nak lah mambayia
Piutang nak manarimoan
Kudaraik sahabih tulang
Pikiran sahabih aka

Aka nan tigo di satuan
Suatu nan jahia janyo aka
Ka duo mustahia janyo aka
Ka tigo nan wajib janyo aka
Adaik limbago rang barundiang
Tuo di lawan jo mupakaik
Mudo di lawan jo rundingan
Bulek lah aia ka pambuluah
Bulek lah kato ka mupakaik

Adaik kato di bari ba asa
Kato bana di bari basifat
Nan panjang di bari barueh
Nan singkek di bari babuku

Pado wakatu iko kini
Di janji nan babuek arek
Buek nan samo kito karang
Simpai taguah paham lah tagok
Komah lah naiak baliau kateh rumah
Ka ateh rumah nan gadang
Lah duduk di lapiak nan sahalai
Ka sandaran kasua nan sabatang

Kok padang alah barajok
Nan lubuak alah bapancang

Kayu gadang jo kayu kulin
Urek ta unjam kalautan
Batang nyo condoang ka gunuang
Jatuah badarai sularo nyo

Suko lah hati lahia batin
Lah buliah pintak pado tuhan
Sanang lah hati bundokanduang
Anak surang alah baduo

Utang syarak alah babayia
Utang adaik salasai pulo
Bak dulang jo tuduang aia
Nan bak kapuran jo saok nyo
Hanyo ba ato nyolai kini

Nan di mukasuik sakiro sampai
Nan di ama sakiro pacah
Sabalun doa di bacokan
Iyo dek urang siak kito
Nan jadi bana di sayo
Sapihak ka diri marapulai

Kok tinggi tabaok di rueh
Kok gapuak tabaok dek lamak
Aka singkek pandapek kurang
Kok ilimu jauh sakali

Kok taboan lelo kanak kanak
Jikok sasek minta di sapo
Tadorong minta di sintak
Kok sipi ba katangahan

Kok nyampang malang nan taraiiah
Ikek jatuah baju baluluak
Hilang nak samo kito cari
Luluiah nak samo kito salam

Sakitu rundiang nan katangah
Kok tasuo labiah jo kurang
Di harap bunyi nak kumbali
Mak alum pulang pado angku ...

Panyambahan Manyiriah

Dari si alek 1 ka si pangka 1

Mano angku
Sayo angku
Ka angku rundiang ba tiboan
Laluan lah angku

Tantangan sambah jo manyambah
Kok kurang taratik jo mujilih
Kok kurang lelo jo sopan
Dek cameh sumangek hilang
Sambah manyambah kapado Allah
Kok talipua sayo di barih
Maaf ka angku di puhunkan
Jo bana angku sayo jalang

Sungguah pun iyo bakeh angku.....
Salam jo rundiang di puhunkan
Mako sarapek nyo pu lolah
Angku jo pangulu sayo
Nan gadang basa batuah
Nan cadiak nan tau pandai

Cadiak lai buliah ka baguru
Pandai lai buliah ka bata nyo
Tiang adaik sandi aluan
Payuang panji marawa basa
Nyawa nagari adaik kato

Hulu aia impunan buluah
Pusek jalo pumpunan ikan
Tali adaik batang limbago
Tampuak alua tangkai pusako
Bungo nyo intan jo pudi
Mangkuto di dalam alam

Mamacik kato kabanaran
Salilih bapantang sumbiang
Sapadi bapantang luak
Walau bak mano dareh angin

Bogo bak mano ragam kato
Tatagak pucuak nan balingka
Basilang dahan kayu aro
Nan bana pantang di asak

Ado pun baliau sayo itu
Arah kayu gadang di tengah koto
Nan ba urek tunggang ka bumi
Nan bapucuak cewang ka langik

Urek nyo bakeh baselo
Batang nyo bakeh basanda
Daun nyo bakeh balinduang
Bakeh balinduang ka panas
Bakeh bataduah ka hujan
Iyo dek anak kamanakan

Nan sapayuang jo sapatagak
Di bawah payuang di lngkuang cupak
Manjala masuak nagari
Ka pai tampek bata nyo
Ka pulang bakeh ba barito

Itu lah ka basaran nyo
Angku pangulu sayo itu
Nan gadang basa batuah
Salam di sinan di tiboan

Salam nan kaduo sayo unjuak kan
Kapado alim jo ulama
Langkok sagalo imam khatib
Nan saisi sidang jamaat
Nan ampek jurai musajik
Mangaji mantiak jo ma'ana

Kok nahu usah di bilang
Hukum pekah mahia sakali

Iyo bana hukum agamo
Aia mandian rang palauik
Tapiian mandi rang pasampan
Indak basibak jo basisiah
Bukan ba hinggo jo ba bateh
Dalam saruan sayo juo

Salam nan ka tigo sayo unjuak kan
Kapado nan tau cadiaik pandai
Nan arih lagi bijak sano
Indak nyo tau tau sajo

Tau di anak kamanakan
Nan tau jo koroang kampuang

Tau di tinggi ka ma impok
Tau di gadang ka malendo
Tau di duri ka mancucuak
Tau di rantiang ka manyangkuik
Tau di bayang kato sampai
Tau di bulang nan bakicuah

Indak nyo pandai pandai sajo
Pandai ma atak ma etokan
Pandai ma agak ma agiahan
Pandai mangaji baso basi
Pandai mangantang aia lauik

Pandai manyalam dalam bumi
Pandai manyambuang rumin putuih
Pandai ma uleh tak mangasan
Pandai mambuhua tak mambuku
Ma uji samuik dalam batu
Paga adat benteang pusako
Jokok taradok ka lautan
Nankodo di dandang panjang
Mandi batimbo aia masin

Bagalah jo jari manih
Badayuang jo tapak tangan

Paham nan bulek bak piluru
Tunggang ilang barani mati
Walau ka angok angok ikan
Bogo ka nyawo nyawo patuang
Miki kasobak biadang bahu

Namun nan niaik dalam hati
Mungkasuik tatap basampai kan
Itu lah kabasaran baliu itu
Salam di sinan di tiboan

Sungguah pun yo nan sado itu
Mako sarapek nyo pulo lah
Dunsanak jo sudaro
Karik baik jo ipa bisan
Ali nan saisi rumah nangko

Nan duo barih ka duduak kan
Nan tigo langgam paseloan

Sahinggo paran picak malintang naiak
Bandua pipih malintang turun
Sabujua rumah nan panjang
Salega rumah nan gadang

Manyasak ka papan sariang
Sampai kaloteang parapatan
Tinggi tabayang tampak nyato
Nyato nan tinggi dari adaik
Salam di sinan di tiboan

Ado pun salam sayo itu
Indak tabilang jo ta atok
Hanyo nan pambilang jo pa atok
Panyusun, pa mulia kan salam

Lai salam sayo nantun
Iyo lah salam balirik
Di palirik kan ka hadapan
Angku pangulu nan basamo
Ujuang salam bakeh angku

Arati nyo salam nan ka sayo tiboan
Mahadok kapado angku

Awa mulo rundiang di sabuik
Samo manyarah pado Allah
Samo mangikuik kato nabi

Allah ta'ala kayo sungguah
Rasul tuhan nabi muhammad
Pangulu sakalian alam
Ikutan arab jo isilam

Tapi samantang pun baitu
Dalam nareco bayang adaik
Adaik nan ba talago buek
Cupak nan tarang samato
Taga dek sipaik nan badiri

Adaik limbago nan bapakai
Kalau manyiang di nan tumbuhan
Jikok manimbang di nan ado
Tumbuhan sarupo iko kini

Puntiang tahantak ka hulu nyo
Di bawah kiliran taji
Asa mulo rundiang dahulu nyo
Tigo limbago nan tajali

Partamo garak jo garik
Pamenan tangan di nan rami
Kaduo sambah manyambah
Sambah manyambah pado Allah
Parundiangan kapado angku

Katigo siriah jo pinang
Talatak dalam carano

Kaganti baso jo basi
Lah ta unjuak kahadapan angku
Tibo di muko nan basamo

Badaga batang katindiah
Katuko di dalam padi
Lah tampak sayo ka manyiriah
Tando alamaik putiah hati

Malin putiah mangarang songkok
Songkok di karang di halaman
Cabiak siriah salai lah rokok
Nak sanang hati bapadoman

Itu nyo pintak pinto kami
Kapado silang nan bapangka
Di harap bunyi nak kumbali
Pulang ma alum pado angku

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku

Salam talayang di nan rapek
Bungka paliangan di nareco
Adaik bamain dalam itu
Manuruik barih cupak gantang
Jo salam rundiang sayo angkek
Gawa jo kilaf kok basuo
Maaf kan sayo dek pangulu
Jo bana angku sayo jalang

Arati nyo nan bana di angku
Mahadok kapado sayo
Di ateh duduak sa amparan
Di tagak nan sapamatang
Buah rundiangan nan tabayak

Nan taserak ka nan labuak
Cucua ka bumi nampak nyato
Panuah sagalo isi alam
Lipua sagalo batang tubuah

Sapihak ka diri sayo
Nan batang alun ka batitih
Jajak nan alun ka batikam
Patuik bana di ulang suruik

Tapi samantang pun baitu
Di titih batang kok galia
Di tikam jajak kok sipi
Jawek nyo sajo ba asiangan

Karano lai duduak di nan rapek
Bacampua angku jo pangulu
Langkok ulama cadiaik pandai
Nan gunuang tapatan kabuik

Ka sungai jalo bamain
Ka padang marantang tali
Ka rimbo mencari kayu
Nan tabiang tungkek jo janji

Rimbo di olah jo mufakaik
Suto jo banang nak sasuai
Nak samo naiak ka tumbuak an
Rundiang di elah jo mufakaik

Samantaro sayo batenggang
Rundiang jo angku ... di latak kan
Kato di simpan dalam barih
Mananti angku samantaro
Pulang ma alum pado angku

Jawek si alek 1 ka si pangka 1

Lah sampai di angku
Sakiro alah angku

Ka angku lai
Laluan lah angku

Kito sa ujuik sa pangana
Adat berundiang dalam rapek
Tando baradat di nagari
Mancari mufakaik dalam sidang
Dahulu kato basitina
Kamudian rundiang basicapek
Rila jo maaf pamanuahi
Jo bana angku sayo jalang

Nan jadi bana di angku
Mahadok kapado sayo
Di bunyi nan sayo danga
Di rupo nan sayo pandang
Di hadapan baliu nan basamo
Lah ka bapakai bak pitua

Pariuak jo bareh nak sasuai
Kayu jo api nak sakato
Nak sanang tungku manjarang kan
Ba elah rundiang jo mufakaik

Samantaro angku batenggang
Rundiang jo sayo di latak kan
Kato di simpan dalam barih
Mananti sayo samantaro
Kan bana baitu rundiang angku.....

..... iyo bana

Nan jadi bana dek angku
Lah dalam barih jo balabeh
Di lingkuang adaik jo pusako
Lah nyato titian budi
Tampak di batin ka arifan
Lah kandak adaik nan bapakai
Bana nyo di bao lalu
Lalu nyo di kaji nan sado itu

Sapihak ka diri angku
Ka duduak balega di nan rapek
Alah pakaian di pangulu
Insya Allah, angku
Sayo nanti kabanaran angku

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku

Alua patuik jalan batampuah
Suri banang tuladan kain
Manuruik barih cupak gantang
Sayo susun jari nan sapuluah
Nak samo sunyi lahia batin
Jo bana angku sayo jalang

Arati nyo nan jadi bana di angku.....
Di bunyi nan sayo danga
Di rupo nan sayo pandang
Di hadapan baliau nan basamo

Sapanjang pintak pinto sayo
Angku... lapeh sampan nak balayia
Pelang mananti di muaro
Kan bana baitu rundiang angku ...

..... iyo bana
Nan sayo tuntuik kahadapan angku...
Iyo lah rundiang nan sado itu
Dek angku urang pamurah
Nan kandak capek babari

Ba'a nan kini nangko
Karano kandak alah buliah
Nan pintak alah balaku
Insya Allah, sayo laluan

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Kamudian rundiang basicapek
Basicapek sayo jo angku
Kalaluan nyo ba sicapek

Di bunyi nan sayo danga
Di rupo nan sayo pandang
Di hadapan baliiau nan basamo
Lah ka barantang bagaikan tali
Ba ilia kan umpamo aia
Insya Allah, sayo nanti

Jawek si pangka 1 ka si alek 1

Alhamdulillah, angku
Sayo laluan

*Ket : baiyo dulu **si pangka 1** jo **pangka 2** sesudah baiyo,
rundiang di kumbalian*

Rundiang baiyo

Dari si pangka 1 ka si pangka 2

Mano angku
Sayo angku
Ka angku rundiang sayo tiboan
Laluan lah angku

Minangkabau punyo pitua
Jadi pakaian niniak jo mamak
Tando baradat di nagari
Dalam adat sabatang panjang

Dahulu kato basitina
Rila jo maaf sayo mintak
Elok lah rundiang di simpani
Jo bana angku sayo jalang

Arati nyo rundiang nan ka sayo tiboan
Mahadok kapado angku
Lah badantuang guruah dari hulu
Babunyi gaga di lautan
Kilek manyemba di udaro
Kalam kabuik cando nyo hari

Bakumpa gabak ateh langik
Turun lah hujan dari hulu
Turun bak suto di ampaian
Jimek sado nyo tanah basah

Sumua panuah danau malimbak
Taganang aia di daratan
Taganang nan balun ba iliran
Ilia nan balun ba muaro
Muaro nan balun ba sudahi

Ba' a nan kini nangko
Di tanang nan ka ma iliran
Di muaro nan ka manyudahi
Di ma ka tumbuhan ibaraik bijo
Di ma katabik nan bak padi

Iko lah bana sayo tiboan
Mahadok kapado angku
Pulang ma alum pado angku

Jawek : si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Loroang di rundiang nan katangah
Badiri mungkin jo patuik
Sarantak paham jo bicaro
Lahia jo batin sa ukuran
Ka tuhan tangan tatadah
Barih balabeh sayo turuik
Jo maaf pambukak kato
Bana ka angku batiboan

Arati nyo nan jadi bana di angku...
Mahadok kapado sayo
Lah badantuang guruah dari hulu
Ba bunyi gaga di lautan

Kalam kabuik cando nyo hari
Bakumpa gabak nak ka gunuang
Manyemba kilek di udaro
Turun lah hujan dari hulu
Turun bak suto di ampaian
Jimek sado nyo tanah basah

Sumua panuah danau malimbak
Taganang aia di daratan
Taganang nan balun ba iliran
Ilia nan balun ba muaro
Muaro nan balun basudahi

Ba'a nan kini nangko
Di tanang nan ka ma iliran
Muaro nan kamanyudahi

Di ma ka tumbuhan ibaraik bijo
Di ma katabik nan bak padi
Pulang ma alum pado sayo
Bana baitu rundiang angku

..... Iyo bana

Kabaranan angku nan katangah
Lah dalam barih jo balabeh

Di kanduang adaik jo pusako
Bana nyo di bao lalu
Lalu nyo di kaji nan sado itu
Sapihak ka diri sayo
Duduak di anjun kiro kiro
Tagak di ganjua palangkahan

Baniak baiak dalam hati
Andak ma anjak anjak lankah
Ka simun ka batang asai
Ka gudam ka balai janggo
Ka aceh ka koroang dalam
Ka arab ka banda nata
Ka makah lalu ka madinah
Jalan nan jauah ka di turuik
Kelok jo liku ka di tampuah

Mancari bijo gak sabuah
Bijo di tanam musim kini
Jikok babuah jo ba bungo

Bungo nak samo di pasuntiang
Buah nak samo kito makan
Lai koh adat nan baitu
Nyato pusako nan bak kian
Pulang ma alum pado angku

Jawek : si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Rundiang nan tibo dari angku
Takilek bagai caramin
Tabayang umpamo paneh
Mangilek mangalimantang
Rundiang kok ado ba nan ragu
Barilah maaf lahia batin

Kok indak nan sayuik nan ta uleh
Jo bana angku sayo jalang

Nan jadi bana di angku tadi
Mahadok kapado sayo
Di ateh duduak sa amparan
Sapihak ka diri angku
Andak ma anjak anjak langkah

Salilik gunuang marapi
Saedaran gunuang pasaman

Dari sirangkak nan badangkang
Sinan buayo putiah daguak

Lalu ka pintu rajo ilia
Durian di takuak rajo
Sipisak pisau hanyuik

Sialang balantak basi
Sailiran batang bangkaweh
Sampai ka ombak nan badabua
Inggo lauik nan sa bideh

Sikilang jo aia bangih
Pasisia banda sapuluah
Inggo taratak aia hitam
Lalu ka tanjuang si malidu

Jalan nan jauah ka di turuik
Kelok jo liku ka di tampuah
Mancari gandang ka paningkah
Isi nyo talempong ka panalun

Mananti sayo dalam barih
Rundiang di simpan jo mufakaik
Lai koh adaik nan bak kian
Pulang ma alum pado sayo
Bana baitu rundiang angku

..... Iyo bana

Di kabanaran angku nan ka tangah
Lah dalam barih jo balabeh
Di lingkuang adaik jo pusako
Kurang tak ado ka panukuak
Senteang tak ado ka pambilai
Bana nyo di bao lalu

Lalu nyo di kaji nan sado itu
Nan rajo kato mufakaik
Nan bana kato saiyo
Ka bapakai manuruik adat
Saba mananti malah sayo

Jawek : si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Ka ilia saranguah dayuang
Kamudiak sa antak galah
Kato pitua nan tajali
Sayo angkek tangan di anjuang
Pado tuhan tangan tatadah
Ka angku rundiang kumbali

Nan jadi bana di angku
Mahadok kapado sayo
Di bunyi nan sayo danga
Di rupo nan sayo pandang
Di hadapan baliau nan basamo

Dek angku urang pamurah
Kandak sayo capek babari
Pintak lakeh bapalakuan
Kan bana baitu rundiang angku ...

..... iyo bana

Nan sayo tuntuik nyato kapado angku
Iyolah rundiang nan sado itu
Karano kandak buliah pintak balaku

Alhamdulillah, angku
Sayo rantang bagaikan tali

Sayo serak kan bak manjalo
Mananti angku

Jawek : si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Rundiangan angku ... nan katangah
Di bunyi nan sayo danga
Di rupo nan sayo pandang
Di hadapan baliau nan basamo
Lah ka barantang bagaikan tali
Baserak kan bagai manjalo
Insya Allah, sayo nanti

Jawek : si pangka 2 ka si pangka 1

Insya Allah sayo laluan

*Ket : musti nyo baiyo dulu **si pangka 2** jo **si pangka 3** dll
tapi contoh baiyo **si pangka 2** jo **si pangka 3** indak di
buek kito anggap salasai, mako rundiang di
kumbalian*

Rundiang di kumbalian

Dari si pangka 1 ka si pangka 2

Mano angku
Sayo angku.....
Ka angku ... rundiang di kumbalian
Laluan lah angku

Jikok pakaian bundo kanduang
Ka padoman luak nan tigo
Makin di kakeh makin kabua
Lah di sapuah mako manggulang
Adaik salam lah sayo anjuang
Kok salah indak di sangajo
Maaf kan kato kok talanjua
Jo bana angku sayo jalang

Arati nyo bana nan ka sayo pulangan
Mahadok kapado angku
Antaro sayo jo angku
Panek nan bakeh baranti
Patang nan bakeh bamalam
Tarago sayo duduak baiyo

Tagak bakato jo bamolah
Mancari bulek nan sagiliang
Mancari pipiah nan salayang
Jikok di sayo lah tadi tu
Duduak kato bapaiyoan
Tagak kato bapamolahan

Dapek lah bulek nan sagiliang
Basuo pipiah nan salayang
Bahimpun kato ka mupakaik

Manyuruikan sirih ka gagang
Mangumbalian pinang ka tampuak
Nak di angku tarabik nyo
Pulang ma alum pado angku

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Aia mancuwa jo kayu tanam
Ujuang dek luak tanah data
Masuak ka ranah pasia jambak
Lapeh ka padang ujuang karang
Niniak mamak kunjungan salam
Bintiak jo ragi kok batuka
Barilah maaf banyak banyak
Jo bana angku sayo jalang

Nan jadi bana dek angku tadi
Mahadok kapado sayo
Di ateh duduak nan sa amparan
Di tagak nan sapatang

Antaro sayo jo angku
Panek nan bakeh baranti
Patang nan bakeh bamalam
Tarago angku duduak baiyo
Tagak bakato jo bamolah

Jikok di angku lah tadi tu
Duduak kato ba paiyokan
Tagak kato ba pamolahan
Lah dapek bulek nan sa giliang
Basuo picak nan salayang

Manyuruikan siriah ka gagang nyo
Mangumbalian pinang katampuak

Mamintak bunyi dari sayo
Bana baitu rundiang angku

..... Iyo bana

Di kabanaran angku nan katangah
Lah dalam barih jo balabeh
Di lingkuang adat jo limbago
Tapi samantang pun baitu
Bana nyo di bao lalu
Lalu nyo di kaji nan sado itu

Nan jadi bana di sayo
Mahadok kapado angku
Ka lauik ba juru mudi
Ka darek bajuru baso

Manyuruik kan siriah ka gagang
Mangumbalian pinang ka tampuak
Elok nak bunyi dari angku

Pulang ma alum pado angku

Iawek si pangka 2 ka si pangka 1

Lah sampai di angku

Sakiro alah angku

Ka angku lai

Laluan lah angku

Salam ta'azim dari sayo
Randah nan di anjuang tinggi
Ketek nan di amba gadang
Dek alah mupakaik dau lu nyo
Rila jo ma'af pamanuahi
Jo bana angku sayo jalang

Arati nyo nan jadi bana di angku...
Mahadok kapado sayo
Nak balega siang jo malam
Nak baganti patang jo pagi

Manyuruik kan siriah ka gagang
Mangumbalian pinang ka tampuak
Elok nak bunyi dari sayo

Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku
Mahadok kapado sayo
Lah dalam barih jo balabeh
Di lingkuang cupak jo gantang
Lah nyato adat nan bapakai

Tapi samantang pun baitu
Nan jadi bana di sayo
Jan ayam sikua duo dabiah nyo
Pisau sayo gak kurang tajam
Makin di asah makin maja

Manyuruik kan siriah ka gagang
Mangumbalian pinang ka tampuak
Sayo mintak bunyi dari angku
Jo mufakat sayo samoi
Pulang ma alum pado angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku
Ikua koto kapalo koto
Baitu juo di sabuik kan
Masuak ganggaman tuan gadang
Di atok langik jo bicaro
Bumi nan indak katirisan
Jo bana angku sayo jalang

Arati nyo nan jadi bana di angku.....
Mahadok kapado sayo
Rancak bakato jo nan pandai
Elok bajalan jo nan tuo

Manyuruik kan siriah ka gagang
Mangumbalian pinang ka tampuak
Angku mintak bunyi dari sayo
Jo mufakat sayo samoi
Pulang ma alum pado sayo
Bana baitu kato angku

..... Iyo bana

Di bana angku nan katangah
Mahadok kapado sayo
Elok bak paneh sudah hujan
Janiah nyo labiah bak di basuah
Tarang dek kito nan basamo

Antaro sayo jo angku
Kaba unyuik unyuik indak patuih
Ka bapilin pilin indak sariang
Indak lah banamo patuik
Tuah ka samo kito cari
Malu ka samo kito japuik

Ba'a nan kini nangko
Insya Allah, angku

Sayo suruik kan siriah ka gagang nyo
Pinang di kumbalian ka tampuak nyo

Tapi samantang pun baitu
Nan jadi bana di sayo
Mahadok kapado angku
Karano kaki ka talangkah
Nan tangan ka tajambo

Alam nan basifat gawa
Manusia basifat khilaf
Rumah tampak jalan tak tantu
Pulang ma alum pado angku

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Nan titian biaso lapuak
Janji kok mungkia padanan nyo
Tantu talalai manyubarang
Agak batanang angku duduak
Gawa jo khilaf kok basuo
Jo bana angku sayo jalang

Nan jadi bana di angku
Di bunyi nan sayo danga
Di rupo nan sayo pandang
Di hadapan baliau nan basamo

Sapihak ka diri angku
Karano kaki ka talangkah
Nan tangan ka tajambo

Alam nan basifat gawa
Manusia basifat khilaf
Kok tadabok jatuah ka tanah
Rusuah manggamang dalam hati
Pulang ma alum pado sayo
Bana baitu rundiang angku

..... iyo bana

Arati nyo nan jadi bana di angku
Mahadok kapado sayo
Lah dalam barih jo balabeh

Di kanduang adat jo pusako

Tabang lah nuri ka udaro
Eten ka langik nan katujuhah
Mamutuihkan undang jo bidaran
Kok tadabok jatuah ka tanah
Lah ado dukun manantian
Alah ka sanang hati angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Di balah batuang tigo balah
Sumbiang baliuang tigo jari
Cancang tak tapek ba andasan
Di anjuang salam jo lidah
Barang nan gawa di ampuni
Ka angku, rundiang ba tiboan

Nan jadi bana di angku
Di bunyi nan sayo danga
Di rupo nan sayo pandang
Di hadapan baliau nan basamo

Tabang lah nuri ka udaro
Eten ka langik nan ka tujuhah
Mamutuihkan undang jo bidaran
Kok tadabok jatuah ka tanah
Dukun sadio manantikan
Bana baitu rundiang angku

..... iyo bana

Nan sayo tuntuik nyato bakeh angku
Iyo lah rundiang nan sado itu
Ba' nan kini nangko

Karano kandak alah buliah
Nan pintak alah balaku

Insya Allah, angku
Sayo suruik kan siriah ka gagang
Sayo kumbalian pinang katampuak
Basimak kan dek angku

Jawek si pangka 2 ka si pangka 1

Insya Allah
Baliau basamo manyimak kan

Rundiang di kumbalian

Dari si pangka 1 ka si alek 1

Mano angku
Sayo angku
Ka angku rundiang bakumbalian
Laluan lah angku

Di timbang tujuan kato
Dalam sari'aik nan bapakai
Lah dalam bungka jo taraju
Pado rundiang nampak mambayang
Hakikaik paha alah samo
Lahia jo batin tak batikai
Barilah maaf dek pangulu
Jo bana angku sayo jalang

Arati nyo bana nan ka sayo kumbalian
Mahadok kapado angku
Antaro sayo jo angku
Putuih tak kunjuang ta hubuang
Tingga tak kunjuang tajapuik
Singkek tak kunjuang ta uleh
Tarago maninjau lurang jo gunuang
Maliek taluak nan baliku

Dek taluak liku ba liku
Dek pulau jorok ba jorok

Talayang sampan ka tengah
Tasanda tibo di karang
Sampan tasauah lah tapauik
Kato tak dapek lah tapikia

Pikia nan palito hati
Nanang nan baribu aka
Aniang itu hulu bicaro
Sadang tananang bana datang
Paham tibo aka baranti
Kato lah putuih sandiri nyo

Hukum takanak pado sayo
Sawajah gayuang manyambuik
Limbago kato ka manjawab
Tatumpah ka diri sayo

Jikok di sayo lah tu kini
Karih tasisik pado pnggang
Padang tasanda pado bahu
Baban lah tibo di kapalo
Barek raso nyo ka sayo pikua
Sakiro ringan sayo jinjiang
Ringan tak mungkin di tingga kan
Barek nan indak tageleangan

Tapi samantang pun baitu
Antaro sayo jo angku
Bakaji malang jo mujua
Jikok di kaji kamujuran nyo

Bak biduak turun kalautan
Angin tanang galombang sunyi
Ombak tak ado nan mangguluang
Badai tak ado nan ma ampeh
Batang tak ado mambalintang
Salamaik biduak pulang baliak

Bak pasang masuak muaro

Jikok di kaji banamo malang
Bak biduak turun ka lautan
Angin kareh galombang gadang
Ombak gadang guluang ba guluang
Badai ma ampeh suok kida
Batang kok banyak mambalintang
Lah talalai sayo kumbali
Dek banyak rintangan tengah lauik

Nan niaik hati sayo bana
Talambek angku dek mananti
Kok panjang parundiangan angku.....
Singkek di sayo ka bari nyo
Pulang ma alum pado angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Palalu lah angku

Kok hanyo rundiang nan mandatang
Nan talimpah di muko rapek
Nan tatumpah ka diri sayo
Rundiang kok ado ba nan sumbang
Rila jo maaf di patapek
Ka angku ... rundiang kumbali nyo

Nan jadi bana di angku
Mahadok kapado sayo
Di hadapan baliu nan basamo

Antaro sayo jo angku
Lah samisa urang main catua
Duduak di meja pacaturan
Doroang mandoroang langkah gajah
Amaik ma amaik buah catua

Gajah tadoroang kudo masuak
Rajo lah mati sandiri nyo

Tasungkuik angku ... di nan laweh
Sawajah gayuang manyambuik
Limbago kato ka manjawab
Tatumpah ka diri angku

Jikok di angku lah kini tu
Karih tasisik pado pinggang
Padang tasanda pado bahu
Baban lah tibo di kapalo
Barek tak mungkin di geleangan
Ringan tak mungkin di tingga kan

Sakiro barek ka angku pikua
Sakiro ringan angku jinjiang
Tapi samantang pun baitu
Antaro sayo jo angku

Bakaji malang jo mujua
Jikok di kaji kamujuran nyo
Tiok tuga lai tacia
Tiok lubang lai tatanam
Lai di barih paek makan
Lai di takuak tabang tibo
Di insang bana lakek nyo atua

Jikok di kaji kamalangan nyo
Tiok tuga indak tacia
Tiok lubang indak tatanam
Di lua barih paek makan
Indak di takuak tabang tibo
Indak di insang lakek atua

Kok panjang parundiangan sayo
Singkek di angku ka bari nyo
Pulang ma alum pado sayo

Bana baitu rundiang angku

..... Iyo bana

Di bana angku nan katangah
Lah dalam barih jo balabeh
Di kanduang adat jo limbago
Alah dalam cupak jo gantang

Hanyo harapan dari sayo
Antaro sayo jo angku
Malantiang indak badugo tinggi
Bajalan indak badugo jauh
Ma uji indak ka samo sirah
Mangati indak ka samo banyak

Singkek di ambiak ka ukuran
Panjang di ambiak ka balabeh
Samo kito pakai kaduo nyo
Alah ka sanang hati angku

Jawek si alek 1 ka si pangka

Lah sampai di angku

Sakiro alah angku

Ka angku lai

Laluan lah angku

Tasabuik tanjuang nan ampek
Lubuak nan tigo alah tantu
Ganggaman parpatiah nan sabatang
Jo salam tangan sayo angkek
Rila jo maaf ka pangulu
Jo bana angku sayo jalang

Di bunyi nan sayo danga
Di rupo nan sayo pandang
Di hadapan baliau nan basamo
Antaro sayo jo angku

Ma uji indak ka samo sirah
Mangati indak ka samo banyak

Ma ukua indak ka samo panjang
Lalu nyo di kaji nan sado itu

Singkek di ambiak ka ukuran
Panjang di ambiak ka balabeh
Samo di pakai kaduo nyo
Kan bana baitu rundiang angku

..... iyo bana

Di bana angku nan katangah
Lah dalam barih jo balabeh
Di kanduang adaik jo pusako
Bana nyo di bao lalu

Lalu nyo di kaji nan sado itu
Ma uji indak ka samo sirah
Mangati indak ka samo banyak
Ma ukua indak ka samo panjang

Nan sayo tuntuik kapado angku.....
Iyo lah rundiang nan sado itu
Ba ato nyo lai kini

Insya Allah angku
Rundiang sayo kumbalian
Basimakan di angku

Jawek si pangka ka si alek 1

Insya Allah
Di simakan baliiau nan basamo

Dari si alek 1 ka si pangka 1

Mano angku
Sayo angku
Ka angku ... rundiang bakumbalian
Laluan lah angku

Adaik ampek cupak nan duo
Jatuah ka alam tigo luak
Tigo limbago nan tajali
Gantiang putuih di tuan gadang
Rundiang nan datang dari sayo
Rila jo maaf banyak banyak
Salam jo simpuah manjalani
Jo bana angku sayo jalang

Nan jadi bana di sayo
Mahadok ka pado angku
Adaik limbago iko kini
Mahukum di ateh kato
Manyiang tampek nan tumbuah
Manimbang tampek nan ado
Tumbuah sarupo iko kini

Habih hari baganti hari
Habih pakan baganti bulan
Habih bulan tahun batuka
Adat bapakai salamo nyo

Puntiing ta antak kahulu nyo
Di bawah kiliran taji
Awa mulo kato dahulu nyo
Tigo limbago nan tajali
Partamo sambah manyambah
Kaduo baso jo basi
Sambah manyambah pado Allah
Kok hanyo baso jo basi
Pakaian kito dalam adaik

Adaik nan basandi syarak
Syarak basandi kitab Allah
Walau kabek buliah di bukak
Namun buhua tak buliah guyah

Kok hanyo baso jo basi
Tasabuik bamuluik manih
Tapakai an baso jo basi

Di dalam bungka nan piawai
Di taraju nan bagotok
Adaik banamo sopan santun

Nan katigo siriah jo pinang
Langkok timbakau jo daun nyo
Talatak ateh carano
Panuah barisi ka langkapan

Badaga batang ka tindiah
Katuko di dalam padi
Lah tampak sayo ka manyiriah
Tando alamaik putiah hati

Ba dantuang bunyi rabano
Di gua nak rang koto gadang
Siriah talantak di carano
Indah nan bukan alang alang

Malin putiah mangarang sangkok
Sangkok di karang di halaman
Cabiak siriah giliang lah rokok
Pintak jo pinto di lalukan

Sakitu sajo pa rundiangan
Di harok bunyi nak kumbali
Pulang ma'alum pado sayo
Bana baitu rundiang angku

..... Iyo bana

Nan jadi bana di angku tadi
Nan talimpah kapado sayo
Jikok di sayo lah tadi tu
Sakiro gayuang baru nan basambuik
Sakiro kato baru nan bajawek

Ba'a nan kini nangko
Karano ayam lai barinduak
Nan siriah lai bajunjuang

Di kandak nan ka mambari
Di pintak nan ka mampalakuan

Sayo sangkuik kan ka nan tinggi
Sayo sandakan ka nan gadang
Mananti angku samantaro
Pulang ma alum pado angku

Jawek si pangka ka si alek 1

Lah sampai di angku
Sakiro alah angku
Ka angku lai
Laluan lah angku

Jikok nyo lareh koto pili
Lareh nyo balanggam tujuhah
Baitu pitua ranah minang
Kok salah toloang pelok i
Sayo susun jari nan sapuluah
Jo bana angku sayo jalang

Arati nyo nan jadi bana di angku...
Mahadok kapado sayo
Di bunyi nan sayo danga
Di rupo nan sayo pandang
Sakiro gayuang baru nan basambuik
Sakiro kato baru nan bajawek
Hanyo batang baru nan batitih

Ba'a nan kini nangko
Supayo gantiang nak nyo putuih
Nak nyato biang ko tabuak
Nan siriah lai bajunjuang
Karano ayam lai barinduak

Di kandak nan ka mambari
Di pintak nan ka mampalakuan
Sayo sangkuik kan ka nan tinggi
Sayo sandakan ka nan gadang

Antaro sayo jo angku
Rundiang di simpan dalam barih
Kato di simpan jo mufakat
Mananti angku samantaro
Bana baitu rundiang angku

..... iyo bana

Di kabanaran angku ... nan katangah
Lah dalam barih jo balabeh
Lah di lingkuang adaik jo pusako

Karano lah jalan adat nan bapakai
Mahawai nak sapanjang tangan
Mangaruak nak sahabih sauang
Silang tak ado ka pa amfang
Patuik tak ado ka pa ungkai
Insya Allah, angku
Sayo nanti sajo kabanaran angku...

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Bintiak jo ragi jan batuka
Basamo kito mamaham kan
Jadi pusako ranah minang
Adat ba kato ba sitina
Rila jo maaf di puhun kan
Jo bana angku sayo jalang

Kabanarang angku ... nan katangah
Di bunyi nan sayo danga
Di rupo nan sayo pandang
Di hadapan baliau nan basamo

Sapihak rundiangan angku tadi
Karano lah adaik ka bapakai
Mahawai nak sapanjang tangan
Mangaruak nak sahabih sauang
Angku lapeh biduak nak balayia
Pelang mananti di muaro
Kan bana baitu rundiang angku

..... iyo bana

Di kabanaran angku tadi tu
Nan sayo tuntuik ka hadapan angku ..
Iyo lah rundiang nan sado itu
Karano kandak buliah pintak balaku
Sayo laluan angku

Jawek si pangka ka si alek 1

Insya Allah sayo nanti

Ket : baiyo dari **si pangka 1** ka **si pangka 4** atau ka
pangulu

Dari si pangka 1 ka si pangka 4 atau pangulu

Mano angku
Sayo angku
Ka angku rundiang ba tiboan
Laluan lah angku
Pitalah jo bungo tanjuang
Ka tigo jo gunuang rajo
Anak koto dari batipuah
Kabasaran nyo di tuan gadang
Salam jo rundiang sayo anjuang
Khilaf kilapaik kok basuo
Sayo susun jari nan sapuluah
Jo bana angku sayo jalang

Arati nyo rundiang nan ka sayo tiboan
Mahadok kapado angku

Di parundiangan sayo tadi
Jo diri silang nan ba pangka
Jumlah karajo nan bajunjuang

Sakiro jajak baru nan batikam
Batang baru nan sayo titih
Nan kandak alun lai babari
Pintak alun bapalakuan

Ba'a nan kini nangko
Di kandak nan kamambari
Di pintak nan kamampalakuan
Di ma katumbuah ibaraik bijo
Di ma katabik umpamo padi

Iko lah bana sayo tibokan
Mahadok kapado angku
Pulang ma alum pado angku

Jawek si pangka 4 ka si pangka 1

Lah sampai di angku
Sakiro alah angku
Ka angku lai
Laluan lah angku

Adaik ampek asa nyo ampek
Pituah dari tigo luak
Lapeh karantau katigo nyo
Pusako kito ranah minang
Jo salam rundiang sayo angkek
Rila jo maaf sayo mintak
Gawa jo kilaf kok tasuo
Jo bana angku sayo jalang

Arati nyo nan jadi bana di angku.....
Jo rundiang diri si alek
Sakiro jajak baru nan batikam
Sakiro batang baru nan batitih
Nan kandak alun babari

Ba'a nan kini nangko
Di kandak nan kamambari
Di pintak nan kamampalakuan
Iko lah bana nan batiboan pado sayo
Bana baitu kato angku

..... iyo bana

Di kabanaran angku nan katangah
Lah dalam barih jo balabeh
Di kanduang adaik jo limbago
Di lingkuang cupak jo gantang
Tapi samantang pun baitu

Hanyo ba ato nyo lai kini
Sapihak kapado diri sayo
Kasuok dapek malengoang
Ka kida dapek mancaliak
Sayo tariak rundiang jo ukuran

Kato di simpan dalam barih
Samantaro sayo batenggang
Mananti angku dalam adaik
Pulang ma alum pado angku

Jawel si pangka 1 ka si pangka 4

Lah sampai di angku
Sakiro alah angku
Ka angku lai
Laluan lah angku

Batipuah nagari gadang
Sapuluah anak koto nyo
Bapaga kubu bakuliliang
Tuan gadang duduak di sinan
Rundiang kok ado banan sumbang
Barilah maaf badan sayo
Dalam bulek jan tampak sandiang

Ka angku rundiang batiboan

Arati nyo nan jadi bana di angku...
Mahadok kapado sayo
Sapihak ka diri angku
Kasuok dapek malengoang
Kakida dapek mancaliak

Bapiliah sado nan taserak
Basemba paco panguntingang
Samantaro angku batenggang
Mananti sayo dalam adaik
Pulang ma alum pado sayo
Bana baitu rundiang angku

..... iyo bana

Di bana angku nan katangah
Lah dalam barih jo balabeh
Di lingkuang adat jo pusako
Bana nyo di bao lalu
Lalu nyo di kaji nan sado itu
Insya Allah, sayo nanti angku ...

Jawek si pangka 4 ka si pangka 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Elok lah rundiang di simpani
Rila jo maaf sayo mintak
Basicapek sayo jo angku
Lalu nyo di kaji basicapek
Di bunyi nan sayo danga
Basaba angku mananti
Dek kandak alah buliah
Nan pintak lai balaku

Insya Allah, sayo laluan

Jawek si pangka 1 ka si pangka 4

Insya Allah sayo nanti

*Ket : musti nyo baiyo dulu **si pangka 3** jo **si pangka 4** dll
tapi contoh baiyo indak kito buek, di anggap salasai*

Kato bakumbalian

Dari si pangka 3 ka si pangka 1

Mano angku
Sayo angku
Ka angku... rundiang bakumbalian
Laluan lah angku

Salam talayang tantang alua
Tiok suatu kan bapangka
Niaik jo naza balabuahan
Adat limbago bapancalang
Rundiang kok ado nan basaua
Lahia jo batin kok batuka
Rila jo maaf di puhun kan
Jo bana angku sayo jalang

Arati nyo bana nan ka sayo kumbalian
Mahadok kapado angku
Sapihak parundiangan kito tadi
Tinggi batang lambek ka jatuah
Jauah bajalan lamo babaliak
Tarago sayo dek batenggang
Mancari kato nan saiyo
Isi nyo rundiang nan sa ukua
Tantangan kandak ka mambari
Di pintak nan ka mampalakuan
Tatumpah juo ka diri sayo

Jikok di sayo lah tu kini
Babulek kan aia ka pambuluah

Ba himpun kato ka mufakaik
Bakandak kami ka angku

Jan ayam sikua duo dabiah nyo
Apo nan tacoreang tabarih dek angku ..
Kami basamo lah dalam itu
Pulang ma alum pado angku

Jawek si pangka 1 ka si pangka 4

Lah sampai di angku

Sakiro alah angku

Ka angku lai

Laluan lah angku

Di tiliak takadin kato
Di timbang nareco adaik
Takilek cupak jo gantang
Rila jo maaf dari sayo
Nyampang kurang rukun jo saraik
Jo bana angku sayo jalang

Arati nyo nan jadi bana di angku...

Di bunyi nan sayo danga
Di rupo nan sayo pandang
Di hadapan baliau nan basamo
Jan ayam sikua duo dabiah nyo

Apo nan tacoreang tabarih dek sayo
Angku alah di dalam itu
Jo mufakaik angku samoi
Kan bana baitu rundiang angku ...

..... iyo bana

Di bana angku nan katangah
Lah di dalam barih jo balabeh
Di lingkuang adat jo pusako
Bana nyo di bao lalu
Lalu nyo di kaji nan sado itu

Insya Allah, angku
Di agiah kandak pihak si pangka

Tapi karano kaki ka malangkah
Di tangan nan ka tajambo
Alam nan basipaik gawa
Manusia basipaik khilaf
Pulang ma alum pado angku

Jawek si pangka 4 ka si pangka 1

Lah sampai di angku
Sakiro alah angku
Ka angku lai
Laluan lah angku

Nan tabincang dek bundo kanduang
Ka padoman luak nan tigo
Makin di gali makin kabua
Tiok di sapuah nyo manggulang
Warih salam lah sayo anjuang
Kok salah indak di sangajo
Maaf kan kato nan talanjua
Jo bana angku sayo jalang

Arati nyo nan jadi bana di angku...
Mahadok kapado sayo
Karano kaki ka malangkah
Di tangan nan ka tajambo

Alam nan basipaik gawa
Manusia basipaik khilaf
Pulang ma alum pado sayo
Bana baitu rundiang angku

..... iyo bana

Di kabanaran angku ... nan katangah
Nan taserak ka nan labuak

Takilek bagai padoman
Tabayang umpamo paneh

Insya Allah, angku
Karano baliu lai basamo
Indak ka bapabia tagamang angku...
Alah ka sanang hati angku

Jawek si pangka 1 ka si pangka 4

Lah sampai di angku
Sakiro alah angku
Ka angku lai
Laluan lah angku

Dahulu kato basitina
Kamudian rundiang basicapek
Basicapek sayo jo angku

Di bunyi nan sayo danga
Karano kandak alah buliah
Di hadapan baliu nan basamo
Nan pintak alah balaku

Insya Allah, angku
Sayo kumbalian ka asa nyo angku...
Basimak kan di angku

Jawek si pangka 4 ka si pangka 1

Insya Allah
Di simak kan baliu nan basamo

Rundiang di kumbalian

Dari si pangka 1 ka si alek 1

Mano angku
Sayo angku
Ka angku ... rundiang ba kumbalian

Laluan lah angku

Di bukik si ulang ali
Di pintu balai nan gadang
Aua sarumpun di ateh nyo
Aua kiramat banamoan
Langkah kok panjang pado kaki
Rundiang ko ado bana nan sumbang
Rila jo maaf dari sayo
Bana ka angku ba tiboan
Arati nyo nan jadi bana di sayo
Mahadok kapado angku
Pihak parundiangan kito tadi
Tarago sayo bausaho
Manyangkuik kan nan tinggi
Manyandakan ka nan gadang

Jikok di sayo lah tadi tu
Dek yakin hati ka dapek
Pangana indak bacabang

Alah basangkuik kan ka nan tinggi
Basandakan ka nan gadang
Lah dapek buah jo bari dek baliiau
Nan jadi bana di angku tadi

Bacabiak siriah nan katangah
Bagatok pinang nan ta unjuak
Kan bana baitu rundiang angku ...

..... iyo bana

Di bana angku nan katangah
Nan ka jadi jawek nyo dek kami
Di hadapan baliiau nan basamo

Insya Allah, angku
Nan siriah kami cabiak
Nan pinang kami gatok
Alah ka sanang hati angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Barilah maaf banyak banyak
Basicapek angku sayo jalang

Di bunyi nan sayo danga
Di rupo nan sayo pandang
Di hadapan baliiau nan basamo
Parundiangan kito tadi
Tarago angku ba usaho

Manyanguik kan ka nan tinggi
Manyandakan ka nan gadang
Jikok di angku lah tadi tu
Alah basanguik kan ka nan tinggi
Basandakan ka nan gadang

Buah jo bari dek baliiau
Insya Allah, siriah kami cabiek
Nan pinang ka kami gatok
Alah ka sanang hati angku
Bana baitu rundiang angku

..... iyo bana

Nan sayo tuntuik kahadapan angku ...
Iyolah rundiang nan sado itu
Dek siriah alah ka bacabiak
Nan pinang alah ka bagatok
Alhamdulillah kajawek nyo

Bakaoan sakali angku

Jawek si panga 1 ka si alek 1

Insy Allah kami kaoan

Panyambahan Batanyo Susudah Sirih Di Cabiak

*Ket : sabagian nagari, kito di panggia datang karumah,
untuak manakok atau mancari hari baralek, sampai
di rumah nan kito tuju, kito di suruah makan siriah jo
parundiangan, atau sabaliak nyo, kito nan ma anta
kan siriah jo parundiangan, tapi indak di sabuik kan
apo mungkasuik siriah nan katangah, mako kito bisa
batanyo sasudah siriah kito cabiak, apo mungkasuik
siriah nan katangah, **contoh iko dari kito nan datang***

Panyambahan batanyo susudah sirih di cabiak

Mano angku

Sayo angku

Ka angku rundiang ba tiboan

Laluan lah angku

Tasabuik tanjuang nan ampek

Lubuak nan tigo alah tantu

Ganggaman parpatiah nan sabatang

Jo salam tangan sayo angkek

Rila jo maaf ka pangulu

Jo bana angku sayo jalang

Sungguah pun ka angku

Rundiang sayo tiboan

Taga dek luruih batujuan

Rundiang nan tibo bakeh angku ...

Jari tasusun kanan rapek

Salam kapado nan basamo

Kahadapan silang nan bapangka

Jumlah karajo nan bajunjuang

Taruik ka urang ampek jinih

Bako baki jo pasumandan

Karik baik jo ipa bisan

Salam di sinan di tiboan

Ado pun salam nan ka sayo tiboan
Mahadok kapado angku
Lakek lah pulo pitua nyo

Mahukum di ateh kato
Manyiang tampek nan tumbuah
Manimbang bakeh nan ado
Tumbuah sarupo iko kini

Pado sababanta iko tadi
Di rupo nan kami caliak
Lah ba katangahan siriah jo pinang
Langkok timbakau jo daun nyo

Jikok di kami lah tadi tu
Siriah sahalai lah bacabiak
Pinang sa didih lah bagatok

Pado wakatu iko kini
Pikiran baiak nan lah tumbuah
Mufaham kokoh nan lah timbua
Cinto pikiran nak di bukak
Batin tasimpan nak taruah
Kilanan hati nan taraso

Kok kalam ka kami sigi
Nan kabua mintak di pajaleh
Ado kolah ujuik jo mungkasuik
Siriah sahalai nan kami cabiak

Pinang sa didih nan kami gatok
Lah di makan ba sirah bibia
Pareso maruang tubuah
Sajuak anggoto ka tujuh nyo
Kalek nyo tingga di rakuangan

Kok lai nan taraso di hati
Nan ta elang elang pado mato

Jan siang ba habih hari
Nak jan malam bahabih minyak
Itu nyo rundiang nan katangah
Di harok bunyi nak kumbali
Pulang ma alum pado angku

Panyambahan Manyiriah **(Nan Panjang)**

Ket : panyambahan manyiriah nan panjang ko, nan lazim di pakai untuak batagak gala atau malewakan gala pangulu, nan kaduo di pakai dalam alek ma anta marapulai kukito lah balain nagari, juo buliah di pakai untuak ma anta marapulai kalau marapulai itu kamanakan kanduang dek pangulu nan sedang manganggam jabatan pangulu.

Panyambahan manyiriah nan panjang

Ket : sabalun di mulai di imbau dulu babarapo urang pangulu nan hadir dalam alek

- 1 . Angku datuak salam jo maaf pado angku
- 2 . Angku datuak ... salam jo maaf pado angku
- 3 . Angku datuak ... salam jo maaf pado angku
- 4 . Angku datuak ... salam jo maaf pado angku

Ujuang salam ka angku

Takalo sayo ka marambah
Di ladang koto marapak
Baringin patah ta timpo
Hanyuik kasiak badarai darai
Sayo anjuang salam jo lidah
Alah sa izin niniak mamak
Langkok sagalo rang sumando
Indak lah sayo cadiak pandai

Bari basuji langan baju
Cindai di ambiak kabasahan
Bajaik sangkuik tiok tapi
Adaik rang kayo jo pangulu
Limbago kato sayo pasambahan
Tando alamaik putiah hati

Tantangan sambah jo manyambah
Kok kurang taratik jo mujilih
Kok kurang lelo jo sopan
Dek cameh sumangek hilang
Sambah manyambah kapado Allah
Kok talipua sayo di barih
Maaf ka angku di puhunkan
Jo bana angku sayo jalang

Walaupun angku iyo surang
Nan tasabuik ta imbaukan gala
Mako sarapek nyo pulo lah
Angku jo pangulu sayo
Nan gadang basa batuah
Nan cadiak nan tau pandai
Cadiak lai buliah ka baguru
Tau lai buliah kabatanyo
Tiang adaik sandi aluan
Payuang panji marawa basa
Nyawa nagari adaik kato
Ujuang adaik pangka balabeh
Hulu aia impunan buluah
Pusek jalo pumpunan ikan
Tali adaik batang limbago
Tampuak alua tangkai pusako
Bungo nyo intan jo pudi
Mangkuto di dalam alam

Duduak jo barih jo balabeh
Tagak jo adaik jo pusako
Undang balukih pamenan nyo

Mamacik kato kabanaran
Salilih bapantang sumbiang
Sapadi bapantang luak
Nan sanitiak tiado hilang
Sabarih tak buliah lipua

Walau bak mano dareh angin
Bogo bak mano ragam kato
Miki bak mano bunyi gandang
Jikok bak mano dabua ombak
Sampai mamacah ateh karang
Tatagak pucuak nan balingka
Basilang dahan kayu aro
Satapak bapantang suruik
Nan bana tatap bapasuntiang

Arati nyo pangulu sayo itu
Arah kayu gadang di tengah koto
Ba urek tunggang ka bumi
Ba pucuak cewang ka langik
Ba urek badaun rimbun
Ba bungo ba buah labek

Urek nyo tampek baselo
Batang nyo tampek basanda
Daun nyo tampek balinduang
Tampek balinduang kapanasan
Tampek bataduah ka hujan

Iyo dek anak kamanakan
Nan sapayuang jo sapatagak
Di bawah payuang di lingkuang cupak
Manjala masuak nagari
Kapai tampek batanyo
Ka pulang tampek ba barito

Kok kusuik nan ka manyalasai
Kok karuah nan ka manyaniahi
Hukum adia kato nyo bana
Sapakaik warih mandirikan
Sasuai mangko takanak
Sa ukua mangko manjadi

Tasabuik pulo dalam papatah
Patitih cupak jo gantang
Nan balumbuang ba hilaman gadang

Ka bakeh nan kayo pai bagurau
Ka bakeh rajo main padang
Tampek pandeka main silek
Tampek nan mudo main catua
Bakeh kuriak barulang makan
Bakeh taduang barulang mandi
Itu lah kabasaran nyo
Angku pangulu sayo itu
Urang nan gadang basa batuah
Nan cadiak nan tau pandai
Salam di sinan di tiboan

Salam nan kaduo sayo unjuak kan
Kapado 'alim jo ulama
Sarato imam jo khatib nyo
Tasabuik urang ampek jinih
Nan sa isi sidang juma'aik
Nan ampek jurai musajik
Tau ba hadih jo badalia
Pandai ba mantiak ba ma'ani

Nan tau hala jo haram
Mambesokan sunaik jo paralu
Kok syarak usah di etoang
Kok nahu usah di bilang
Hukum fekah mahia sakali

Caramin nan tiado kabua
Palito nan tiado padam
Umpamo bulan jo matohari
Elang gumelang cahayo nyo
Manarangi sakalian 'alam

Iyo bana huku agamo
Ikutan kito hamba Allah
Aia mandi rang palauik
Tapiian mandi rang pasampan
Indak basibak jo basisiah
Indak bahinggo jo babateh
Dalam saruan sayo juo

Salam di sinan di tiboan
Salam nan katigo sayo unjuak kan
Kapado nan cadiaik tau pandai
Nan arih sarato bijak sano
Indak nyo tau tau sajo
Indak nyo pandai pandai sajo

Nan tau ereang jo gandeang
Nan tau cakah jo kaik
Nan tau hala jo haram
Nan tau awa jo akia
Nan tau di koroang kampuang
Nan tau mularaik jo manfa'aik

Tau di tinggi ka ma impok
Tau di gadang ka malendo
Tau di rantiang ka manyangkuik
Tau di duri ka mancucuak
Tau di bayang kato sampai
Tau di angin nan basiru
Tau di ombak nan basabuang
Tau di raso jo pareso
Indak nyo pandai pandai sajo
Pandai mangaji baso basi
Pandai ma agak ma agiahan
Pandai ma atak ma etokan
Pandai mangantang aia lauik
Pandai manyalam dalam bumi
Pandai ma uleh rumin putuih
Ma uji samuik dalam batu
Paga adaik benteang pusako

Jikok taradok ka lauiktan
Nankodo di dandang panjang
Mandi batimbo aia masin
Bagalah jo jari manih
Badayuang jo tapak tangan
Walau ka angok angok ikan
Bogo ka nyawa nyawa patuang
Patah kapak batungkek paruah

Namun nan niaik dalam hati
Mungkasuik tatap basampai kan

Bacupak bagantang panuah
Salilih bapantang sumbiang
Tak buliah luak sapadi
Cupak adaik labuahan kato
Nareco lauiktan budi
Tapi samantang pun baitu

Mako sarapek nyo pulolah
Dunsanak jo sudaro
Bako baki jo pasumandan
Taruih ka urang ampek jinih

Duduak balega di nan rapek
Basanda ka tiang panjang
Bapacik ka tali taguah
Dalia jo firman di al kur'an
Tarang dek kito nab basamo

Nan ampek barih ka duduak an
Nan tigo langgam paseloan
Hinggo paran picak malintang naiak
Bandua pipih malintang turun

Sabujua rumah nan panjang
Salega rumah nan gadang
Manyasak ka papan sariang
Tibo ka sandi alua adaik
Tinggi tabayang tampak nyato
Tajorok ka gulang gulang
Malimpah lalu ka hilaman
Di ateh rumpuik sicambai ani naiak
Di linduangi awan simabua rampai turun
Sahinggo riak badabua mudiak
Salingka gunuang singgalang
Saedaran gunuang marapi
Salilik gunuang pasaman
Hinggo sikilang aia bangih

Pasia banda sapuluah
Hinggo taratak aia hitam
Sampai ka tanjuang simalidu
Bajajo ka indopuro

Lantak supadan rajo mudo
Jo baliau daulaik sya'i 'alam
Maruhun basa ampek balai
Sumarak reno tanjuang bungo

Hulu jantuang limpo bakuruang
Lubuak hati tapian mato
Suntiang pamenan bundokanduang
Sumarak 'alam pulai paco

Ka johor lalu ka patani
Ka simun ka batang asai
Ka arab ka banda nata
Ka makah lalu ka madinah
Ka ruhun ka banda cino
Ka aceh ka koroang dalam
Ka gudam ka balai janggo

Nan barajo jo badaulaik
Ba rajo ka pagaruyuang
Ba asa ka pariangan
Nan baradaik ka batipuah

Lah sampai sayo ka sanan
Ma antakan rundiang panyambahan
Jo muko nan amaik janiah
Jo hati nan amaik suci

Gayuang balangkah ba balabeh
Tukang ba lukih ba tiruan
Di sabuik kato baiyasi
Lakeh papatah ibaraik nyo

Kacimpuang pamenan mandi
Rasian pamenan lalok

Kok indak tajajak tajalani
Jo maaf rundiang sayo atok

Rundiang sayo salam balirik
Sayo palirikan di hadapan
Iyo lah angku jo pangulu
Nan gadang basa batuah
Sarato urang ampek jinih
Ujuang salam pado angku

Adapun salam nan ka sayo tiboan
Mahadok kapado angku

Takalo adaik ka badiri
Mulo limbago ka di tuang
Lah sudah cupak jo gantang
Cupak adaik labuahan kato
Nareco lauiktan budi
Tapi samantang pun baitu

Ampek hari sasudah itu
Rapek lah basa ampek balai
Di balai balairoang panjang
Di dalam koto duo baleh

Tali adaik batang limbago
Tampuak alua tangkai pusako
Mamacik kato kabanaran
Di dalam cupak nan piawai

Adaik limbago iko kini
Di hulu mato hari tabik
Pija badarang hari siang
Kato kato medan pangulu
Lauiktan medan parahu
Siriah jo pinang medan adaik

Puntiang tahantak ka hulu nyo
Di bawah kiliran taji
Asa mulo kato dahulu nyo

Tigo limbago nan tajali

Partamo sambah manyambah
Nan kaduo baso jo basi
Sambah manyambah dalam adik
Ka tuhan sajo di puhunkan

Tali batali dalam undang
Tasabuik ba muluik manih
Tapakaian baso jo basi
Di dalam bungka nan piawai
Iyo lah taraju nan bagotok
Adaik banamo sopan santun
Katigo siriah jo pinang
Langkok timbakau jo daun nyo
Pado wakatu iko kini
Lah talayang siriah ka tengah
Lah talatak ka hadapan angku
Tibo di muko nan basamo

Badaga batang katindiah
Kutiko di dalam padi
Lah tampak sayo ka manyiriah
Tando alamaik putiah hati

Badantuang bunyi rabano
Di gua nak rang koto gadang
Siriah talatak di carano
Indah nan bukan alang alang

Loroang kapado lai siriah hyo
Siriah nyo udang tampak hari
Tampuak nan bagai kuku balam
Tagurabak gagak ka hinggok
Jilongak tiuang ka tabang
Lantiak bak alang manari
Gagang nyo jawek bajawek
Aka nyo malingka alam
Batahun dalam guluangan
Bamusim di biliak dalam

Indak kalayua tambah hiduik
Makanan anak rajo rajo
Makanan basa jo pangulu
Talatak ateh carano

Loroang kapado carano nyo
Carano banja reno ali
Babulan ba kapuak kapuak
Ba ukia jo sadang tinggam
Loyang nyo kuniang manyinganga
Baru kalua di tuangan
Tuangan agam balai guruh
Buatan sariak sungai pua

Lai basaok ba iyasi
Balampih kain di lua
Kain sikalaik dari judah
Baturab jo banang makaf
Basuji jo banang ameh
Tenggok batenggok pucuak rabuang
Aka cino jangkau jangkauan
Pucuak paku galuang galuangan
Camin kaciak bintang tatabua
Maratuih camin di tapi nyo
Di tengah bacamin bulek
Pancaliak adaik pusako
Di gatiuh urang ba asang
Di cukia urang ba paruah
Di tanun anak bidodari
Lukisan datang di sarugo
Acuan dari banda ruhun
Pakirim rajo dari siam
Buatan nak rang saniang baka
Kini manjadi kabasaran
Kabasaran angku jo pangulu
Panyaok siriah di carano

Loroang kapado lai pinang nyo
Pinang nyo ranah gunuang rajo
Tumbuhan di padang ka dataran

Urek nyo selo baselo
Batang nyo tinggi linguyaran
Tampak di jirek balai gamba
Satahun upiah nyo lareh
Samusim salodang jatuah
Kuniang sakarek tampak hari
Bulek sabagai talua buruang
Siang hari bak bulan panuah
Malam bak bulan ampek baleh
Tinggi nyo kaik kaitan
Randanyo jombo jomboan
Batahun tupai dek mamanjek
Haram basuo jo buah nyo
Sampai kini ko alun juo
Pinang biluluak balah ampek
Pinang nyo dasun balah duo
Pakirim sutan maningkaliang
Lauik sailan bakeh lalu
Sambilan pulau ka basauah
Tibo di tangan saudaga kayo
Darek banamo banda padang
Kambuik ameh kadam suaso
Kadam anak rang koto tengah
Rampak bak bungo kacubuang
Rimbun bak kalikih jantan

Loroang kapado lai sadah nyo
Sadah nyo si dani hari
Banamo karang bajantiak
Satahun di panggang bugih
Samusim di panggang cino
Di kipeh dek ambai ambai
Di turap jo aia bungo
Di pati jo pati santan
Di palik jo jari manih
Bakisa ka jari tunjuak
Mambayang ka tapak tangan
Sapalik sapuluah ameh
Sakadan sakati limo
Harago nan indak taragoi

Harago satimbang jo nagari
Sadang wakatu iko kini
Kalau rang bali tak di jua
Jikok di mintak buliah sajo

Loroang kapado lai gambia nyo
Gambia nyo dari sarilamak
Pucuaq nyo hijau mudo mudo
Di tanam di dalam parak
Di tumbuaq di lasuang tingga
Gadih manumbuak joloang gadang
Alu kamuniang baru sudah
Ayam mamupua joloang turun
Siriah nyo indak mangupalang
Tuangan perak ba ukia
Buatan nak rang payokumbuah

Loroang kapado lai santo nyo
Santo nyo lumuik tarandam
Tulang nyo si capuak rajo
Daun nyo panau bidodari
Tanam rang ranah batu taba
Jangko rang guguaq si kaladi
Langgaian baru joloang sudah
Anak nyo jarang rapatan
Cincin nan arek di kalingkiang
Haluih saik nyo nak rang gando
Agak an batu baraguang
Tiruan sumpu jo malalo
Di racik si santi ameh
Di jamua si santi alam
Indak nyo masiak dek paneh
Masiak dek ambun tengah malam
Sasiuik di makan api
Harum batahun pajalanan

Loroang kapado lai daun nyo
Daun nyo rantau mudiak padang
Umbuik bataruak mudo mudo
Di ambiak nak rang ampalu

Di jamua nak rang tujuh koto
Di jamua di pabitesan
Antaro tiku jo piaman
Di siram jo kasiak haluih
Ambun manyiram patang pagi
Putiah bak sayok layang layang
Kuniang bak kasah birauwati

Malin putiah mangarang sangkok
Sangkok di karang di halaman
Makan siriah salai lah rokok
Nak sanang hati sipangkalan

Sakitu rundiang dari sayo
Di harok bunyi nak kumbali
Pulang ma alum pado angku

Panyambahan Manyusun Dudaak

Ket : panyambahan manyusun dudaak iko, nan lazim di
pakai, untuak melewakan gala pangulu, ado juo di
pakai dalam alek ma anta marapulai kutiko anak
daro jo marapulai balain nagari

Panyambahan manyusun dudaak **Dari si pangka ka si alek 1**

Mano angku
Sayo angku
Ka angku rundiang sayo tiboan
Laluan lah angku

Tantangan sambah jo manyambah
Kok kurang taratik jo mujilih
Kok kurang lelo jo sopan
Dek cameh sumangek hilang
Sambah manyambah kapado Allah
Kok talipua sayo di barih
Maaf ka angku di puhunkan
Jo bana angku sayo jalang

Sungguah pun iyo ka ka angku
Parundiangan sayo tibo kan
Mako sarapek nyo pu lolah
Angku jo pangulu sayo
Nan gadang basa batuah
Nan cadiak nan tau pandai

Cadiak lai buliah ka baguru
Pandai lai buliah kabata nyo
Tiang adaik sandi aluan
Payuang panji marawa basa
Nyawa nagari adaik kato
Salam di sinan di tiboan

Sungguah pun iyo nan sado itu
Mako sarapek nyo pu lolah
Sagalo dunsanak jo sudaro
Karik baik jo ipa bisan
Langkok sagalo ayah bundo
Taruih kapado adiak kakak
Ali sa isi rumah nangko

Indak tabilang jo ta atok
Hanyo lah nan pambilang jo pa atok
Panyusun pa mulia kan salam

Ado pun salam sayo itu salam balirik
Sayo palirik kan ka hadapan
Angku jo pangulu sayo
Nan gadang basa batuah
Nan cadiak nan tau pandai
Ujuang salam bakeh angku

Arati nyo salam nan ka sayo tiboan
Mahadok kapado angku

Awa mulo rundiang di sabuik
Samo manyarah pado Allah
Samo mangikuik kato nabi
Allah ta'ala kayo sungguah
Rasul tuhan nabi muhammad
Pangulu sakalian alam
Ikutan arab jo isilam

Tapi samantang pun baitu
Dalam nareco bayang adaik
Adaik nan ba talago buek
Cupak nan tarang samato
Taga dek sipaik nan badiri

Adaik limbago iko kini
Mahukum di ateh kato
Manyiang tampek nan tumbuah
Manimbang tampek nan ado
Tumbuah sarupo iko kini

Rupo lah samo kito caliak
Alek di saru alah tibo
Jamu di panggia alah datang
Lah samo duduak ateh rumah

Sapihak ka duduak an angku
Kok kurang susun nyo nan bak siriah
Kurang lirik nyo bak mambatua
Barih di ujuang kok ka pangka
Patuik di pangka kok ka ujuang
Alua di tengah kok ka tapi
Jangko di tapi kok ka tengah
Ipa bisan taparampiangan

Takilaf juaro tantang itu
Nak babari suko jo rila
Sakitu rundiang nan katangah
Aluran barih nak bapaek
Aluran takuak nak batabang
Nak samo tibo di tampek nyo
Pulang ma alum pado angku

Jawek : si alek 1 ka si pangka

Lah sampai di angku
Sakiro alah angku
Ka angku lai
Palalu lah angku

Loroang di rundiang nan katangah
Badiri mungkin jo patuik
Sarantak paham jo bicaro
Lahia jo batin sa ukuran
Ka tuhan tangan tatadah
Barih balabeh sayo turuik
Jo maaf sayo bukak kato
Bana ka angku batiboan

Sapanjang rundiang nan katangah
Di danga lah baiak bunyi
Kok di pandang lah rancak rupo
Kurang tak ado ka panukuak
Senteang tak ado ka pambilai

Di ateh baretoang di nan cukuik
Jikok mambilang lai sampai
Tibo gayuang takanak sambuik
Datang kato badiri jawab

Tapi samantang pun baitu
Lamak siriah lega carano
Lamak kato di lega bunyi
Samantaro sayo balega
Rundiang jo angku di latak an
Kato di simpan jo mufakaik
Pulang ma alum pado angku

Jawek : si pangka ka si alek 1

Lah sampai di angku
Sakiro alah angku
Ka angku lai
Laluan lah angku

Di tiliak takadin kato
Di timbang nareco adaik
Takilek cupak jo gantang
Rila jo maaf dari sayo
Nyampang kurang rukun jo saraik
Jo bana angku sayo jalang

Arati nyo nan jadi bana di angku
Mahadok kapado sayo
Di ateh duduak nan sa amparan
Di tagak nan sa pematang
Baban surang ka babulati
Baban basamo ka bapa iyo kan
Mananti sayo sakutiko

Bana baitu rundiang angku

..... Iyo bana

Di kabanaran angku nan ka tengah
Jalan nan luruih ka ba tampuah
Labuah nan pasa ka baturuik
Cupak tatagak ka ba isi
Limbago tacakah ka batuang
Adaik badiri ka ba pakai
Alah pakaian di pangulu
Insya Allah, sayo nanti

Jawek : si alek 1 ka si pangka

Lah sampai di angku
Sakiro alah angku
Ka angku lai
Palalu lah angku

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Kalaluan nyo ba sicapek
Nan jadi bana di angku
Di bunyi nan sayo danga
Di rupo nan sayo pandang
Di hadapan baliu nan basamo
Capek kandak angku bari
Di ateh kandak buliah pintak balaku
Insya Allah, sayo laluan

Jawek : si pangka ka si alek 1

Insya Allah nanti

Jawek : si alek 1 ka si pangka

Insya Allah, sayo laluan angku

*Ket : baiyo dulu **si pangka 1** jo **pangka 2** sesudah
baiyo, rundiang di kumbalian*

Pakolahan untuak mencari kato mufakat

Dari si Alek 1 ka si alek 2

Mano angku
Sayo angku
Ka angku rundiang ba tiboan
Laluan lah angku

Katangah salam ta kambang
Kapado sagalo tuan rumah
Walau indak bajawek tangan
Salam balirik kasado nyo
Rundiang kok ado ba nan sumbang
Pado tuhan tangan tatadah
Sayo nak mintak di maaf kan
Ka angku bana tatumpah nyo

Arati nyo rundiang nan sayo tiboan
Mahadok kapado angku
Pado sabanta iko tadi
Lah tibo parundiangan dari si pangka
Kapado kito sakalian alek
Buah rundiang baliau nantun
Bisiak lah samo ka dangaran
Jikok imbau alah talampau
Di hadapan kito nan basamo

Jikok di sayo lah tadi tu
Baganjua suruik bak batanam
Buah rundiang sayo tarimo
Nan kandak alun babari

Pintak nan alun ba palakuan

Ba'a nan kini nangko
Di kandak nan ka mambari
Di pintak nan ka mampalakuan
Di ma ka tumbuhan ibaraik bijo
Di ma katabik nan bak padi

Iko lah bana sayo tiboan
Mahadok kapado angku
Pulang ma alum pado angku

Jawek : si alek 2 ka si alek 1

Lah sampai di angku
Sakiro alah angku
Ka angku lai
Laluan lah angku

Nan senjang makanan papek
Nan sayuik samo di uleh
Nan senteang makanan bilai
Jo maaf rundiang sayo ankek
Tutua sayo kok tak tabateh
Jo maaf rundiang di pasampai

Nan jadi bana di angku tadi
Mahadok kapado sayo
Pado sabanta iko tadi
Lah tibo parundiang dari si pangka
Kapado kito sakalian alek
Buah rundiang baliu nantun
Bisiak lah samo kadangan
Jikok imbau alah talampau
Di hadapan kito nan basamo

Sapihak ka diri angku
Ka bapiliah rimah nan taserak
Basemba paco panguntianan
Ba'a ka baiak ka elok nyo

Pulang ma alum pado sayo
Bana baitu kato angku

..... Iyo bana

Kabanaran angku nan katangah
Tareh lah labiah bak di indak
Janiah nyo labiah bak di basuah
Lah dalam barih jo balabeh
Di kandung adat jo pusako
Bana nyo di bao lalu

Lalu nyo di kaji nan sado itu
Sapihak ka diri sayo
Ka suok dapek malengoang
Ka kida dapek mancaliak
Mancari bijo gak sabuah
Bijo di tanam musim kini

Kok untuang pambari Allah
Bijo tatanam pupuak tibo
Sudah takabuak hujan datang
Kok lai capek mangarang bungo

Bungo nak samo di pasuntiang
Buah nak samo kito makan
Lai koh adaik nan baitu
Nyato pusako nan bak kian
Pulang ma alum pado angku

Jawek : si alek 1 ka si alek 2

Lah sampai di angku
Sakiro alah angku
Ka angku lai
Laluan lah angku

Adaik jo syarak sajinjangan
Dek sakato mako batuah
Kok salisiah kusuik nagari

Ka angku rundiang ba tibuon
Pado tuhan tangan tatadah
Ka angku rundiang kumbali

Nan jadi bana di angku tadi
Mahadok kapado sayo
Ka ba anjak anjak bak manuga
Ba baliak baliak bak mamanggang
Lai koh adat nan baitu
Nyato pusako nan bak kian
Pulang ma lum pado sayo
Bana baitu rundiang angku

..... Iyo bana

Di kabanaran angku... nan ka tengah
Kurang tak ado ka panukuak
Senteang tak ado ka pambilai
Bana nyo di bao lalu

Lalu nyo di kaji nan sado itu
Nan rajo kato mufakaik
Nan bana kato saiyo
Alah pakaian bana di pangulu
Saba mananti malah sayo

Jawek : si alek 2 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Kamudian rundiang basicapek
Basicapek sayo jo angku

Kabanaran angku nan katangah
Di bunyi nan sayo danga
Di rupo nan sayo pandang

Nan rajo kato mufakaik
Nan bana kato saiyo
Alah pakaian di pangulu
Ka bana baitu rundiang angku

..... iyo bana

Nan sayo tuntuik kapado angku ...
Iyo lah rundiang nan sado itu
Ba ato nyo lai kini
Di ateh kandak buliah pintak balaku

Insya Allah angku

Sayo lengoangan suok jo kida
Mananti angku

Jawek : si alek 1 ka si alek 2

Insya Allah sayo nanti

*Ket : musti nyo mufakaik dulu si alek 2 jo si alek 3 di
anggap alah salasai, contoh pakolahan nyo indak kito
buek, lansuang sajo rundiang di kumbalian dari si
alek 2 ka si alek 1*

Rundiang di kumbalian

Dari si alek 2 ka si alek 1

Mano angku

Sayo angku.....

Ka angku rundiang di kumbalian
Laluan lah angku

Kok di agak tujuan kato
Nyato taraju tak bapaliang
Dalam sari'aik nan bapakai
Bana nareco bayang adaik
Manuruik barih cupak gantang
Cupak lah tarang samato

Ibaraik bulek tak basandiang
Limbago nan sayuik kito bilai
Dalam sari'aik jo hakikaik
Jo bana angku sayo jalang

Arati nyo bana nan ka sayo kumbalian
Mahadok kapado angku
Antaro sayo jo angku
Sapihak parundiangan kito tadi
Di ateh tagak nan tananang
Kutiko duduak ta antaro

Mancari bulek nan sagiliang
Mancari pipiah nan salayang
Jikok di sayo lah tadi tu
Duduak kato ba paiyoan
Tagak kato ba pamolahan

Dapek lah bulek nan sagiliang
Basuo pipiah nan salayang
Bahimpun kato ka mupakaik
Manyuruikan sirih ka gagang
Mangumbalian pinang ka tampuak
Nak di angku tarabik nyo
Pulang ma alum pado angku

Jawek si alek 1 ka si alek 2

Lah sampai di angku
Sakiro alah angku
Ka angku lai
Laluan lah angku

Batipuah nagari gadang
Sapuluah anak koto nyo
Bapaga kubu bakuliliang
Tuan gadang duduak di sinan
Rundiang kok ado banan sumbang
Barilah maaf badan sayo
Dalam bulek jan tampak sandiang
Ka angku rundiang bana batiboan

Nan jadi bana dek angku tadi
Mahadok kapado sayo
Di ateh duduak nan sa amparan
Di tagak nan sapamatang

Antaro sayo jo angku
Panek nan bakeh baranti
Patang nan bakeh bamalam
Tarago angku duduak baiyo
Tagak bakato jo bamolah

Jikok di angku lah tadi tu
Duduak kato ba paiyokan
Tagak kato ba pamolahan
Lah dapek bulek nan sa giliang
Basuo picak nan salayang

Manyuruikan siriah ka gagang nyo
Mangumbalian pinang katampuak
Mamintak bunyi dari sayo
Bana baitu kato angku

..... Iyo bana

Di kabanaran angku nan katangah
Lah dalam barih jo balabeh
Di lingkuang adat jo limbago
Tapi samantang pun baitu

Nan jadi bana di sayo
Mahadok kapado angku
Nak balega siang jo malam
Nak baganti patang jo pagi

Manyuruik kan siriah ka gagang
Mangumbalian pinang ka tampuak
Elok nak bunyi dari angku
Pulang ma alum pado angku

Jawek si alek 2 ka si alek 1

Lah sampai di angku
Sakiro alah angku
Ka angku lai
Laluan lah angku

Kito sa ujuik sa pangana
Adat berundiang dalam rapek
Tando baradat di nagari
Mancari mufakaik dalam sidang
Dahulu kato basitina
Kamudian rundiang basicapek
Rila jo maaf pamanuahi
Jo bana angku sayo jalang

Arati nyo nan jadi bana di angku ...
Mahadok kapado sayo
Nak balega siang jo malam
Nak baganti patang jo pagi

Manyuruik kan siriah ka gagang
Mangumbalian pinang ka tampuak
Elok nak bunyi dari sayo
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku
Mahadok kapado sayo
Lah dalam barih jo balabeh
Di lingkuang cupak jo gantang
Lah nyato adaik nan bapakai

Tapi samantang pun baitu
Nan jadi bana di sayo
Mahadok kapado angku
Aluran badan diri sayo

Dapek bakandak di nan lai
Buliah batenggang di nan ado
Manyuruik kan siriah ka gagang
Mangumbalian pinang ka tampuak
Sayo mintak bunyi dari angku
Jo mufakaik sayo samoi
Pulang ma alum pado angku

Jawek si alek 1 ka si alek 2

Lah sampai di angku
Sakiro alah angku
Ka angku lai
Laluan lah angku

Rundiang nan tibo dari angku
Takilek bagai caramin
Tabayang umpamo paneh
Mangilek mangalimantang
Rundiang kalua kok nyo ragu
Barilah maaf lahia batin
Kok indak nan sayuik nan ta uleh
Jo bana angku sayo jalang

Arati nyo nan jadi bana di angku ...
Mahadok kapado sayo
Aluran badan diri angku
Nak nyato ba bunta adaik
Tantu di lipek jo limbago

Adaik nyo panggang ka babaliak
Nak tau masak matah nyo
Adaik nyo kato ka barulak
Nak tau asa mulo jadi
Nak tau rancak nyo bijo
Di samayan tumbuhan nyo baniah

Aluran gayuang ka manyambuik
Isi nyo kato ka manjawab
Rancak di sayo tarabik nyo

Jo mufakaik angku samoi
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku ...
Mahadok kapado sayo
Elok bak paneh sudah hujan
Tarang bak bulan ampek baleh
Di hadapan baliu nan basamo

Antaro sayo jo angku
Kaba unyuik unyuik indak patuuh
Ka bapilin pilin indak sariang
Indak lah banamo patuik

Tuah ka samo kito cari
Malu ka samo kito japuik
Ba'a nan kini nangko
Insya Allah, angku
Siriah di suruik kan ka gagang nyo
Pinang di kumbalian ka tampuak nyo

Tapi samantang pun baitu
Nan jadi bana di sayo
Mahadok kapado angku
Karano kaki ka talangkah
Nan tangan ka tajambo

Alam nan basifat gawa
Manusia basifat khilaf
Kok tasuo di kaji nan sado itu
Rumah tampak jalan tak tantu
Kabua pandangan ba kuliliang
Pulang ma alum pado angku

Jawek si alek 2 ka si alek 1

Lah sampai di angku

Sakiro alah angku
Ka angku lai
Laluan lah angku

Nan salilik gunuang marapi
Saedaran gunuang pasaman
Barih balabeh ranah minang
Langkah kok panjang pado kaki
Rila jo maaf di puhun kan
Jo bana angku sayo jalang

Di bunyi nan sayo danga
Di rupo nan sayo pandang
Di hadapan baliu nan basamo
Sapihak ka diri angku

Nan gayuang alah ka basambuik
Kato nan alah ka bajawab
Tapi sapihak ka diri angku
Karano kaki ka talangkah
Nan tangan lah ka tajambo
Alam nan basifaik gawa
Manusia basifaik khilaf
Rumah tampak jalan tak tantu
Pulang ma alum pado sayo
Bana baitu kato angku
..... Iyo bana

Arati nyo nan jadi bana di angku ...
Mahadok kapado sayo
Lah dalam barih jo balabeh
Di kanduang adaik jo pusako

Karano baliu lai rapek duduak di siko
Indak ka bapabia tagamang angku do
Alah ka sanang hati angku

Jawek si alek 1 ka si alek 2

Lah sampai di angku

Sakiro alah angku
Ka angku lai
Laluan lah angku

Adaik limbago hutang tumbuah
Dalam undang tasabuik juo
Ameh samato tahan uji
Sayo susun jari nan sapuluah
Gawa jo khilaf kok basuo
Ka angku rundiang kumbali

Arati nyo nan jadi bana di angku
Di bunyi nan sayo danga
Di rupo nan sayo pandang
Kok sasek lai ka basapo
Tadoroang lai ka basintak
Kan bana baitu rundiang angku

..... iyo bana

Nan di tuntui nyato ka bakeh angku ..
Iyo lah rundiang nan sado itu
Ba'a nan kini nangko
Karano kandak alah buliah
Nan pintak alah balaku
Insya Allah, angku
Sayo suruik kan siriah ka gagang
Sayo kumbalian pinang katampuak
Basimak kan dek angku

Jawek si alek 2 ka si alek 1

Insya Allah
Baliau basamo manyimak kan

Rundiang di kumbalian

Dari si alek 1 ka si pangka

Mano angku

Sayo angku
Ka angku rundiang ba kumbalian
Laluan lah angku

Pikia nan palito hati
Nanang nan baribu aka
Aniang itu hulu bicaro
Sampai kini jadi padoman
Langkah kok panjang pado kaki
Bintiak jo ragi kok batuka
Barilah maaf badan sayo
Ka angku bana batiboan

Arati nyo bana nan ka sayo kumbalian
Mahadok kapado angku
Sapihak pa rundiangan kito tadi
Di indang di tampi tareh
Di piliah atah ciek ciek
Basisiah atah jo bareh
Bareh caruah di bao pulang
Dadak lah tingga di manukuik
Talalai sayo di kincia
Indak banyak nan tabao pulang

Tantangan lamo jo lambek
Sarato labiah jo kurang
Iko lah bana nan sayo tiboan
Mahadok kapado angku
Pulang ma alum pado angku

Jawek si pangka ka si alek 1

Lah sampai di angku
Sakiro alah angku
Ka angku lai
Laluan lah angku

Nan sulik hanyuik ka hulu
Kalau bacupak di nan data
Baitu warih cupak gantang

Bari maaf sayo dek pangulu
Rundiang kok indak di nan bana
Jo bana angku sayo jalang

Arati nyo nan jadi bana di angku ...
Mahadok kapado sayo
Antaro sayo jo angku
Panek nan bakeh baranti
Patang nan bakeh bamalam
Tarago angku duduak baiyo
Tagak bakato jo bamolah

Jikok di angku lah tadi tu
Duduak kato ba paiyokan
Tagak kato ba pamolahan
Di indang di tampi tareh
Di piliah atah ciek ciek
Basisiah atah jo bareh

Bareh caruah di bao pulang
Dadak lah tingga di manukuik
Tantangan lamo jo lambek
Sarato labiah jo kurang
Kok talalai sayo di kincia
Pulang ma alum pado sayo
Bana baitu kato angku

..... Iyo bana

Di bana angku nan katangah
Lah dalam barih jo balabeh
Di kanduang adat jo limbago
Alah dalam cupak jo gantang

Hanyo harapan dari sayo
Antaro sayo jo angku
Tantangan lamo jo ambek
Sayo bari angku suko jo rila

Tantangan labiah jo kurang
Singkek di ambiak ka ukuran
Panjang di ambiak ka balabeh
Samo kito pakai kaduo nyo
Alah ka sanang hati angku

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Daulu kato basitina
Kamudian rundiang basicapek
Basicapek sayo jo angku

Di bunyi nan sayo danga
Di rupo nan sayo pandang
Kandak buliah pintak balaku
Insya allah, sayo kumbalian
Basimakan di angku

Jawek si pangka ka si alek 1

Insya Allah
Di simakan baliau nan basamo

Dari si alek 1 ka si pangka

Mano angku
Sayo angku
Ka angku rundiang ba kumbalian
Laluan lah angku

Sungguah pun iyo angku surang
Nan di tuntuik di imbau gala
Batin dek adat nan basamo
Pangana batin ka nan rapek
Ujuik nyo salam ka nan banyak

Nyato tawalak ka ukuran
Tabayang barih jo balabeh
Iyo bak andai kato bida
Takana curiang nan dauhu
Di andai pusako lamo

Mahukum di ateh kato
Manyiang tampek nan tumbuhan
Manimbang tampek nan ado
Tumbuhan sarupo iko kini

Rupo lah samo kito caliak
Alek di saru alah tibo
Jamu di panggia alah datang
Lah samo duduak ateh rumah

Sapihak ka duduak an baliau
Kok kurang susun nyo nan bak siriah
Kurang lirik nyo bak mambatua

Barih di ujuang kok ka pangka
Patuik di pangka kok ka ujuang
Alua di tengah kok di tapi
Jangko di tapi kok katangah
Ipa bisan taparampiangan

Takilaf juaro tantang itu
Nak babari suko jo rila
Sakitu rundiang nan katangah

Aluran takuak nak ba tabang
Aluran barih nak bapaek
Nak samo tibo di tampek nyo
Pulang ma alum pado sayo
Bana baitu rundiang angku

..... Iyo bana

Nan jadi bana di angku tadi
Mahadok kapado sayo

Jikok di sayo lah tadi tu
Sakiro gayuang baru nan basambuik
Sakiro kato baru nan bajawek
Nan kandak alun babari
Ba'a nan kini nangko
Karano ayam lai barinduak
Nan siriah lai bajunjuang
Di kandak nan ka mambari
Di pintak nan ka mampalakuan

Sayo sangkuik kan ka nan tinggi
Sayo sandakan ka nan gadang
Mananti angku samantaro
Pulang ma alum pado angku

Jawek si pangka ka si alek 1

Lah sampai di angku
Sakiro alah angku
Ka angku lai
Laluan lah angku

Jikok nyo lareh koto pili
Lareh nyo balanggam tujuhah
Baitu pitua ranah minang
Kok salah toloang pelok i
Sayo susun jari na sapuluah
Jo bana angku sayo jalang

Arati nyo nan jadi bana di angku ...
Mahadok kapado sayo
Sakiro gayuang baru nan ba sambuik
Sakiro kato baru nan bajawab

Ba'a nan kini nangko
Gantiang putuih biang nak tabuak
Di kandak nan ka mambari
Di pintak nan ka mampalakuan
Sayo sangkuik kan ka nan tinggi
Sayo sanda kan ka nan gadang

Antaro sayo jo angku
Rundiang di latak dalam barih
Kato di simpan jo mufakaik
Mananti angku samantaro
Bana baitu rundiang angku

..... Iyo bana

Di kabanaran angku... nan katangah
Karano lah jalan adaik nan ba pakai
Silang tak ado ka pa amfang
Patuik tak ado ka pa ungkai
Insya Allah sayo nanti

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Daulu kato basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Kalaluan nyo ba sicapek
Di bunyi nan sayo danga
Di rupo nan sayo pandang
Sapihak rundiangan angku tadi
Angku lepeh biduak nak balayia
Pelang mananti di muaro
Kan bana baitu rundiang angku

..... Iyo bana

Di kabanaran angku ... nan katangah
Nan sayo tuntuik ka hadapan angku..

Iyo lah rundiang nan sado itu
Karano kandak buliah pintak balaku
Insya Allah, sayo laluan angku

Jawek si pangka ka si alek 1

Insya Allah, sayo nanti

Dari si alek 1 ka si alek ka 4 atau pangulu

Mano angku
Sayo angku
Ka angku rundiang ba kumbalian
Palalu lah angku

Sa ujuik salam jo simpuah
Sabarek bungka nan piawai
Nareco luruih main daun
Di dalam sidang ka rapatan
Sayo susun jari nan sapuluah
Nyampang tak tapek buah andai
Ka tuhan sayo mintak ampun
Rundiang ka angku batiboan

Arati nyo rundiang nan ka sayo tiboan
Mahadok kapado angku
Di parundiangan sayo tadi
Jo diri silang nan bapangka
Sakiro jajak baru nan batikam
Batang baru nan sayo titih
Nan kandak alun lai babari
Pintak alun bapalakuan

Ba'a nan kini nangko
Di kandak nan kamambari
Di pintak nan ka mampalakuan
Iko lah bana sayo tibokan
Mahadok kapado angku
Pulang ma alum pado angku

Jawek si alek 4 ka si alek 1

Lah sampai di angku
Sakiro alah angku
Ka angku lai
Laluan lah angku

Nan tuo luak tanah data
Nan bunsu luak limo puluah
Luak agam luak nan tengah
Jadi pusako ranah minang
Bintiak jo ragi kok batuka
Sayo susun jari nan sapuluah
Pado tuhan sayo manyambah
Jo bana angku sayo jalang

Arati nyo nan jadi bana di angku ...
Jo diri silang nan ba pangka
Sakiro jajak baru nan batikam
Sakiro batang baru nan batitih
Nan kandak alun babari

Ba' a nan kini nangko
Di kandak nan ka mambari
Di pintak nan ka mampalakuan
Iko lah bana nan batiboan pado sayo
Bana baitu kato angku

..... Iyo bana

Di kabanaran angku nan katangah
Lah dalam barih jo balabeh
Di lingkuang cupak jo gantang
Tapi samantang pun baitu
Sapihak kapado diri sayo

Sayo tabang kayu sabatang
Sayo karek ujuang jo pangka
Di sisiak dahan jo rantiang
Sayo ambiak di tengah tengah

Kok lai dapek ka tonggak tuo

Samantaro sayo batenggang
Mananti angku dalam adaik
Pulang ma alum pado angku

Jawel si alek 1 ka si alek 4

Lah sampai di angku
Sakiro alah angku
Ka angku lai
Laluan lah angku

Nampak basuriah bak sipasin
Jajak bak bakiak alah nyato
Dalam aia guriah mangasan
Nak suci lahia jo batin
Barilah maaf badan sayo
Ka angku rundiang batiboan

Arati nyo nan jadi bana di angku ...
Mahadok kapado sayo
Sapihak ka diri angku
Ba niaik sungguah dalam hati

Nak manabang kayu sabatang
Angku karek ujuang jo pangka
Ba sisiak dahan jo rantiang
Angku ambiak di tengah tengah
Kok lai dapek ka tonggak tuo

Samantaro angku batenggang
Mananti sayo dalam adaik
Pulang ma alum pado sayo
Bana baitu rundiang angku

..... Iyo bana

Di kabanaran angku nan katangah
Lah dalam barih jo balabeh

Di lingkuang adat jo pusako
Bana nyo di bao lalu
Lalu nyo di kaji nan sado itu
Insya Allah, sayo nanti angku

Jawek si alek 4 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Lalu nyo di kaji ba sicapek
Di bunyi nan sayo danga
Di rupo nan sayo pandang
Kandak buliah pintak balaku
Insya Allah, sayo laluan

***Ket : musti nyo mufakaik dulu antaro si alek 4 jo si alek 5
dll sasudah baiyo kato di kumbalian
Contoh pakolahan si alek 4 jo si alek 5 indak kito
buek***

Kato bakumbalian

Dari si alek 4 ka si alek 1

Mano angku
Sayo angku
Ka angku rundiang ba kumbalian
Palalu lah angku

Kalau mambilang dari aso
Jikok mangaji sampai sudah

Tuah di caliak ka nan manang
Kok sasek tujuang kato kato
Pado tuhan tangan tatadah
Jo bana angku sayo jalang

Arati nyo bana nan ka sayo kumbalian
Mahadok kapado angku
Sapihak pa rundiangan kito tadi
Tinggi batang lambek ka jatuhah
Jauah bajalan lamo babaliak

Tarago sayo dek ba tenggang
Tantangan kandak ka mambari
Di pintak nan ka mampalakuan
Tatumpah juo ka diri sayo

Jikok di sayo lah kini tu
Babulek kan aia ka pambuluah
Ba himpun kato ka mufakaik

Bakandak kami ka angku
Jan ayam sikua duo dabiak nyo
Apo nan tacoreang tabarih dek angku ..
Kami basamo lah dalam itu
Pulang ma alum pado angku

Jawek si alek 1 ka si alek 4

Lah sampai di angku
Sakiro alah angku
Ka angku lai
Laluan lah angku

Di balah batuang tigo balah
Sumbiang baliuang tigo jari
Cancang tak tapek ba andasan
Di anjuang salam jo lidah
Barang nan gawa di ampuni
Ka angku rundiang ba tiboan

Arati nyo nan jadi bana di angku ...
Di bunyi nan sayo danga
Di rupo nan sayo pandang
Jan ayam sikua duo dabiah nyo

Apo nan tacoreang tabarih dek sayo
Angku alah di dalam itu
Jo mufakaik angku samoi
Kan bana baitu rundiang angku

..... Iyo bana

Di bana angku nan katangah
Lah di dalam barih jo balabeh
Di lingkuang adat jo pusako
Bana nyo di bao lalu
Lalu nyo di kaji nan sado itu
Insya Allah, angku
Di agiah kandak pihak si pangka

Tapi karano kaki ka malangkah
Di tangan nan ka tajsayo
Alam nan basipaik gawa
Manusia basipaik khilaf
Pulang ma alum pado angku

Jawek si alek 4 ka si alek 1

Lah sampai di angku
Sakiro alah angku
Ka angku lai
Laluan lah angku

Niniak moyang punyo pitua
Sampai kini jadi padoman
Jadi pakaian rang di minang
Adat ba kato ba sitina
Rila jo maaf di puhun kan
Jo bana angku sayo jalang

Arati nyo nan jadi bana di angku ...
Mahadok kapado sayo
Karano kaki ka malangkah
Di tangan nan ka tajambo

Alam nan basipaik gawa
Manusia basipaik khilaf
Pulang ma alum pado ambo
Bana baitu rundiang angku

..... Iyo bana

Di ka banaran angku... nan katangah
Takilek bagai padoman
Tabayang umpamo paneh
Nan jadi ujuik mungkasuik nyo
Tasimpan di diri sayo

Insya Allah, angku

Karano baliu lai basamo
Indak ka bapabia tagamang angku

Alah ka sanang hati angku

Jawek si alek 1 ka si alek 4

Karano kandak alah buliah
Nan pintak alah balaku
Sayo kumbalian ka asa nyo angku ...
Basimak kan di angku

Jawek si alek 4 ka si alek 1

Insya Allah
Di simak kan baliu nan basamo

Rundiang di kumbalian

Dari si alek 1 ka si pangka

Mano angku
Sayo angku
Ka angku rundiang ba kumbalian
Palalu lah angku

Sa ujuik salam jo simpuah
Sabarek bungka nan piawai
Nareco luruih main daun
Di dalam sidang karapatan
Sayo susun jari nan sapuluah
Nyampang tak tapek buah andai
Ka tuhan sayo mintak ampun
Rundiang ka angku batiboan

Ado pun rundiang nan ka sayo kumbalian
Mahadok kapado angku
Sapihak parundiangan kito tadi
Tarago sayo ba usaho
Manyanguik kan ka nan tinggi
Manyandakan ka nan gadang

Jikok di sayo lah tadi tu
Alah basanguik kan ka nan tinggi
Lah basanda kan ka nan gadang
Nan ka jadi sauik jo sapo nyo

Dari kami si alek jamu
Nak jan siang bahabih hari
Nak jan malam bahabih minyak
Elok kacak gamak lah sedang
Hari elok angin salasai
Lah sedang rancak di ansua bakarajo
Pulang ma alum pado angku

Jawek si alek 1 ka si pangka

Lah sampai di angku
Sakiro alah angku
Ka angku lai
Laluan lah angku

Daulu kato basitina
Kamudian rundiang basicapek
Dek nan sunaik wajib kok tingga
Jan hilang galuak dek manimbo
Basicapek sayo jo angku

Arati nyo nan jadi bana di angku ...
Di rupo nan sayo pandang
Di bunyi nan sayo danga
Elok kacak gamak lah sadang
Lah sadang rancak di ansua ba karajo
Kan bana baitu rundiang angku

..... Iyo bana

Di kabanaran angku nan katangah
Bak mandi di anak sungai
Bagai di kipeh angin lalu
Alah manyanang dalam hati

Insya Allah, angku
Kami ansua bakarajo angku
Alah ka sanang hati angku

Jawek lansuang :

Dek alah ka ba ansua bakarajo
Alhamdulillah kajawek nyo

Jawek lansuang :

Insya Allah
Kami ansua bakarajo angku

Panyambahan Maminang

Ket : panyambahan maminang iko. Ado nan sarangkai jo panyambahan siriah, ado juo nan di pakai tapisah panyambahan siriah jo panyambahan maminang

Panyambahan maminang

Dari si alek 1 ka si pangka 1

Mano angku
Sayo angku.....
Ka angku rundiang ba tiboan
Laluan lah angku

Di pikia tujuan kato
Niaik jo naza balabuahan
Rundiang sabuah sayo gamak
Lamo di bungkuh kok nyo usang
Gawa jo kilaf kok basuo
Nyampang tasabuik di nan bukan
Rila jo maaf sayo mintak
Jo bana angku sayo jalang

Sungguah pun angku... nan di tuntuik
Nan di sabuik nan di imbau gala
Batin dek adaik nan basamo
Pangana batin ka nan rapek
Ujuak nyo salam ka nan banyak

Nan duo barih kaduduak an
Nan tigo langgam paseloan
Sabujua rumah nan panjang
Salega rumah nan gadang
Hinggo paran picak malintang naiak
Bandua pipih malintang turun
Salam di sinan di tiboan

Adopun salam nan ka sayo tiboan
Kalau basiang di nan tumbuhan
Jikok manimbang di nan ado
Tumbuhan sarupo iko kini

Aluran badan diri kami
Alah bulek mangko di giliang
Lah pipiah mangko di layangan
Kami di lapeh niniak mamak
Suruahan ayah jo bundo
Mambao kato jo buatan

Jikok di badan diri kami
Sajak satapak turun tanggo
Mulo salangkah dari rumah
Jalan nan luruih kami tampuah
Labuah nan goloang kami turuik
Labuah kaciak candai tajelo

Bapaga pudiang aia ameh
Pudiang hitam barumpun rumpun
Pudiang geni babatang batang
Raso ka tinggi rang pangkasi
Raso ka randah ba anjuang kan

Halaman carano bancah
Kasiak nyo lumuik bak ditintiang
Balinggam namo tanah nyo
Walilam namo kasiak nyo
Kamar kamar namo rumpuik nyo

Tatagun langkah di halaman
Ka naiak pintu tabukak
Ka duduak lapiak takambang
Lah tibo kami di siko
Di ateh rumah iko kini

Kiro sabanta sa kutiko
Lah batimbang baso jo basi
Di caliak kapado barih adaik

Panek alah ba parantian
Palak alah ba paranginan

Sadang tananang bana datang
Paham tibo aka baranti
Takana pasan nan di bao
Ijab sabuah kami ganggam
Nan di lapeh niniak jo mamak
Sarato ayah jo bundo

Kato sapatah nak batimbang
Baitu adaik minangkabau
Angku.... manaruah kumbang tabang
Kami baniaik nak mancakau

Nak asah siang bak hari
Nak nyato tarang bak bulan
Kamanakan angku si
Jo si kito patunungan

Kami mohon kandak nak babari
Nan pintak ba palakuan
Sakitu rundiang dari sayo
Kok tasuo labiah jo kurang
Di harok bunyi nak kumbali
Pulang ma alum pado angku

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku
Adaik ampek asa nyo ampek
Pituah dari tigo luak
Lapeh karantau katigo nyo
Pusako kito ranah minang
Jo salam rundiang sayo angkek
Rila jo maaf sayo mintak
Gawa jo kilaf kok tasuo

Jo bana angku sayo jalang

Arati nyo nan jadi bana di angku ...
Mahadok kapado sayo
Nan taserak ka nan labuak
Nan tatabua di tengah rapek
Di danga lah baiak bunyi
Di pandang lah elok rupo

Kurang tak ado kapanukuak
Senteang tak ado ka pambilai
Tapi samantang pun baitu

Nan batua di tanah makah
Padoman kito nan basamo
Daratan bagunuang tinggi
Lauik basa bapulau banyak

Manjalang dapek bijo baiak
Isi nyo kandak ka mambari
Sayo cari pulau ka basauah
Sinan parahu di layiakan
Pulang ma alum pado angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Ujuik andai buah rundiangan
Bapalun paham nan haluih
Dalam lilitan aka budi
Salam indak bajawek tangan
Lahia jo batin jan ba diguih
Ka angku rundiang kumbali

Di bunyi nan sayo danga
Di rupo nan sayo pandang

Di hadapan baliu nan basamo
Di ateh duduak nan sa amparan
Di tagak nan sapamatang

Sa pihak ka diri angku
Bukik nan tinggi nak badaki
Lurah dalam nak baturuni
Alam nan leba nak bapandang
Mancari gandang ka paningkah
Isi nyo talempong ka panalun
Si paik mananti malah sayo
Di harok bunyi nak kumbali
Bana baitu rundiang angku

..... Iyo bana

Di rundiang angku ... nan katangah
Sirah nak tibo di kasumbo
Hitam nak lakek ka kudarang
Nyato di dalam barih adaik
Silang tak ado ka pa amfang
Patuik tak ado ka pa ungkai
Insya Allah, sayo nanti

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Lalu nyo di kaji ba si capek
Di bunyi nan sayo danga
Di rupo nan sayo pandang

Di hadapan baliu nan basamo

Gagai lah ka pucuak bulek
Nak basuo urek tunggang nyo
Kali lah ka urek tunggang
Nak basuo pucuak bulek nyo
Pulang ma alum pado sayo
Kan bana baitu rundiang angku

..... iyo bana

Di bana angku nan katangah
Nan sayo tuntuik pado angku

Iyo lah rundiang nan sado itu

Ba ato nyo lai kini
Dek angku urang panyantun
Nan kandak capek babari
Dek pintak buliah kandak balaku
Insya Allah, angku

Sayo laluan, angku

Jawek si alek 1 ka si pangka 1

Insya Allah, sayo nanti

*Ket : baiyo dulu **si pangka 1** jo **pangka 2** sasudah baiyo,
rundiang di kumbalian*

Rundiang baiyo

Dari si pangka 1 ka si pangka 2

Mano angku

Sayo angku.....

Ka angku rundiang ba tiboan

Laluan lah angku

Assalamu'alaikum dari muluik
Warahmatullah panyudahi

Tando nyo kito sa andiko
Rundiang kok salah dek manyabuik
Maaf jo rila pa manuahi
Ka angku ... rundiang tatumpah nyo

Arati nyo bana nan ka sayo tiboan
Mahadok kapado angku
Lah datang rundiang dari si alek
Kapado kito silang nan bapangka
Juma lah karajo nan bajunjuang

Buah rundiang baliau nantun
Bisiak lah samo kadangaran
Imbau lah samo kalampauan
Di hadapan kito nan basamo

Manuruik kaji nan biaso
Nan kato mangandaki jawab
Nan gayuang mangandaki sambuik
Tapi samantang pun baitu

Di gayuang nan ka manyambuik
Di kato nan ka manjawab
Di ma ka tumbuhan ibaraik bijo
Di ma ka tabik umpamo padi
Iko lah rundiang sayo tiboan
Mahadok kapado angku
Ba'a kabaik ka elok nyo
Di harok bunyi nak kumbali
Pulang ma alum pado angku

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Di kana tujuan rundiang
Di hadapan niniak jo mamak

Urang sa adaik sapusako
Dalam bulek kok nampak sandiang
Barilah maaf banyak banyak
Ka angku rundiang kumbali nyo

Nan jadi bana di angku
Mahadok kapado sayo
Lah tibo rundiang dari si alek
Kapado kito silang nan bapangka
Jumlah karajo nan bajunjuang

Buah rundiang baliu itu
Nan kato mangandaki jawab
Kok gayuang mangandaki sambuik

Pado wakatu iko kini
Di kato nan ka manjawab
Tipak di gayuang kamanyambuik
Di ma ka tumbuah ibaraik bijo
Di ma ka tabik umpamo padi
Pulang ma alum pado sayo
Bana baitu rundiang angku

..... iyo bana

Di bana angku nan katangah
Cucua ka bumi nampak nyato
Elang di timpo paneh garang
Tapi samantang pun baitu
Sapihak ka diri sayo

Lamak siriah lega carano
Rancak kato di lega bunyi
Samantaro sayo balega

Rundiang jo angku di latak kan
Kato di simpan jo mufakaik
Lai koh dalam barih adaik
Pulang ma alum pado angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Salam nan tibo bakeh sayo
Takilek barih jo balabeh
Kiro nyo alua bapatutan
Gawa jo khilaf kok basuo
Maaf di rundiang kok tak kameh
Maaf ka angku di tiboan

Nan jadi bana di angku tadi
Sapihak ka diri angku
Lamak siriah lega carano
Rancak kato di lega bunyi
Samantaro angku balega

Rundiang jo sayo di latak kan
Kato di simpan jo mufakaik
Lai koh dalam barih adaik
Pulang ma alum pado sayo
Kan bana baitu rundiang angku
..... iyo bana

Di kabanaran angku nan katangah
Lah dalam barih jo balabeh
Di dalam cupak jo gantang
Bana nyo di bao lalu

Lalu nyo di kaji nan sado itu
Lah jalan adaik ka bapakai
Silang tak ado ka pa amfang
Patuik tak ado ka pa ungkai
Insya Allah, angku
Sayo nanti kabanaran angku

Jawek si pangka 2 ka s pangka 1

Lah sampai di angku
Sakiro alah angku
Ka angku lai
Laluan lah angku

Kato daulu ba sitina
Kamudian rundiang ba sicapek
Ba si capek sayo jo angku
Kalaluan nyo ba sicapek

Di bunyi nan sayo danga
Di rupo nan sayo pandang
Di hadapan baliu nan basamo
Kandak buliah pintak balaku

Insy Allah, angku
Sayo japuik ka hulu nyo
Sayo caliak sampai ka muaro

Jawek si pangka 1 ka si pangka 2

Sayo nantian angku

*Ket : musti nyo baiyo dulu **si pangka 2** jo **si pangka 3** dll
tapi contoh baiyo **si pangka 2** jo **si pangka 3** indak di
buek, kito anggap salasai, mako rundiang di
kumbalian*

Rundiang ba kumbalian

Dari si pangka 2 ka si pangka 1

Minangkabau punyo pitua
Jadi pakaian niniak jo mamak
Tando baradat di nagari
Dalam adat sabatang panjang
Dahulu kato basitina
Rila jo maaf sayo mintak

Elok lah kato di simpani
Jo bana angku sayo jalang

Arati nyo bana nan ka sayo kumbalian
Mahadok kapado angku
Pado wakatu iko kini
Antaro sayo jo angku

Panek nan bakeh baranti
Patang nan bakeh ba malam
Tarago sayo duduak baiyo
Tagak bakato jo ba molah

Jikok di sayo lah tadi tu
Duduak kato ba pa iyo kan
Tagak kato ba pamolahan
Mancari bulek nan sagiliang
Mancari pipiah nan salayang

Dek yakin hati ka dapek
Pangana indak bacewang
Ujuik bulek pangana satu
Indak hati bacabang lai
Duduak kato ba pa iyokan
Tagak kato ba pamolahan
Dapek lah bulek nan sagiliang
Basuo pipiah nan salayang
Bahimpun kato ka mupakaik

Manyuruikan sirih ka gagang
Mangumbalian pinang ka tampuak
Nak di angku tarabik nyo
Pulang ma alum pado angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Pitalah jo bungo tanjuang
Ka tigo jo gunuang rajo
Anak koto dari batipuah
Kabasaran nyo dek tuan gadang
Salam jo rundiang sayo anjuang
Khilaf kilapaik kok basuo
Sayo susun jari nan sapuluah
Jo bana angku sayo jalang

Nan jadi bana dek angku tadi
Mahadok kapado sayo
Di ateh duduak nan sa amparan
Di tagak nan sapamatang

Antaro sayo jo angku
Panek nan bakeh baranti
Patang nan bakeh bamalam
Tarago angku duduak baiyo
Tagak bakato jo bamolah

Jikok di angku lah tadi tu
Duduak kato ba paiyokan
Tagak kato ba pamolahan
Bulek lah jantuang ka kalupak

Manyuruikan siriah ka gagang nyo
Mangumbalian pinang katampuak
Mamintak bunyi dari sayo
Bana baitu kato angku

..... Iyo bana

Di kabanaran angku nan katangah
Lah dalam barih jo balabeh
Di lingkuang adat jo limbago
Tapi samantang pun baitu

Nan jadi bana di sayo
Mahadok kapado angku

Nak balega siang jo malam
Nak baganti patang jo pagi

Manyuruik kan siriah ka gagang
Mangumbalian pinang ka tampuak
Elok nak bunyi dari angku
Pulang ma alum pado angku

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Pihak di rundiang nan katangah
Takilek bagai caramin
Mambayang umpamo paneh
Dari timua datang nyo cewang
Ka tuhan tangan tatadah
Nak samo suci lahia batin
Kok untuang di gunjai nan tauleh
Jo bana angku sayo jalang
Arati nyo nan jadi bana di angku ...
Mahadok kapado sayo
Nak balega siang jo malam
Nak baganti patang jo pagi
Manyuruik kan siriah ka gagang
Mangumbalian pinang ka tampuak

Elok nak bunyi dari sayo
Pulang ma alum pado sayo
Bana baitu kato angku

..... Iyo bana
Arati nyo nan jadi bana di angku
Mahadok kapado sayo
Lah dalam barih jo balabeh
Di lingkuang cupak jo gantang
Lah nyato adaik nan bapakai

Tapi samantang pun baitu
Nan jadi bana di sayo
Mahadok kapado angku
Aluran badan diri sayo

Lah sapantun jo gariang buto
Di hulu lukah rang tahan
Di baruah tikalak makan
Marapuang si rambang lakek
Mambanam tubo ta puok

Di tengah jariang babega
Agak sulik aka batenggang
Angku lah mambukak kapalo banda
Jo mufakat sayo samoi
Pulang ma alum pado angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Salam talayang tantang alua
Tiok suatu kan bapangka
Niaik jo naza balabuahan
Adat limbago bapancalang
Rundiang kok ado nan basaua
Lahia jo batin kok batuka
Rila jo maaf di puhun kan
Jo bana angku sayo jalang

Arati nyo nan jadi bana di angku ...
Mahadok kapado sayo
Aluran rundiang dari angku
Nak nyato ba bunta adaik
Tantu di lipek jo limbago

Adaik nyo panggang ka babaliak
Nak tau masak matah nyo
Adaik nyo kato ka barulak
Nak tau asa mulo jadi
Nak tau rancak nyo bijo
Di samayan basahan baniah

Aluran gayuang ka manyambuik
Isi nyo kato ka manjawab
Rancak di angku tarabik nyo
Jo mufakaik angku samoi
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku ...
Mahadok kapado sayo
Elok bak paneh sudah hujan
Tarang dek kito nan basamo

Antaro sayo jo angku
Kaba unyuik unyuik indak patuih
Ka bapilin pilin indak sariang
Indak lah banamo patuik
Patuik nyo gayuang di sambuik
Nan kato tantu di jawab

Tuah ka samo kito cari
Malu ka samo kito japuik
Ba'a nan kini nangko
Insya Allah, angku

Siriah di suruik kan ka gagang nyo
Pinang di kumbalian ka tampuak nyo

Tapi nan jadi bana di sayo
Mahadok kapado angku
Karano kaki ka talangkah
Nan tangan ka tajambo

Alam nan basifaik gawa
Manusia basifaik khilaf
Kok tasuo di kaji nan sado itu
Rumah tampak jalan tak tantu
Kabua pandangan ba kuliliang
Pulang ma alum pado angku

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Patitih pamenan andai
Gurindam pamenan kato
Warih parpatiah nan sabatang
Bintiak jo ragi kok batikai
Rila jo maaf dari sayo
Jo bana angku sayo jalang

Di bunyi nan sayo danga
Di rupo nan sayo pandang
Di hadapan baliau nan basamo
Sapihak ka diri angku
Karano kaki ka talangkah
Nan tangan lah ka tajambo

Alam nan basifat gawa
Manusia basifat khilaf
Rumah tampak jalan tak tantu
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku ...
Mahadok kapado sayo
Lah dalam barih jo balabeh
Di kandung adaik jo pusako

Karano baliu lai rapek duduak di siko
Indak ka bapabia tagamang angku do
Alah ka sanang hati angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Kato daulu basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Di bunyi nan sayo danga
Di rupo nan sayo pandang
Kok sasek lai ka basapo
Tadoroang lai ka basintak

Nan sayo tuntuik bakeh angku
Iyo lah rundiang nan sado itu
Ba' nan kini nangko
Karano kandak alah buliah
Nan pintak alah balaku

Insya Allah, angku
Sayo suruik kan siriah ka gagang
Sayo kumbalian pinang katampuak
Basimak kan dek angku

Jawek si pangka 2 ka si pangka 1

Insya Allah
Baliu basamo manyimak kan

Rundiang dikumbalian :

Dari si pangka 1 ka si alek 1

Mano angku
Sayo angku
Ka angku ... rundiang di kumbalian
Laluan lah angku

Kato pitua bundo kanduang = 3 - 6
Jadi pakaian rakyat banyak
Bapakai juo sampai kini
Dalam adat acok tabincang
Jo salam rundiang sayo anjuang
Rila jo maaf sayo pintak
Langkah kok panjang pado kaki
Jo bana angku sayo jalang

Arati nyo bana nan ka di kumbalian
Mahadok kapado angku
Pihak parundiangan kito tadi

Tingga tak kunjuang tajapuik
Singkek tak kunjuang ta uleh
Tarago maninjau lurah jo gunuang
Mancaliak pulau nan bajorok

Dek taluak liku baliku
Dek pulau jorok ba jorok
Dek jalan simpang basapiah

Talayang sampan ka tengah
Sampan tasauah lah tapauik
Kato tak dapek lah ta pikia

Pikia nan palito hati
Nanang nan baribu aka
Aniang itu hulu bicaro
Sadang tananang bana datang
Kato lah putuih sandiri nyo

Bagaluik banang ka sikoci
Punta nan padek bak di simpai
Santuang nan indak lalu angin
Sawajah gayuang manyambuik
Limbago kato ka manjawab
Tatumpah ka diri sayo

Jikok di sayo lah kini tu
Karih tasisik pado pinggang
Padang tasanda pado bahu
Baban lah tibo di kapalo

Barek raso nyo ka bapikua
Ringan raso nyo ka bajinjiang
Barek tak mungkin di geleangan
Ringan tak mungkin di tinggakan

Tapi samantang pun baitu
Antaro sayo jo angku
Bakaji malang jo mujua

Jikok di kaji kamujuran nyo
Bak biduak turun kalautan
Ombak tanang galombang sunyi
Karang tak ado manggajuju
Batang tak ado mambulintang
Salamaik parahu pulang baliak

Jikok di kaji kamalangan nyo
Bak biduak turun kalautan
Ombak kareh galombang gadang
Batang kok banyak mambulintang
Talambek parahu ka labuahan

Iko lah bana nan sayo tiboan
Mahadok kapado angku
Talambek angku dek mananti
Kok panjang parundiangan angku ...
Singkek di sayo ka bari nyo
Pulang ma alum pado angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Aia nan mahantam turun
Pulai nan bapangkek naiak
Manningakan rueh jo buku
Jadi pusako ranah minang
Jari sapuluah sayo susun
Rundiang nan raib kok tabatiak
Mamintak maaf ka pangulu
Jo bana angku sayo jalang

Arati nyo nan jadi bana di angku ...
Mahadok kapado sayo
Jikok di angku lah tadi tu
Lah samisa urang bacatua
Duduak di meja pacaturan

Doroang mandoroang langkah gajah
Dongkak mandongkak langkah kudo
Amaik ma amaik buah catua
Gajah tadoroang kudo masuk
Rajo lah mati sandiri nyo

Bagaluik banang ka sikuci
Punta nan padek bak di simpai
Santuang nan indak lalu angin
Sawajah gayuang manyambuik
Limbago kato manjawab
Tatumpah ka diri angku

Jikok di angku lah kini tu
Sabalun gayuang basambuik
Limbago kato bajawab
Antaro sayo jo angku
Bakaji malang jo mujua

Jikok di kaji kamujuran nyo
Bak biduak turun kalautan
Ombak tanang galombang sunyi
Karang tak ado manggajuju
Batang tak ado mambulintang
Salamaik parahu pulang baliak

Jikok di kaji kamalangan nyo
Bak biduak turun kalautan
Ombak kareh galombang gadang
Batang kok banyak mambulintang
Talambek parahu ka labuahan

Kok talambek sayo dek mananti
Kok panjang parundiangan sayo
Singkek di angku ka bari nyo
Lai koh adaik nan baitu
Pulang ma alum pado sayo
Bana baitu rundiang angku

..... iyo bana

Di bana angku nan katangah
Lah dalam barih jo balabeh
Di lingkuang adaik jo pusako
Rimbun bak bungo kacubuang
Rampak bak bungo kalikih

Bana nyo di bao lalu
Lalu nyo di kaji nan sado itu
Antaro sayo jo angku

Kok talambek angku di jalan
Sayo bari suko jo rila
Tantangan panjang jo singkek
Singkek di ambiak ka ukuran
Panjang di ambiak ka balabeh
Samo di pakai kaduo nyo
Pulang ma alum pado angku

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Di bana angku nan katangah
Di bunyi nan sayo danga
Di rupo nan sayo pandang
Di hadapan baliau nan basamo

Tantangan lamo jo lambek
Angku bari suko jo rila
Kok hanyo panjang jo singkek
Singkek di ambiak ka ukuran
Panjang di ambiak ka balabeh
Samo di pakai kaduo nyo
Kan bana baitu rundiang angku

..... iyo bana

Nan sayo tuntuik kahadapan angku...
Iyo lah rundiang nan sado itu
Dek angku urang pamurah
Nan kandak capek babari
Pintak lai ba palakuan

Insya Allah, angku
Sayo ulangan bagulambek
Basimak kan dek angku

Jawek si alek 1 ka si pangka 1

Insya Allah, angku
Baliau basamo manyimak kan

Rundiang di kumbalian

Dari si pangka 1 ka si alek 1

Mano angku
Sayo angku
Ka angku ... rundiang di kumbalian
Laluan lah angku

Salam talayang di nan rapek
Bungka paliangan ka nareco
Adaik bamain dalam itu
Manuruik barih cupak gantang
Jo salam rundiang sayo angkek
Gawa jo kilaf kok basuo
Maafkan sayo dek pangulu
Jo bana angku sayo jalang

Arati nyo nan jadi bana di sayo
Mahadok kapado angku
Sungguah pun angku... nan di tuntuik
Nan di sabuik nan di imbau gala
Batin dek adaik nan basamo
Pangana batin ka nan rapek
Ujuak nyo salam ka nan banyak

Nan duo barih kaduduak an
Nan tigo langgam paseloan
Sabujua rumah nan panjang
Salega rumah nan gadang
Hinggo paran picak malintang naiak
Bandua pipih malintang turun
Salam di sinan di tiboan

Ado pun salam nan ka sayo tiboan
Kalau basiang di nan tumbuhan
Jikok manimbang di nan ado
Tumbuhan sarupo iko kini

Aluran badan diri kami
Alah bulek mangko di giliang
Lah pipiah mangko di layangan
Kami di lapeh niniak mamak
Suruahan ayah jo bundo
Mambao kato jo buatan

Jikok di badan diri kami
Sajak satapak turun tanggo
Mulo salangkah dari rumah
Jalan nan luruih kami tampuah
Labuah nan goloang kami turuik

Ka naiak pintu tabukak
Ka duduak lapiak takambang
Lah tibo kami di siko
Di ateh rumah iko kini

Kiro sabanta sa kutiko
Lah batimbang baso jo basi
Di caliak kapado barih adaik
Panek alah ba parantian
Palak alah ba paranginan

Sadang tananang bana datang
Paham tibo aka baranti
Takana pasan nan di bao
Ijab sabuah kami ganggam
Nan di lapeh niniak jo mamak
Sarato ayah jo bundo

Kato sapatah nak batimbang
Baitu adaik minangkabau
Angku... manaruah kumbang tabang

Kami baniaik nak mancakau

Nak asah siang bak hari
Nak nyato tarang bak bulan
Kamanakan angku si
Jo si kito patunangan

Sakitu rundiang dari sayo
Limbago kandak nak babari
Nan pintak ba palakuan
Kok tasuo labiah jo kurang
Di harok bunyi nak kumbali
Pulang ma alum pado sayo
Bana baitu kato angku

..... Iyo bana

Kabanaran angku nan katangah
Kurang tak ado ka panukuak
Senteang tak ado ka pambilai
Bana nyo dibao lalu

Lalu nyo di kaji nan sado itu
Jikok di sayo lah tadi tu
Sakiro jajak baru nan batikam
Hanyo batang baru nan batitih
Nan kandak alun babari
Nan pintak alun ba palakuan

Ba ato nyo lai kini
Di kandak nan ka mambari
Di pintak nan ka mampalakuan
Sayo sandakan bana ka pangka nyo
Sayo japuik an ka hulu nyo

Lai koh adaik nan baitu
Nyato pusako nan bak kian
Karano angku ka mananti
Pulang ma alum pado angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Kalau mambilang dari aso
Jikok mangaji sampai sudah
Tuah di caliak ka nan manang
Kok sasek tujuan kato kato
Pado tuhan tangan tatadah
Jo bana angku sayo jalang

Nan jadi bana di angku
Mahadok kapado sayo
Di bunyi nan sayo danga
Di rupo nan sayo pandang
Di hadapan baliau nan basamo

Jikok di angku lah tadi tu
Sakiro jajak baru nan batikam
hanyo batang baru nan batitih
Nan kandak alun babari
Hanyo ba ato nyolai kini
Di kandak nan ka mambari
Di pintak nan ka mampalakuan
Angku sandakan bana ka batang nyo
Bajapuik an bana ka hulu nyo
Mananti sayo sakuti ko
Kan bana baitu rundiang angku

..... iyo bana

Di kabanaran angku nan katangah
Lah dalam barih jo balabeh
Di lingkuang adaik jo limbago
Bana nyo di bao lalu

Lalu nyo di kaji nan sado itu
Balayia nak sampai ka pulau
Manyalam nak sampai ka kasiak
Batenggang angku pado adaik
Saba mananti malah sayo
Pulang ma alum pado angku

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah kamat wakatu habih
Eloklah rundiang basicapek
Basicapek sayo jo angku

Lalu nyo di kaji ba sicapek
Di bunyi nan sayo danga
Di rupo nan sayo pandang
Di hadapan baliau nan basamo
Batenggang sayo pado adaik
Angku pakai sipaik mananti
Kan bana baitu rundiang angku

..... iyo bana

Di bana angku nan katangah
Nan sayo tuntuik kadapan angku ...
Iyo lah rundiang nan asdo itu

Ba ato nyo lai kini
Dek kandak buliah pintak balaku
Pai nak sayo aduan
Pulang nak sayo tanyoan
Mananti angku sakutiko

Jawek si alek 1 ka si pangka 1

Insya Allah, sayo nanti

Jawek si pangka 1 ka si alek 1

Insya Allah, sayo laluan

Ket : baiyo dari **si pangka 1** ka **si pangka 3** atau ka urang sumando/pangulu nan punyo anak jo kamanakan

Dari si pangka 1 ka si pangka 4

Mano angku

Sayo angku

Ka angku rundiang ba tiboan

Laluan lah angku

Waruh nan dari bundo kanduang
Nyato pakaian tigo luak
Lukisan adat nan usali
Pusako dari niniak moyang
Jo salam rundiang sayo anjuang
Rila jo maaf sayo pintak
Langkah kok panjang pado kaki
Jo bana angku sayo jalang

Arati nyo nan jadi bana di sayo
Mahadok kapado angku
Rundangan sayo jo si alek
Sakiro jajak baru nan batikam
Sakiro batang baru nan batitih
Nan kandak alun babari
Ba ato nyo lai kini
Di kandak nan ka mambari
Di pintak nan ka mampalakuan

Dima ka tumbuhan ibaraik bijo
Dima ka tabik ibaraik padi

Ba'a ka baiak ka elok nyo
Iko lah bana nan sayo tiboan
Mahadok kapado angku
Pulang ma alum pado angku

Jawek si pangka 3 ka si pangka 1

Lah sampai di angku
Sakiro alah angku
Ka angku lai
Laluan lah angku

Nan salilik gunuang marapi s
Saedaran gunuang pasaman
Barih balabeh ranah minang
Langkah kok panjang pado kaki
Rila jo maaf di puhun kan
Jo bana angku sayo jalang

Arati nyo nan jadi bana di angku
Mahadok kapado sayo
Pado sabanta iko tadi
Rundiangan angku jo si alek

Sakiro jajak baru nan batikam
Sakiro batang baru nan batitih
Nan kandak alun babari
Nan pintak alun bapalakuan

Pado wakatu kini nangko
Di kandak nan ka mambari
Di pintak nan ka mampalakuan
Ba'a ka baiak ka elok nyo
Pulang ma alum pado sayo
Bana baitu rundiang angku

..... iyo bana

Di kabanaran angku nan katangah
Lah dalam barih jo balabeh

Di kanduang adaik jo limbago
Bana nyo di bao lalu

Lalu nyo di kaji nan sado itu
Sapihak ka diri sayo
Ketek nan lai ba pangasuah
Gadang nan lai ba parintang

Samantaro sayo bausaho
Rundiang jo angku di latak kan
Kato di simpan jo mufakaik
Pulang ma alum pado angku

Jawek si pangka 1 ka si pangka 3

Lah sampai di angku
Sakiro alah angku
Ka angku lai
Laluan lah angku

Nampak basuriah bak sipasin
Jajak bak bakiak alah nyato
Dalam aia guriah mangasan
Nak suci lahia jo batin
Barilah maaf badan sayo
Ka angku rundiang batiboan

Nan jadi bana dek angku tadi
Mahadok kapado sayo
Kalau di tareh di talisiak
Jikok di indang di paberai

Di ambiak ka ujuik paham
Alah nyato titian budi
Tarang di batin ka arifan
Nan sulik bamain budi
Rusuah di khilaf kok nyo tibo

Urang tuo sabuah hukum
Pangulu tantu sa andiko

Ulama jaleh sa kitab
Nak nyo satariak sajinjiang

Samantaro angku balega
Rundiang jo sayo di latak kan
Kato di simpan dalam adaik
Mananti sayo samantaro
Kan bana baitu rundiang angku

..... iyo bana

Di bana angku nan katangah
Lah nyato adaik nan bapakai
Silang tak ado ka pa ampang
Patuik tak ado ka pa ungkai
Jalan rayo titian batu
Saba mananti malah sayo

Jawek si pangka 3 ka si pangka 1

Lah sampai di angku
Sakiro alah angku
Ka angku lai
Laluan lah angku

Kato daulu asitina
Kamudian rundiang basicapek
Ba sicapek sayo jo angku

Kalaluan nyo ba sicapek
Di hadapan baliu nan basamo
Kandak buliah, pintak balaku

insya Allah, angku
Sayo sandakan ka batang nyo
Mananti angku

Jawek si pangka 1 ka si pangka 3

Insya Allah sayo nanti

*Ket : musti nyo baiyo dulu si pangka 3 jo si pangka 4 dll
tapi contoh baiyo indak kito buek, di anggap salasai*

Rundiang ba kumbalian

Dari si pangka 3 ka si pangka 1

Batipuah nagari gadang
Sapuluah anak koto nyo
Bapaga kubu bakuliliang
Tuan gadang duduak di sinan
Rundiang kok ado banan sumbang
Barilah maaf badan sayo
Dalam bulek jan tampak sandiang
Ka angku bana batiboan
Nan jadi bana di sayo
Mahadok kapado angku
Pihak rundiangan kito tadi
Panek nan bakeh baranti
Patang nan bakeh bamalam

Tarago sayo duduak baiyo
Manyangkuik kan ka nan tinggi
Manyandakan ka batang nyo
Hulu nyo sayo mudiak i
Muaro nyo lah sayo silau

Lah bulek jantuang ka kalupak
Nan jadi bana di angku tadi
Jawek nyo sajo sayo asiangan

Lalu nyo di kaji nan sado itu
Nan kajadi jawek nyo dek sayo
Karano angku nan basamo

Mamintak bakeh nan lai
Angku bakandak lai di nan ado
Insya Allah, kandak kami bari
Pintak angku kami palakuan
Alah kasanang hati angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah kamat wakatu habih
Eloklah rundiang basicapek
Basicapek sayo jo angku

Di bunyi nan sayo danga
Di rupo nan sayo pandang
Dek angku urang pamurah
Nan kandak capek babari
Nan pintak lakeh ba palakuan

Nan kami tuntuik nyato
Iyo lah rundiang nan sado itu
Ba'a nan kini nangko
Kandak buliah pintak balaku
Manyanang di dalam hati
Alhamdulillah kajawek nyo

Saketek nyo lai angku

Dek hari basarang tinggi
Arek nan ba pamacik
Taguah nak ba panganggaman
Apo koh karajo ka kito kakok

Panyambahan Minum Kawa

Mano angku
Sayo angku
Ka angku rundiang ditiboan
Laluan lah angku

Alua patuik jalan batampuah
Sabarih pantang di asak
Baitu adaik ranah minang
Sayo susun jari nan sapuluah
Rila jo maaf sayo mintak
Jo bana angku sayo jalang

Sungguah pun iyo bakeh angku
Di tiboan salam jo parundiangan
Mangko sarapek nyo pulolah
Angku pangulu sayo
Nan gadang basa batuah
Nan cadiak nan tahu pandai

Cadiak lah buliah ka baguru
Tahu lah buliah kabata nyo
Tiang adaik sandi aluan
Payuang panji marawa basa
Nyawo nagari adaik kato

Hulu aia impunan buluah
Pusek jalo pumpunan ikan
Tali adaik batang limbago
Tampuak alua tangkai pusako
Bungo nyo intan jo pudu
Mangkuto di dalam alam

Ado pun pangulu sayo itu
Nan bak kayu gadang di tengah koto
Baurek taguah ka bumi
Bapucuak cewang ka langik
Urek nyo bakeh baselo

Batang nyo bakeh basanda
Daun nyo bakeh balinduang

Bakeh balinduang ka panas
Bakeh ba taduah ka hujan
Iyo dek anak kamanakan
Nan sapayuang sapatagak
Di bawah payuang di lingkuang cupak
Manjala masuak nagari

Ka pai tampek bata nyo
Ka pulang bakeh ba barito
Kusuik nan kamanyalasai
Kok kauruah ka manyaniahi
Hukum adia kato nyo bana
Sapakaik warih mandirian

Sarato kito nan basamo
Nan rapek bakarapatan
Baiak dunsanak jo sudaro
Karik baik jo ipa bisan
Taruih ka urang ampek jinih
Ali saisi rumah nangko

Indak di bilang jo di atok
Hanyo lah nan pambilang jo patok
Panyusun, pamuliakan sambah
Sambah jo titah di pulangan pado allah
Ujuang salam sayo tiboan pado angku...

Salam nan ka sayo tiboan
Mahadok kapado angku
Diatesh duduak nan baropok
Di tagak nan bapusu
Tumbuhan sarupo iko kini

Adaik nan batalago buek
Cupak nan batalago panuah
Di gantang nan duo baleh
Taga dek iyo rahib dunia

Suri tarantang daule nyo
Imbalan kato nan sapatah

Basua batando jadi
Paham nan lungga lungga arek
Nyato senjang bak camin karah
Bak buah ranum ka ujuang
Di juluak galah tak sampai
Di jambo tak mungkin dapek
Lah mabuak dikiro kiro

Sadang di bimbang nan baitu
Lalu di turuik di ampiri
Kiro nyo bapaga kawek
Dalam kawek bapaga harek
Sulik di paham marateh nyo
Taga dek luruih batujuan
Nyato pusako ba enggeran

Usah maluak malambangi
Elok di dalam janji mulia
Di lingkuang buek nan bakarang
Langgam adaik ba ateh tumbuah
Limbago ba ateh rupo
Tumbuah sarupo iko kini

Dek niaik sa panjang hari
Dek naza sapanjang jalan
Habih hari baganti pakan
Habih pakan baganti bulan
Habih bulan baganti tahun
Habih tahun musim batuka
Adaik bapakai salamo nyo

Nak asah siang bak hari
Nak nyato tarang bak bulan
Tapi samantang pun baitu
Antaro kito jo angku

Lah bak umpamo buruang pipik
Salayok suok jo kida
Sa bondong hilie jo mudiak
Ba balun balun jo awan
Ba benta benta di udaro
Tabang ka padang ribu ribu

Litak tibo hauih lah datang
Hinggok di rimbo nan batumpak
Singgah baranti lapeh payah
Nak minum ambun nan sa titiak
Mamakan buah bungo rumpuik

Nan lai nak samo kito makan
Nan indak samo kito cari
Kilek jo bayang kito pakai
Pulang ma alum pado angku

Panyambahan Urak Selo (Batang Sajo)

Mano angku
Sayo angku
Ka angku rundiang ba tiboan
Laluan lah angku

Warih nan dari bundo kanduang
Nyato pakaian tigo luak
Lukisan adat nan usali
Pusako dari niniak moyang
Jo salam rundiang sayo anjuang
Rila jo maaf sayo mintak
Langkah kok panjang pado kaki
Jo bana angku sayo jalang

Sungguah pun iyo ka bakeh angku ...
Salam jo rundiang di tiboan
Mako sarapek nyo pulolah
Angku jo pangulu sayo
Nan gadang basa batuah
Nan cadiak nan tau pandai

Cadiak lah buliah ka baguru
Pandai lai buliah ka bata nyo
Tiang adaik sandi aluan
Payuang panji marawa basa
Nyawa nagari adaik kato
Salam di sinan di tiboan

Sungguah pun iyo nan sado itu
Mako sarapek nyo pulo lah
Sagalo dunsanak jo sudaro
Karik baik jo ipa bisan
Sarato adiak jo kakak
Ali nan sa isi rumah nangko

Indak tabilang jo ta atok
Hanyo nan pambilang jo pa atok
Panyusun pa mulia kan salam
Lai salam sayo nantun
Di palirik kan ka hadapan
Angku jo pangulu sayo
Nan gadang basa batuah
Nan cadiaik nan tau pandai
Ujuang salam bakeh

Arati nyo salam nan ka sayo tiboan
Mahadok kapado angku

Awa mulo rundiang di sabuik
Samo manyarah pado Allah
Samo mangikuik kato nabi
Allah ta'ala kayo sungguah
Rasul tuhan nabi muhammad
Pangulu sakalian alam
Ikutan arab jo isilam

Tapi samantang pun baitu
Dalam nareco bayang adaik
Adaik nan ba talago buek
Cupak nan tarang samato
Taga dek sipaik nan badiri
Adaik limbago kini nangko
Manyiang tampek nan tumbuah
Manimbang tampek nan ado
Tumbuah sarupo iko kini

Di hulu mato hari tabik
Piya badarang hari siang
Lauik tan medan parahu
Kato kato medan pangulu
Adaik taluak tumpuan kapa
Adaik gunuang tapatan kabuik

Batin nyo sipaik nan badiri
Di langgam adaik nan bajinih
Dalam adaik cupak nan panuah

Di gantang nan duo baleh
Ayam tapacik di juaro
Padang tapacik di pandeka

Kain balipek dalam peti
Ameh babilang dalam puro
Pandai mambilang di nan ganjia
Pandai mamapa di nan banyak

Parahu balayia di lauitan
Langkok pandarek jo pangayuah
Cukuik kamudi jo padoman
Dapek di angin nan salasai
Salamaik parahu pulang baliak

Pado wakatu iko kini
Angin tanang galombang sunyi
Bakandak kami ka angku

Kok kabuik nan katarabang
Limbago hujan nak taserak
Aia nak ilia ka muaro
Ikan nak pulang ka dabuan
Nangkodo nak tingga di parahu
Sakitu rundiang nan katangah
Kilek jo bayang kito pakai
Pulang ma alum pado angku

Panyambahan Urak Selo

Dari si alek 1 ka si pangka 1

Mano angku
Sayo angku.....
Ka angku rundiang ba tiboan
Laluan lah angku

Tantangan sambah jo manyambah
Kok kurang taratik jo mujilih
Kok kurang lelo jo sopan
Dek harok langkah tajambo
Dek cameh sumangek hilang
Sambah manyambah pado Allah
Rila jo ma'af sayo mintak
Jo bana angku sayo jalang

Sungguah pun ka angku
Di puhun kan salam jo parundiangan
Mangko sarapek nyo pulolah
Angku pangulu sayo
Nan gadang basa batuah
Nan cadiak nan tau pandai

Cadiak lai buliah ka baguru
Pandai lai buliah ka bata nyo
Tiang adaik sandi aluan
Pauyang panji marawa basa
Nyawa nagari adaik kato

Hulu aia himpunan buluah
Pusek jalo pumpunan ikan
Tali adaik batang limbago
Tampuak alua tangkai pusako
Duduak jo barih jo balabeh
Tagak jo adaik jo pusako
Undang balukih pamenan nyo
Mamacik kato ka banaran

Salilih ba pantang sumbiang
Sapadi ba pantang luak
Walau bak bano dareh angin
Bogo bak mano ragam kato
Miki bak mano dabua ombak
Sampai mamacah ateh karang
Tatagak pucuak nan balingka
Basilang dahan kayu aro
Nan bana pantang di asak

Sungguah pun iyo nan sado itu
Mako sarapek nyo pulo lah
Sagalo dunsanak jo sudaro
Karik baik jo ipa bisan
Langkok jo ando manyumando
Bako baki jo pasumandan
Taruih ka urang ampek jinih

Duduak balega di nan rapek
Nan duo barih kaduduak an
Nan tigo langgam paseloan
Sahinggo paran picak malintang naiak
Bandua pipih malintang turun

Sabujua rumah nan panjang
Salega rumah nan gadang
Manyasak kapapan sariang
Tibo ka sandi alua adaik
Tinggi tabayang tampak nyato
Salam di sinan di tiboan

Salam sayo salam balirik
Indak tabilang jo ta atok
Ta pamuliakan salam
Hanyo lah nan pambilang pa atok
Pamulia kan salam
Sambah manyambah pado Allah
Ujuang salam di tiboan ka angku ...

Ado pun salam nan ka di tiboan

Mahadok kapado angku
Satinggi tinggi malantiang
Lah tibo di awang awang
Suruik nyo katanah juo
Sahabih cakah jo rantiang
Di kubak kulik jo batang
Tareh panguba nan tasuo

Tapijam kilek di muko
Tabayang tampak di ateh
Pado wakatu iko kini
Tagak badiri di tiang panjang
Tiang panjang si majo lelo
Dalam lingkaran nan dau

Di sinan adaik main andai
Di dalam koroang jo kampuang
Koroang kampuang barajo mamak
Rumah tango barajo ali
Nan jadi alek jamu si pangkalan
Iyo lah angku jo pangulu
Baiak pun 'alim jo ulama
Sarato sanak jo sudaro
Karik baik jo ipa bisan
Bako baki jo pasumandan
Langkok jo urang ampek jinih

Lakek pulo nan bak pitua
Kalau basiang di nan tumbuah
Jikok manimbang di nan ado
Tumbuah sarupo iko kini
Di hari sahari kini
Di malam samalam nangko
Alek lah naiak kateh rumah
Tagak nan alah tarajali
Duduak nan alah taraselo

Rancak susun nyo nan bak siriah
Elok lirik nyo bak pugaran
Nan tuo lai tapamulia

Nan mudo lai takasiahi

Ado pun adaik kito bapilin tigo
Jikok batenggang di nan rumik
Lauik budiman kiro kiro

Di tiliak kapado barih adaik
Lah sudah minum jo makan
Makan lah tibo di nan kanyang
Minum lah tibo di nan sajuak

Hanyo ba ato nyolai kini
Nan bak bidarai kato adaik
Lamo duduak panek kok tibo
Lamo tagak paniang kok datang

Sapakaik kami nan datang
Nan lareh makanan kaik
Nan tibo makanan panggia

Nan samo duduak sa amparan
Pado wakatu iko kini
Hujan taduah kabuik lah tarang
Lah tampak bintang ciek ciek

Antaro kito jo angku
Lah bak umpamo kayu gadang
Ba urek taguah ka bumi
Ba pucuak cewang ka langik
Babuah babungo labek
Lah kalareh buah nan masak
Nak izin jo rela dari tampuak

Rundiang sakitu dari sayo
Di harok bunyi nak kumbali
Lai koh dalam barih adaik
Pulang ma'alum pado angku

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku
Adaik ampek cupak nan duo
Jatuah ka alam tigo luak
Tigo limbago nan tajali
Gantiang putuih di tuan gadang
Salam jo sambah dari sayo
Rila jo maaf banyak banyak
Sambah jo simpuah manjalani
Jo bana angku sayo jalang

Rundiangan angku nan katangah
Nan tatabua di muko rapek
Di danga lah baiak bunyi
Di pandang lah rancak rupo
Kurang tak ado ka panukuak
Senteang tak ado ka pambilai
Tapi samantang pun baitu

Sapihak ka diri sayo
Dek duduak barih basusun
Limbago duduak tangah rapek
Bukik nan tinggi nak di daki
Lurah dalam nak di turuni
Alam nan leba nak ba pandang

Mancari bijo gak sabuah
Bijo di tanam musim kini
Jikok babuah jo babungo
Buah nak samo kito makan
Bungo nak samo di pasuntiang
Samantaro sayo basaho
Di elah kato jo mupakaik

Rundiang jo angku di latak an
Kato di simpan dalam barih

Pulang ma'alum pado angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Nan tuo luak tanah data
Nan bunsu luak limo puluhan
Luak agam luak nan tengah
Pusek jalo nyo ranah minang
Bintiak jo ragi kok batuka
Sayo susun jari nan sapuluah
Pado tuhan tangan tatadah
Jo bana angku Sayo jalang

Arati nyo nan jadi bana angku
Mahadok kapado sayo
Di bunyi nan sayo danga
Di rupo nan sayo pandang
Di hadapan baliau nan basamo

Bukik nan tinggi nak ba daki
Lurah dalam nak ba turuni
Alam nan leba nak ba pandang
Mancari gandang ka paningkah
Limbago talempoang ka panalun
Si paik mananti malah sayo
Bana baitu kato angku

..... Iyo bana

Sapanjang buah kabanaran angku
Lah dalam barih jo ba labeh
Di lingkuang adaik jo pusako
Bana nyo di bao lalu

Lalunyo di kaji nan sado itu
Jalan tarantang ka baturuik
Cupak tatagak ka baisi
Silang tak ado ka pa ampang
Patuik tak ado ka pa ungkai
Jalan rayo titian batu
Insya Allah, sayo nanti

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Di bunyi nan sayo danga
Di rupo nan sayo pandang
Kandak buliah pintak balaku
Manyanang di dalam hati
Suni di dalam kiro kiro
Insya Allah, sayo laluan

Jawek si alek 1 ka si pangka 1

Insya Allah sayo nanti.

*Ket : baiyo dulu **si pangka 1** jo **pangka 2** sasudah baiyo,
rundiang di kumbalian*

Rundiang baiyo

Dari si pangka 1 ka si pangka 2

Mano angku
Sayo angku.....
Ka angku rundiang ba tiboan
Laluan lah angku

Niniak moyang punyo pitua
Sampai kini jadi padoman
Jadi pakaian rang di minang
Adaik ba kato ba sitina
Rila jo maaf di puhun kan
Jo bana angku sayo jalang

Arati nyo bana nan ka sayo tiboan
Mahadok kapado angku
Lah datang rundiang dari si alek
Kapado kito silang nan bapangka
Jumlah karajo nan bajunjuang

Buah rundiang baliau nantun
Bisiak lah samo ka dangaran
Imbau lah samo ka lampauan
Di hadapan kito nan basamo

Manuruik kaji nan biaso
Nan kato mangandaki jawab
Nan gayuang mangandaki sambuik
Tapi samantang pun baitu

Di gayuang nan ka manyambuik
Di kato nan ka manjawab
Di ma ka tumbuah ibaraik bijo
Di ma ka tabik umpamo padi

Iko lah rundiang sayo tiboan
Mahadok kapado angku
Ba'a kabaik ka elok nyo

Pulang ma alum pado angku

Jawek si pangka 2 ka si pangka 1

Lah sampai di angku

Sakiro alah angku

Ka angku lai

Laluan lah angku

Di balah batuang tigo balah

Sumbiang baliuang tigo jari

Cancang lah tapek ba landasan

Di anjuang salam jo lidah

Barang nan gawa di ampuni

Ka angku rundiang ba tiboan

Nan jadi bana di angku

Mahadok kapado sayo

Lah tibo rundiang dari si alek

Kapado kito silang nan bapangka

Jumlah karajo nan bajunjuang

Buah rundiang baliu itu

Manuruik adaik nan bapakai

Nan kato mangandaki jawab

Kok gayuang mangandaki sambuik

Pado wakatu iko kini

Di kato nan ka manjawab

Tipak di gayuang kamanyambuik

Di ma ka tumbuhan ibaraik bijo

Di ma ka tabik umpamo padi

Pulang ma alum pado sayo

Bana baitu rundiang angku

..... iyo bana

Di bana angku nan katangah

Cucua ka bumi nampak nyato

Elang di timpo paneh garang

Tapi samantang pun baitu

Sa pihak ka diri sayo

Lamak siriah lega carano
Rancak kato di lega bunyi
Samantaro sayo balega
Rundiang jo angku di latak kan
Kato di simpan jo mufakaik
Lai koh dalam barih adaik
Nak babari di angku pitua nyo
Pulang ma alum pado angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Ujuik andai buah rundiangan
Bapalun paham nan haluih
Dalam lilitan aka budi
Salam indak bajawek tangan
Lahia jo batin jan ba diguih
Ka angku rundiang kumbali

Rundiang nan sayo kumbalian
Mahadok kapado angku
Sapihak ka diri angku
Lamak siriah lega carano
Rancak kato di lega bunyi
Samantaro angku balega
Rundiang jo sayo di latak kan
Kato di simpan jo mufakaik
Lai koh dalam barih adaik
Pulang ma alum pado sayo
Kan bana baitu rundiang angku

..... iyo bana

Di kabanaran angku nan katangah

Lah dalam barih jo balabeh
Di dalam cupak jo gantang
Bana nyo di bao lalu

Lalu nyo di kaji nan sado itu
Sa pihak ka diri angku
Lah jalan adaik ka bapakai
Silang tak ado ka pa ampang
Patuik tak ado ka pa ungkai
Insya Allah, sayo nanti

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Kato daulu ba sitina
Kamudian rundiang ba sicapek
Ba si capek sayo jo angku

Lalu nyo di kaji ba sicapek
Di bunyi nan sayo danga
Di rupo nan sayo pandang
Kandak buliah pintak balaku

Insya Allah, angku
Sayo caliak sampai ka muaro
Sayo japuik ka hulu nyo

Jawek si pangka 1 ka si pangka 2

Sayo nantian kabanaran angku

*Ket : musti nyo baiyo dulu **si pangka 2** jo **si pangka 3** dll
tapi contoh baiyo **si pangka 2** jo **si pangka 3** indak di buek
kito anggap salasai, mako rundiang di kumbalian*

Rundiang ba kumbalian

Dari si pangka 2 ka si pangka 1

Di timbang tujuan kato
Dalam sari'aik nan bapakai
Lah dalam bungka jo taraju
Dalam rundiang nampak mambayang
Hakikaik paham alah samo
Lahia jo batin tak batikai
Barilah maaf dek pangulu
Jo bana angku sayo jalang

Arati nyo bana nan sayo kumbalian
Mahadok kapado angku
Antaro sayo jo angku
Panek nan bakeh baranti
Patang nan bakeh ba malam
Tarago sayo duduak baiyo
Tagak bakato jo ba molah

Jikok di sayo lah tadi tu
Duduak kato ba pa iyo kan
Tagak kato ba pa molahan
Mancari bulek nan sagiliang
Mancari pipiah nan salayang

Dek yakin hati ka dapek
Pangana indak bacabang
Duduak kato ba pa iyo kan
Tagak kato ba pa molahan
Dapek lah bulek nan sagiliang
Basuo pipiah nan salayang
Bahimpun kato ka mupakaik

Manyuruikan sirih ka gagang
Mangumbalian pinang ka tampuak
Nak di angku tarabik nyo
Pulang ma alum pado angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Loroang di rundiang nan katangah
Badiri mungkin jo patuik
Sarantak paham jo bicaro
Lahia jo batin sa ukuran
Ka tuhan tangan tatadah
Barih balabeh sayo turuik
Jo maaf sayo bukak kato
Bana ka angku ba tiboan

Nan jadi bana dek angku tadi
Mahadok kapado sayo
Di ateh duduak nan sa amparan
Di tagak nan sapamatang

Antaro sayo jo angku
Panek nan bakeh baranti
Patang nan bakeh bamalam
Tarago angku duduak baiyo
Tagak bakato jo bamolah

Jikok di angku lah tadi tu
Duduak kato ba paiyokan
Tagak kato ba pamolahan
Bulek lah jantuang ka kalupak
Bahimpun kato ka mufakaik

Manyuruikan siriah ka gagang nyo
Mangumbalian pinang katampuak
Mamintak bunyi dari sayo
Bana baitu kato angku

..... Iyo bana

Di kabanaran angku nan katangah
Lah dalam barih jo balabeh
Di lingkuang adat jo pusako
Tapi samantang pun baitu

Nan jadi bana di sayo
Mahadok kapado angku
Kalauik ba jurumudi
Ka darek ba juru baso
Kalau barundiang jo nan pandai

Manyuruik kan siriah ka gagang
Mangumbalian pinang ka tampuak
Elok nak bunyi dari angku
Pulang ma alum pado angku

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Adaik jo syarak sajinjangan
Dek sakato mako batuah
Kok salisiah kusuik nagari
Rila jo maaf di unjuak kan
Pado tuhan tangan tatadah
Ka angku rundiang kumbali

Arati nyo nan jadi bana di angku ...
Mahadok kapado sayo
Nak balega siang jo malam
Nak baganti patang jo pagi

Manyuruik kan siriah ka gagang
Mangumbalian pinang ka tampuak
Elok nak bunyi dari sayo
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku
Mahadok kapado sayo
Lah dalam barih jo balabeh
Di lingkuang cupak jo gantang
Lah nyato adaik nan bapakai

Tapi samantang pun baitu
Nan jadi bana di sayo
Mahadok kapado angku
Aluran badan diri sayo

Lah sapantun jo gariang buto
Di hulu lukah rang tahan
Di baruah tikalak makan
Marapuang si rambang lakek
Mambanam tubo ta puok

Di tengah jariang babega
Jalo suto ma ideh sisiak
Agak sulik aka batenggang
Angku lah mambukak kapalo banda
Jo mufakat sayo samoi
Pulang ma alum pado angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Kalau mambilang dari aso
Jikok mangaji sampai sudah
Tuah di caliak ka nan manang
Kok sasek tujuan kato kato
Pado tuhan tangan tatadah
Jo bana angku sayo jalang

Arati nyo nan jadi bana di angku ...
Mahadok kapado sayo
Aluran rundiang dari angku
Nak nyato ba bunta adaik
Tantu di lipek jo limbago

Adaik nyo panggang ka babaliak
Nak tau masak matah nyo
Adaik nyo kato ka barulak
Nak tau asa mulo jadi
Nak tau rancak nyo bijo
Di samayan basahan baniah

Aluran gayuang ka manyambuik
Isi nyo kato ka manjawab
Rancak di sayo tarabik nyo
Jo mufakaik angku samoi
Pulang ma alum pado sayo
Bana baitu kato angku
..... Iyo bana

Arati nyo nan jadi bana di angku ...
Mahadok kapado sayo
Elok bak paneh sudah hujan
Rancak bak bulan ampek boleh
Tarang dek kito nan basamo

Antaro sayo jo angku
Kaba unyuik unyuik indak patuih
Ka bapilin pilin indak sariang
Indak lah banamo patuik

Tuah ka samo kito cari
Malu ka samo kito japuik
Ba'a nan kini nangko

Insya Allah, angku
Siriah di suruik kan ka gagang nyo
Pinang di kumbalian ka tampuak nyo

Tapi samantang pun baitu
Nan jadi bana di sayo
Mahadok kapado angku
Karano kaki ka talangkah
Nan tangan ka tajambo

Alam nan basifaik gawa
Manusia basifaik khilaf
Kok tasuo di kaji nan sado itu

Di pandang lauik lah kumaro
Alamaik kok hilang dalam hati
Padoman kok hilang pado mato
Kabua pandangan ba kuliliang
Pulang ma alum pado angku

Jawek si pangka 2 ka si pangka 1

Lah sampai di angku
Sakiro alah angku
Ka angku lai
Laluan lah angku

Rundiang nan tibo dari angku
Takilek bagai caramin
Tabayang umpamo paneh
Mangilek mangalimantang
Rundiang kalua kok nyo ragu
Barilah maaf lahia batin
Kok indak nan sayuik nan ta uleh
Jo bana angku sayo jalang

Di bunyi nan sayo danga
Di rupo nan sayo pandang
Sapihak ka diri angku
Karano kaki ka talangkah
Nan tangan lah ka tajambo

Alam nan basifat gawa
Manusia basifat khilaf

Bak biduak tengah lautan
Di pandang lauih lah kumaro

Alamaik kok hilang pado hati
Padoman kok hilang pado mato
Pandangan lah putiah ba kuliliang
Pulang ma alum pado sayo
Bana baitu kato angku

..... Iyo bana

Arati nyo nan jadi bana di angku ...
Mahadok kapado sayo
Lah dalam barih jo balabeh
Di kanduang adaik jo pusako

Karano baliu lai rapek duduak di siko
Indak ka bapabia tagamang angku do
Alah ka sanang hati angku

Jawek si pangka 1 ka si pangka 2

Lah sampai di angku
Sakiro alah angku
Ka angku lai
Laluan lah angku

Kato daulu basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Di bunyi nan sayo danga
Di rupo nan sayo pandang
Kok sasek lai ka basapo
Tadoroang lai ka basintak

Nan sayo tuntuik bakeh angku

Iyo lah rundiang nan sado itu
Ba'a nan kini nangko
Karano kandak alah buliah
Nan pintak alah balaku

Insya Allah, angku
Sayo suruik kan siriah ka gagang
Sayo kumbalian pinang katampuak
Basimak kan dek angku

Jawek si pangka 2 ka si pangka 1

Insya Allah
Baliau basamo manyimak kan

Rundiang dikumbalian :

Dari si pangka 1 ka si alek 1

Mano angku
Sayo angku
Ka angku ... rundiang di kumbalian
Laluan lah angku

Kato pitua bundo kanduang
Jadi pakaian rakyat banyak
Bapakai juo sampai kini
Dalam adat acok tabincang
Jo salam rundiang sayo anjuang
Rila jo maaf sayo pintak
Langkah kok panjang pado kaki
Jo bana angku sayo jalang

Arati nyo bana nan ka di kumbalian
Mahadok kapado angku
Sapihak rundiangan kito tadi
Putuih tak kunjuang tahujuang
Tingga tak kunjuang tajapuik

Ibaraik urang bacatua
Duduak di meja pacaturan
Doroang mandoroang langkah gajah
Amaik ma amaik buah catua
Gajah tadoroang kudo masuak
Rajo lah mati sandiri nyo

Bagaluik banang ka sikoci
Punta nan padek bak di simpai
Santuang nan indak lalu angin
Hukum takanak pado sayo
Sawajah gayuang manyambuik
Di kato nan kamanjawab
Di sayo juo ta tumpah nyo

Jokok di sayo lah tu kini
Karih tasisik pado pinggang
Padang tasanda pado bahu
Baban lah tibo di kapalo
Barek raso nyo ka bapikua
Ringan raso nyo ka bajinjiang

Tapi samantang pun baitu
Sabalun barek ba pikua
Antaro sayo jo angku
Bakaji malang jo mujua

Jikok di kaji kamujuran nyo
Bak biduak turun kalautan
Ombak tanang galombang sunyi
Karang tak ado manggajojo
Batang tak ado mambulintang
Salamaik parahu pulang baliak

Jikok di kaji kamalangan nyo
Bak biduak turun kalautan
Ombak kareh galombang gadang
Batang kok banyak mambulintang
Sansai parahu di lautan
Mungkin tak sampai ka labuahan

Iko lah bana nan sayo tiboan
Mahadok kapado angku

Talambek angku dek mananti
Kok panjang parundiangan angku ...
Singkek di sayo ka bari nyo
Pulang ma alum pado angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Aia mancuwa jo kayu tanam
Ujuang dek luak tanah data
Masuak ka ranah pasia jambak
Lapeh ka padang ujuang karang
Niniak mamak kunjuangan salam
Bintiak jo raga kok batuka
Barilah maaf banyak banyak
Jo bana angku sayo jalang

Arati nyo nan jadi bana di angku ...
Mahadok kapado sayo
Di bunyi nan sayo danga
Di rupo nan sayo pandang
Di hadapan baliau nan basamo

Nan gayuang alah ka basambuik
Kato nan alah ka bajawab
Tapi samntang pun baitu
Jikok di angku lah kini tu

Sabalun gayuang basambuik
Limbago kato bajawab
Antaro sayo jo angku
Bakaji malang jo mujua

Jikok di kaji kamujuran nyo
Bak biduak turun kalautan
Ombak tanang galombang sunyi
Karang tak ado manggajojo
Batang tak ado mambulintang
Salamaik parahu pulang baliak

Jikok di kaji kamalangan nyo
Bak biduak turun kalautan
Ombak kareh galombang gadang
Batang kok banyak mambulintang

Nyampang tasakek jo tasakam
Di kayuah ilia nyo tak lansuang
Di galah mudiak nyo tak namuah
Pado nyo karam di lautan
Talambek parahu ka labuahan

Kok talambek sayo dek mananti
Kok panjang parundiangan sayo
Singkek di angku ka bari nyo
Lai koh adaik nan baitu
Pulang ma alum pado sayo
Bana baitu rundiang angku
..... iyo bana

Di bana angku nan katangah
Lah dalam barih jo balabeh
Di lingkuang adaik jo pusako
Bana nyo di bao lalu

Lalu nyo di kaji nan sado itu
Antaro sayo jo angku
Kok talambek angku di jalan
Sayo bari suko jo rila

Tantangan panjang jo singkek
Singkek di ambiak ka ukuran
Panjang di ambiak ka balabeh
Samo di pakai kaduo nyo

Pulang ma alum pado angku

Jawek si pangka 1 ka si alek 1

Lah sampai di angku

Sakiro alah angku

Ka angku lai

Laluan lah angku

Daulu kato basitina

Dek azan wakatu cupua

Ulah Qamat wakatu habih

Elok lah rundiang basicapek

Basicapek sayo jo angku

Di bana angku nan katangah

Di bunyi nan sayo danga

Di rupo nan sayo pandang

Tantangan lamo jo lambek

Angku bari suko jo rila

Kok hanyo panjang jo singkek

Singkek di ambiak ka ukuran

Panjang di ambiak ka balabeh

Samo di pakai kaduo nyo

Kan bana baitu rundiang angku

..... iyo bana

Nan sayo tuntuik kahadapan angku

Iyo lah rundiang nan sado itu

Dek angku urang pamurah

Nan kandak capek babari

Pintak lai ba palakuan

Insya Allah, angku

Sayo ulangan bagulambek

Basimak kan dek angku

Jawek si alek 1 ka si pangka 1

Baliau basamo manyimak kan

Rundiang di kumbalian

Dari si pangka 1 ka si alek 1

Mano angku
Sayo angku
Ka angku ... rundiang di kumbalian
Laluan lah angku

Salam talayang di nan rapek
Bungka paliangan ka nareco
Adaik bamain dalam itu
Manuruik barih cupak gantang
Jo salam rundiang sayo angkek
Gawa jo kilaf kok basuo
Maaf kan sayo dek pangulu
Jo bana angku sayo jalang

Arati nyo nan jadi bana di sayo
Mahadok kapado angku
Sungguah pun angku... nan di tuntuik
Nan di sabuik nan di imbau gala
Batin dek adaik nan basamo
Pangana batin ka nan rapek
Ujuik nyo salam ka nan banyak

Iyo lah angku jo pangulu
Nan gadang basa batuah
Nan cadiak nan tau pandai
Cadiak lai buliah kabaguru

Pandai lai buliah kabatanyo
Tiang adaik sandi aluan
Pauyang panji marawa basa
Nyawa nagari adaik kato

Hulu aia himpunan buluah
Pusek jalo pumpunan ikan
Tali adaik batang limbago
Tampuak alua tangkai pusako
Duduak jo barih jo balabeh
Tagak jo adaik jo pusako
Undang balukih pamenan nyo

Mamacik kato kabanaran
Salilih bapantang sumbiang
Sapadi bapantang luak
Walau bak bano dareh angin
Bogo bak mano ragam kato
Tatagak pucuak nan balingka
Basilang dahan kayu aro
Nan bana pantang di asak

Sungguah pun iyo nan sado itu
Mako sarapek nyo pulo lah
Sagalo dunsanak jo sudaro
Karik baik jo ipa bisan
Langkok jo ando manyumando
Bako baki jo pasumandan
Taruih ka urang ampek jinih
Duduak balega di nan rapek
Nan duo barih kaduduak an
Nan tigo langgam paseloan
Sahinggo paran picak malintang naiak
Bandua pipih malintang turun

Sabujua rumah nan panjang
Salega rumah nan gadang
Manyasak kapapan sariang
Tibo ka sandi alua adaik
Salam di sinan di tiboan

Salam sayo salam balirik
Indak tabilang jo ta atok
Ta pamuliakan salam
Hanyo lah nan pambilang pa atok

Pamulia kan salam
Sambah manyambah pado Allah
Ujuang salam di tiboan pado angku ...

Ado pun salam nan ka di tiboan
Mahadok kapado angku
Satinggi tinggi malantiang
Lah tibo di awang awang
Suruik nyo katanah juo
Sahabih cakah jo rantiang
Di kubak kulik jo batang
Tareh panguba nan tasuo

Tapijam kilek di muko
Tabayang tampak di ateh
Pado wakatu iko kini
Tagak badiri di tiang panjang
Tiang panjang si majo lelo
Dalam lingkaran nan dauku

Di sinan adaik main andai
Di dalam koroang jo kampuang
Koroang kampuang barajo mamak
Rumah tango barajo ali

Nan jadi alek jamu si pangkalan
Iyo lah angku jo pangulu
Baiak pun 'alim jo ulama
Sarato sanak jo sudaro
Karik baik jo ipa bisan
Bako baki jo pasumandan
Langkok jo urang ampek jinih

Lakek pulo nan bak pitua
Kalau basiang di nan tumbuhan
Jikok manimbang di nan ado
Tumbuhan sarupo iko kini

Di hari sahari kini
Di malam samalam nangko

Alek lah naiak kateh rumah
Tagak nan alah tarajali
Duduak nan alah taraselo

Rancak susun nyo nan bak siriah
Elok lirik nyo bak pugaran
Nan tuo lai tapamulia
Nan mudo lai takasiahi

Ado pun adaik kito bapilin tigo
Jikok batenggang di nan rumik
Di talisiak jo aka budi
Lauik budiman kiro kiro

Di tiliak kapado barih adaik
Lah sudah minum jo makan
Makan lah tibo di nan kanyang
Minum lah tibo di nan sajuak

Hanyo ba ato lah tu kini
Nan bak bidarai kato adaik
Lamo duduak panek kok tibo
Lamo tagak paniang kok datang

Sapakaik kami nan datang
Nan lareh makanan kaik
Nan tibo makanan panggia

Nan samo duduak sa amparan
Pado wakatu iko kini
Hujan taduah kabuik lah tarang
Lah tampak bintang ciek ciek

Antaro kito jo angku
Lah bak umpamo buruang bondo
Salayok sabondoang tabang
Babunta bunta jo kabuik
Bagaluik galuik jo awan

Pueh maninggi lah marandah
Litak tibo hauih lah datang
Inggok di padang ribu ribu
Sambia mamakan buah rumpuik
Maminum ambun nan satitiak

Sadang ma asah asah paruah
Takana pinang nan sabatang
Cinto pikiran nak babaliak
Sarang lah lamo batinggakan

Kilek jo bayang kito pakai
Pulang ma alum pado sayo
Bana baitu rundiang angku

..... iyo bana

Di bana angku nan katangah
Jikok di sayo lah tadi tu
Sakiro jajak baru nan batikam
Hanyo batang baru nan batitih
Nan kandak alun babari
Nan pintak alun ba palakuan

Hanyo ba ato nyo lai kini
Di kandak nan ka mambari
Di pintak nan ka mampalakuan
Gantiang putuih biang nak tabuak
Sayo sangkuik kan ka nan tinggi
Sayo sandakan ka nan gadang

Lai koh adaik nan baitu
Nyato pusako nan bak kian
Nak babari dek angku pitua nyo
Pulang ma alum pado angku

Jawek si alek 1 ka si pangka 1

Lah sampai di angku

Sakiro alah angku

Ka angku lai
Laluan lah angku

Jikok nyo lareh koto pili
Lareh nyo balanggam tujuh
Baitu pitua ranah minang
Kok salah toloang pelok i
Sayo susun jari nan sapuluah
Jo bana angku Sayo jalang

Nan jadi bana di angku
Mahadok kapado sayo
Di bunyi nan sayo danga
Di rupo nan sayo pandang
Di hadapan baliau nan basamo

Jikok di angku lah tadi tu
Sakiro jajak baru nan batikam
Sakiro batang baru nan batitih
Nan kandak alun babari

Hanyo ba ato nyolai kini
Di kandak nan ka mambari
Di pintak nan ka mampalakuan
Angku sandakan bana ka batang nyo
Basanguik kan ka nan tinggi
Mananti sayo barito nyo
Ka bana baitu rundiang angku

..... iyo bana

Di kabanaran angku nan katangah
Lah dalam barih jo balabeh
Di lingkuang adaik jo limbago
Bana nyo di bao lalu

Lalu nyo di kaji nan sado itu
Balayia nak sampai ka pulau
Manyalam nak sampai ka kasiak
Batenggang angku pado adaik

Saba mananti malah sayo
Pulang ma alum pado angku

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Dek azan wakatu cupua
Ulah kamat wakatu habih
Eloklah rundiang basicapek
Basicapek sayo jo angku

Lalu nyo di kaji ba sicapek
Di bunyi nan sayo danga
Di rupo nan sayo pandang
Di hadapan baliau nan basamo
Batenggang sayo pado adaik
Angku pakai sipaik mananti
Kan bana baitu rundiang angku

..... iyo bana

Di bana angku nan katangah
Nan sayo tuntuik kadapan angku
Iyo lah rundiang nan asdo itu
Ba ato nyo lai kini
Dek kandak buliah pintak balaku

Insya Allah, angku
Pai nak sayo aduan
Pulang nak sayo tanyoan
Mananti angku sakutiko

Jawek si alek 1 ka si pangka 1

Insya Allah, sayo nanti

Jawek si pangka 1 ka si alek 1

Insya Allah, sayo laluan

Ket : baiyo dari **si pangka 1** ka **si pangka 4** atau ka urang sumando/pangulu

Dari si pangka 1 ka si pangka 4

Mano angku

Sayo angku

Ka angku ... rundiang di kumbalian

Laluan lah angku

Alua patuik jalan batampuah

Suri banang tuladaan kain

Cupak panuah pusako tatap

Manuruik barih cupak gantang

Gantang tatap sukatan panuah

Bungka sapadi tak bamain

Rila jo ma'af sayo mintak

Jo bana angku sayo jalang

Arati nyo nan jadi bana di sayo

Mahadok kapado angku

Rundiangan anbo jo si alek kito

Sakiro jajak baru nan batikam

Sakiro batang baru nan batitih

Nan kandak alun babari

Pintak alun ba palakuan

Ba'ato nyo lai kini

Di kandak nan ka mambari

Di pintak nan ka mampalakuan

Di ma ka tumbuah ibaraik bijo

Di ma ka tabik ibaraik padi

Ba'a ka baiak ka elok nyo

Iko lah bana nan sayo tiboan

Mahadok kapado angku
Pulang ma alum pado angku

Jawek si pangka 4 ka si pangka 1

Lah sampai di angku
Sakiro alah angku
Ka angku lai
Laluan lah angku

Nan sulik hanyuik ka hulu
Kalau bacupak di nan data
Baitu warih cupak gantang
Bari maaf sayo dek pangulu
Kato kok indak di nan bana
Jo bana angku sayo jalang

Arati nyo nan jadi bana di angku
Mahadok kapado sayo
Pado sabanta iko tadi
Rundiangan angku jo si alek

Sakiro jajak baru nan batikam
Hanyo batang baru nan batitih
Nan kandak alun babari
Nan pintak alun bapalakuan

Pado wakatu kini nangko
Di kandak nan ka mambari
Di pintak nan mam palakuan
Ba'a ka baiak ka elok nyo
Pulang ma alum pado sayo
Bana baitu rundiang angku

..... iyo bana

Di kabanaran angku nan katangah
Lah dalam barih jo balabeh
Di kanduang adaik jo limbago
Elok bak paneh sudah hujan

Tarang dek kito nan basamo
Bana nyo di bao lalu

Lalu nyo di kaji nan sado itu
Sapihak ka diri sayo
Ketek nan lai ba pangasuah
Gadang nan lai ba parintang

Samantaro sayo basuaho
Mancari ketek ka pangasuah
Rundiang jo angku di latak kan
Kato di simpan jo mufakaik
Pulang ma alum pado angku

Iawek si pangka 1 ka si pangka 4

Lah sampai di angku
Sakiro alah angku
Ka angku lai
Laluan lah angku

Di tiliak takadin kato
Di timbang nareco adaik
Takilek cupak jo gantang
Rila jo maaf dari sayo
Nyampang kurang rukun jo saraik
Jo bana angku sayo jalang

Nan jadi bana dek angku tadi
Mahadok kapado sayo
Kalau di tareh di talisiak
Jikok di indang di paberai

Di ambiak ka ujuik paham
Alah nyato titian budi
Tarang di batin ka arifan
Nan sulik bamain budi
Rusuah di khilaf kok nyo tibo

Urang tuo sabuah hukum

Pangulu tantu sa andiko
Ulama jaleh sa kitab
Nak nyo satariak sajinjiang

Samantaro angku balega
Rundiang jo sayo di latak kan
Kato di simpan dalam adaik
Mananti sayo samantaro
Kan bana baitu rundiang angku

..... iyo bana

Di bana angku nan katangah
Lah nyato adaik nan bapakai
Silang tak ado ka pa ampang
Patuik tak ado ka pa ungkai
Jalan rayo titian batu
Saba mananti malah sayo

Jawek si pangka 4 ka si pangka 1

Lah sampai di angku
Sakiro alah angku
Ka angku lai
Laluan lah angku

Kato daulu basitina
Kamudian rundiang basicapek
Ba sicapek sayo jo angku

Kalaluan nyo ba sicapek
Di hadapan baliu nan basamo
Kandak buliah, pintak balaku

insya Allah, angku
Sayo rantang bagai kan tali
Mananti angku

Jawek si pangka 1 ka si pangka 4

Insya Allah, sayo nanti

*Ket : musti nyo baiyo dulu **si pangka 4** jo **si pangka 5** dll
tapi contoh baiyo indak kito buek, di anggap salasai*

Rundiang di kumbalian :

Dari si pangka 4 ka si pangka 1

Mano angku
Sayo angku
Ka angku rundiang dikumbalian
Laluan lah angku

Di timbang tujuan kato
Dalam sari'aik nan bapakai
Di lingkuang bungka jo taraju
Dalam rundiang nampak mambayang
Hakikaik paham alah samo
Lahia jo batin tak batikai
Barilah maaf dek pangulu
Jo bana angku sayo jalang

Aratinyo bana nan ka sayo pulangan
Mahadok kapado angku
Antaro sayo jo angku
Panek nan bakeh baranti
Patang nan bakeh ba malam
Tarago sayo duduak baiyo
Tagak bakato jo ba molah

Jikok di sayo lah tadi tu
Duduak kato ba paiyokan
Tagak kato ba pamolahan
Dapek lah bulek nan sagiliang
Ba himpun rundiang ka mufakaik
Bulek lah jantuang ka kalupak

Antaro sayo jo angku
Sarantak indak ka balain dagam
Alah sa unjuak sabarian

Di gayuang nan ka manyambuik
Di pintak nan ka mampalakuan
Di angku tarabik nyo
Jo mufakaik sayo samoi
Pulang ma alum pado angku

Iawek si pangka 1 ka si pangka 4

Lah sampai di angku
Sakiro alah angku
Ka angku lai
Laluan lah angku

Jalan nan pasa kito tampuah
Indak manyimpang ka nan lain
Manuruik barih cupak gantang
Sayo susun jari nan sapuluah
Nak samo sunyi lahia batin
Jo bana angku sayo jalang

Nan jadi bana di angku tadi
Di bunyi nan sayo danga
Di rupo nan sayo pandang
Antaro sayo jo angku
Panek nan bakeh baranti
Patang nan bakeh ba malam

Tarago angku duduak baiyo
Tagak bakato jo ba molah
Jikok di angku lah tadi tu
Duduak kato ba pa iyokan
Tagak kato ba pamolahan

Dapek lah bulek nan sagiliang
Ba himpun kato ka mufakaik
Antaro sayo jo angku

Sarantak indak ka balain dagam
Lai sa unjuak sabarian

Di gayuang nan ka manyambuik
Di kato nan ka manjawab
Di sayo juo tarabik nyo
Jo mufakaik angku samoi
Kan bana baitu rundiang angku

..... iyo bana

Di bana angku nan katangah
Antaro sayo jo angku
Ka batulak batundo tundo
Indak lah banamo patuik
Patuik nyo kandak di bari
Nan pintak di palakuan

Insya Allah, angku
Kandak si alek sayo bari
Nan pintak di palakuan

Tapi alam nan basifaik gawa
Manusia basifaik khilaf
Kok kurang mintak di tukuak
Kok senteang mintak di bilai
Pulang ma alum pado angku

Jawek si pangka 4 ka si pangka 1

Lah sampai di angku
Sakiro alah angku
Ka angku lai
Laluan lah angku

Kato daulu ba sitina
Kamudian rundiang ba sicapek
Ba sicapek sayo jo angku

Kalaluan nyo ba sicapek
Di bunyi nan sayo danga
Di rupo nan sayo pandang
Kok sasek lai ka basapo
Tadoroang lai ka basintak

Insya Allah, angku
Sayo kumbalian ka asa nyo
Ba simak kan di angku

Jawek si pangka 1 ka si pangka 4

Insya Allah, angku
Di simak kan baliau basamo

Rundiang ba kumbalian

Dari si pangka 1 ka si alek 1

Mano angku
Sayo angku
Ka angku rundiang dikumbalian
Laluan lah angku

Jikok pakaian bundo kanduang
Ka padoman luak nan tigo
Makin di kakeh makin kabua
Lah di sapuah mako manggulang
Adaik salam lah sayo anjuang
Kok salah indak di sangajo
Maaf kan kato kok talanjua
Jo bana angku sayo jalang

Arati nyo bana nan sayo kumbalian
Mahadok kapado angku
Sapihak parundiangan kito tadi
Panek nan bakeh baranti
Patang nan bakeh ba malam
Tarago sayo duduak baiyo
Tagak bakato jo ba molah

Manyanguik kan ka nan tinggi
Manyanda kan ka nan gadang

Jikok di sayo lah tadi tu
Alah basanguik kan ka nan tinggi
Ba sandakan ka nan gadang

Dapek lah bulek nan sagiliang
Bahimpun kato ka mufakaik
Nan jadi bana di angku tadi
Nan ka jadi jawek nyo di sayo
Mahadok kapado angku

Kabuik pai gunuang ka tingga
Manangih lurah ka panasas
Rusuah jo hibo ka bacarai
Pulang ma alum pado angku

Jawek si alek 1 ka si pangka 1

Lah sampai di angku
Sakiro alah angku
Ka angku lai
Laluan lah angku

Kok di tiliak padoman alua
Tabayang mungkin jo patuik
Nareco kato lah di timbang
Kok untuang rundiang jan basaua
Kok kalu lidah dek manyabuik
Jo bana angku sayo jalang

Aratinyo nan jadi bana di angku
Mahadok kapado sayo
Antaro sayo jo angku
Di bunyi nan sayo danga
Di rupo nan sayo pandang
Di hadapan baliau nan basamo

Kabuik pai gunuang ka tingga
Manangih lurah kapanasan
Rusuah manggamang dalam hati
Pulang ma'alum pado sayo
Bana baitu kato angku

..... Iyo bana

Hanyo baitu lah tu kini
Nan jadi bana di sayo
Mahadok kapado angku

Alua patuik jalan batampuah
Suri banang tuladan kain
Cupak panuah pusako tatap

Tapi samantang pun baitu
Antaro sayo jo angku
Lah bak umpamo rang manjaik
Di guntieng kain salai baju
Lalu di bao kajahitan

Banang lakek roda babeleang
Mahantak pinjaik turun naiak
Basaua banang ka si kuci
Baju sudah banang bak putuih

Ukuran sasuai pado badan
Alah pueh mato dek mamandang
Alah pasai badan dek mamakai
Kini lah patuik di tangga i
Pulang ma alum pado angku

Jawek si pangka 1 ka si alek 1

Lah sampai di angku

Sakiro alah angku

Ka angku lai

Laluan lah angku

Bintiak jo ragi jan batuka
Basamo kito mamaham kan
Jadi pusako ranah minang
Adaik ba kato ba sitina
Rila jo maaf di puhun kan
Jo bana angku sayo jalang

Aratinyo nan jadi bana di angku
Mahadok kapado sayo
Nan bak umpamo bumi jo langik
Nan tak pueh patang jo pagi
Siang malam ba katantangan

Bakandak sagalo isi alam
Langik nan tinggi kok lai randah
Alam nan leba kok lai kucuik
Di sinan kandak galik buliah
Sinan sangkutan galik sakah
Pintak di siko balaku nyo
Pulang ma'alum pado sayo
Bana baitu kato angku

..... Iyo bana

Di kabanaran angku nan katangah
Lah dalam barih jo balabeh
Di lingkuang adaik jo pusako
Bana nyo di bao lalu
Lalu nyo di kaji nan sado itu
Antaro sayo jo angku

Di hulu nan sa bula'an
Di hilia nan sa muaro
Di ateh atok lah bagisia
Di bawah bandua lah badiguih
Di halaman nan salalu
Tando nyo urang lah bakarik

Tuah ka samo kito cari
Malu ka samo kito japuik

Ka bahunyuik hunyuik indak putuih
Ka bapilin pilin indak sariang
Antaro sayo jo angku
Indak lah banamo patuik
Patuik nyo kandak di bari
Nan pintak di palakuan

Tapi sabalun kandak di bari
Nan jadi bana di sayo
Mahadok kapado angku
Pihak di duduak angku

Duduak kok indak samparono
Patuik di tengah kok di tapi
Patuik di tapi kok ka tengah
Ipa bisan kok taparampiangan
Kok indak talatak di tampek nyo

Lampisan di baliak itu
Tantangan makan jo minum
Makan indak tibo di nan kanyang
Minum indak tibo di nan sajuak
Nak babari kami suko jo rila
Pulang ma'alum pado angku

Jawek si alek 1 ka si apngka 1

Lah sampai di angku
Sakiro alah angku
Ka angku lai
Laluan lah angku

Ka ilia saranguah dayuang
Kamudiak sa antak galah
Kato pitua nan tajali
Sayo angkek tangan di anjuang
Pado tuhan tangan tatadah
Ka angku rundiang kumbali

Di bunyi nan sayo danga
Di rupo nan sayo pandang
Di hadapan baliiau nan basamo
Kandak alah ka babari
Pintak alah ka bapalakuan

Tapi sabalun kandak di bari
Sabalun pintak bapalakuan
Tantangan duduak kami
Patuik di tapi kok katangah
Patuik di tangah kok katapi
Ipa bisan taparampuangan

Lampisan di baliak itu
Tantangan makan jo minum
Adaik makan kok kurang kanyang
Minum ndak tibo di nan sajuak
Nak babari kami suko jo rila
Bana baitu kato angku

..... Iyo bana

Di kabanaran angku nan katangah
Lah dalam barih jo balabeh
Di kanduang adaik jo limbago
Haluih nak balantai kulik
Licin nak balantai papan
Tapi samantang pun baitu

Sapihak ka diri sayo
Kok kato surang di bulati
Kato basamo di paiyoan
Duduak balega di nan rapek
Kasuok dapek malengoang
Ka kida buliah mancaliak

Di cari bulek nan sagiliang
Isi nyo pipiah nan salayang
Antaro sayo jo angku

Di elah kato jo mapakaik

Rundiang di latak dalam barih
Mananti angku samantaro
Pulang ma'alum pado angku

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku
Daulu kato basitina
Kamudian rundiang basicapek
Dek nan sunaik wajib kok tingga
Jan hilang galuak dek manimbo
Basicapek sayo jo angku

Di bunyi nan sayo danga
Di rupo nan sayo pandang
Sapihak ka diri angku
Nak ba ambiak duduak baiyo
Rundiang jo sayo dilatak an
Kato di simpan jo mupakaik
Kan baitu bana kato angku

..... Iyo bana

Insyah Allah
Jalan tarantang kabaturuik
Cupak tatagak ka ba isi
Sayo nanti kabanaran angku

Jawek si alek 1 ka si pangka 1

Insyah Allah, angku
Kandak bulaih pintak balaku
Sayo rantang bagai kan tali
Sayo serak kan bak manjalo

*Ket : Musti nyo baiyo si alek 1 jo si alek nan lain, buliah
indak jo pakolahan baraso duduk kito si alek juo
makan jo minum apokoh lai samparono*

Rundiang di kumbalian :

Mano angku
Sayo angku
Ka angku rundiang dikumbalian
Laluan lah angku

Lubuak nan tigo alah tantu
Bahagian lareh caniago
Ganggaman parpatiah nan sabatang
Rundiang kok ado ba nan ragu
Rila jo maaf dari sayo
Jo bana angku sayo jalang
Sapihak parundiangan kito tadi
Nan talatak nan tasimpan
Tasimpan dalam mupakaik
Tarago sayo pai mananyoan
Jikok pulang mangadukan

Lah dapek bulek sagiliang
Lah buliah picak nan salayang
Di kandak angku tadi
Tantangan duduak baliau
Lai salamaik samparono
Nyampang ado labiah jo kurang
Baliau nan basamo mambari ma'af

Tantangan makan jo minum
Alah talatak bana di tampek nyo
Indak ado cacek binaso nyo
Antah kok puji nan ka labiah

Tapi nan jadi bana di sayo
Mahadok kapado angku
Tapuak alang nyato babaleh

Tampuak siriah jaleh bajawek
Tantangan di kami nan datang

Kok salah duduak jo salah tagak
Salah kato jo salah galak
Nan tuo kok indak tapamulia
Nan mudo kok indak takasiahi

Jan badariak tonggak rumah gadang
Mangganggu pasangan rasuak
Tagajai sambuangan paran
Ka karam suduik nan ampek
Ulah dek laku jo buatan
Kurenah lah tampak hari

Kok tasuo nan sado itu
Nak babari pulo kami suko jo rila
Pulang ma'alum pado angku

Jawek si pangka 1 ka si alek 1

Lah sampai di angku
Sakiro alah angku
Ka angku lai
Laluan lah angku

Daulu kato basitina
Kamudian rundiang basicapek
Dek nan sunaik wajib kok tingga
Jan hilang galuak dek manimbo
Basicapek sayo jo angku

Di kabanaran angku tadi
Sayo piliah rimah nan taserak
Di semba paco panguntiangan
Tantangan parundiangan kito tadi
Angku mamintak suko jo rila
Ulak gamponyo dari kami
Kan bana baitu kato angku

..... Iyo bana

Di kabanaran angku nan katangah
Bak minyak jatuhka rambuik
Bak ukia jatuh ka papan
Ya Allah sanang nyo hati

Jokok di kami lah tu kini
Alun bakilek lah bakalam
Bulan disangkok tigo puluh
Alun diliyek lah tapaham
Lah tantu tampek bakeh tumbuhan
Lah dauu kami bari ma'af
Alah kasanang hati angku

Jawek si alek 1 ka si pangka 1

Saketek nyolai angku
Dek kandak alah samo buliah
Pintak lah samo balaku
Jo assalamu'alaikum .w.w.
Kami urak selo lai angku

Jawek si pangka 1 ka si alek 1

Wa'alaiikumsalam wr.wb.
Kami lapeh angku nan basamo
Jo hati nan amaik suci
Jo muko nan amaik janiah.

Bareh Kuniang

Assalamu'alaikum w.w.

Baranti sabanta di halaman
Mandeh manyonsoang ka surambi
Walau indak bajawek tangan
Sambuik salam jo hati suci

Assalamu'alaikum w.w.

Kato pitua bundokanduang
Jatuh ka alam tigo luak
Pusako minang nan usali
Jo salam rundiang di anjuang
Rila jo ma'af banyak banyak
Salam jo simpuah pamanuahi

Sungguah pun iyo marapulai
Jo romboangan nan kami tuntuik
Samego tumpuan puntiang
Sariaik adaik nan bapakai
Naza kapado nan basamo

Niniak mamak kunjuangan salam
Karik baik samo di cinto
Sarato tuo jo pangiriang
Langkok jo andan pasumandan

Ipa bisan baitu juo
Nan mudo arih budiman
Bundo kanduang samo di dalam
Dalam saruan sayo juo
Salam di sinan di tiboan
Ado pun salam nan ka sayo tiboan
Salam talayang tantang alua
Rundiang tatabua di nan rapek
Adaik limbago ba pancalang
Niaik jo naza ba labuahan

Tiok suatu kan bapangka
Tapi samantang pun baitu

Alua jo patuik nak jan tingga
Lelo jo tampan nak tabao
Angkatan sambah pado Allah
Salam jo ma'af ka pangulu
Sarato pangiriang nan basamo
Puji jo syukur pado tuhan
Salawaik jo salam untuak nabi

Sikoci sugiro agiah banang
Tantu salasai jalan turak
Sinan banamo kain sudah
Tarang limbago kito buek
Asah sakato manyudahan

Di hari sahari kini
Antah hari kolah nan baiak
Mungkin kutiko lah nan elok
Sadang balayia bungo kambang
Ajuang bajalan di musim nyo
Marapulai datang babondoang
Kami basamo manantian

Nan niaik di hati kami
Samisa buruang jo rantiang
Dek balam niaik lah lamo
Mancinto rantiang bakeh inggok
Untuak mangisai ngisai bulu

Dek rantiang niaik jo naza
Kok dapek balam tigo gayo
Inggok di rantiang pangka dahan
Tampek ma asah asah paruah
Pueh manggayo jo bagutu
Kini basuo labuahan nyo

Sajuak sanang di dalam hati
Lipua sagalo batang tubuah

Kapado romboangan marapulai
Baranti sabanta di halaman

Ilia kureta pukua tujuh
Si suman tukang kuricih nyo
Usah tagak manjauah jauh
Bak cando urang kurang suko

Kanari di dalam parak
Nunang di baruah pandakian
Kamarilah marapulai tagak
Nak samo sanang paratian

Kamuniang di ateh bukit
Patah sadahan bakulaian
Kuniang bareh karano kunik
Panyerak marapulai di halaman

Kami manyerak bareh kuniang
Baitu adaik nan biaso
Tunangan ulu lah kamuniang
Ka sanang hati ibu bapo
Adaik nan lamo di pakai kan
Kami manyonsoang hinggo janjang
Adokoh nan ilaik pado badan
Mangko anak talambek datang

Si upiak si sarianti
Babaju kudarang hijau
Lah panek kami dek mananti
Lah pasa jalan dek maninjau

Lambek tibo ka kami japuik
Nasi harian dek lah dingin
Kami lah ganta ganta takuik
Kok bakisa rupo nyo angin

Di tapi tumbuhan cumateh
Rabah nyo katapi jalan
Usah di cari bakeh lapeh

Kami nan taguah jo janjian

Alah rami urang ka balai
Batungkek batang kamuniang
Pangka bapaluik jo suaso
Alah mah datang marapulai
Sarato tuo nyo jo pangiriang
Suok kida ba anak mudo

Silasih dahan nyo patah
Patah nyo timpo batimpo
Lah buliah kandak dari Allah
Anak surang jadi baduo

Diancang cancang satako
Katuko di dalam padi
Surang adaik surang pusako
Bak bulan jo matohari

Duo baleh cupak usali
Nan tatap kato pusako
Bak bulan jo matohari
Lah samo mancayo kaduo nyo

Anyuik tampuruang dari ulu
Barisi anak maco aji
Untuang lah ado sajak dulu
Kini lah baru batapati

Kain salendang dari judah
Pusako niniak nan da ulu
Sampai kini tasabuik juo
Kaganti suri jo tuladan
Tigo bulan di kanduang ayah
Sabalun ka rahim ibu
Janji jo anak alah juo
Kini lah baru basampaian

Lah masak rambai nan manih
Sabuah indak ba nan mudo

Surang rancak nan surang manih
Anak mandeh kaduo nyo

Baringin di lereang ladang
Urek manjelo masuak aia
Rantiang enggeran buruang nuri
Di dahan balam tigo gayo
Nak kanduang nan joloang datang
Awuih lah dapek mintak aia
Litak lah dapek mintak nasi
Anak lah jadi rang disiko
Limbago jalan batampuah
Pitua urang cadiak pandai
Sampai kini baitu juo
Oi nak kanduang pacik pitaruah
Sipaik cimburu jan di pakai
Supayo jan rusak rumah tango

Kok buliah suto Pitalah
Nan bak katari lah andak nyo
Di bao nak rang bungo tanjuang
Hanyuik kasiak badarai darai
Kok buliah pintak pado Allah
Bak matohari lah andak nyo
Lah patang mangko tacampuang
Lah mati mangko bacarai

Tabik lah bintang kaciak kaciak
Tabik manyese awan judah
Kalau di bilang cantiak mantiak
Malakik malam tak ka sudah

Rang padang ma ani banang
Di punta mangko di lipek
Di lipek lalu di patigo
Kalau di rantang namuah panjang
Elok di punta nak nyo singkek
Di ambiak sakiro nan paguno

Cubadak tengah hilaman

Di juluak jo ampu kaki
Kanai lah anak urang lalu
Dek jatuah manimpo dahan
Usah lamo tagak di laman
Itu cibuaq basuah lah kaki
Anak karumah lah da ulu
Kami lah banyak manantian

Lah patah rantiang anjalai
Patah nyo timpo batimpo
Rumpun sariak tabao rabah
Manyo mandeh marapulai
Japuik lah anak kanduang kito
Baolah naiak kateh rumah

Tingkek lah janjang nan barani
Pijak lah tango nan batuah
Langkahi bandua nan kiramaik
Titih lah kain jajakan

Kato tak ado kabalah nyo
Dek mandeh toloang lah bimbiang
Anta kabawah palaminan
Nak sanang hati ibu bapo
Anak oi duduak lah basandiang
Di apik andan pasumandan

Itu nyo sambah dari kami
Sambah manyerak bareh kuniang
Labiah kurang di bari ma'af
Assalamu'alaikum.....

Panyambahan Maanta Tando

Ket : panyambahan ma anta tando iko, ado sabagian nagari nan mamakai, kutiko sabalun nyo paretoangan alah sudah arati nyo pinangan alah di tarimo, tapi indak balansuangan sakali jo mambari tando, mako babuek pulo hari khusus untuak ma anta tando, nan rancak nyo mulai juo jo panyambahan siriah singkek, sudah itu di sambuang jo mangatangahan tando

Panyambahan ma anta tando

Mano angku
Sayo angku
Ka angku rundiang ba tiboan
Laluan lah angku

Salam talayang tantang alua
Tiok suatu kan bapangka
Niaik jo naza balabuahan
Adat limbago bapancalang
Rundiang kok ado nan basaua
Lahia jo batin kok batuka
Rila jo maaf di puhun kan
Jo bana angku sayo jalang

Arati nyo bana nan ka sayo tiboan
Mahadok kapado angku
Di ateh duduak nan sa amparan
Di tagak nan sa pematang

Nan bak patitih kato adaik
Pitua cupak jo gantang
Manyiang tampek nan tumbuah
Manimbang tampek nan ado
Tumbuah sarupo iko kini

Aluran badan diri kami
Adaik jauh alah baturuik
Adaik ampia alah bajalang
Sajak salangkah dari rumah
Mulai katurun dari janjang

Jalan nan pasa kami turuik
Labuah nan goloang kami tampuah
Satibo kami di hilaman
Naiak katanggo rumah nangko
Satibo di ateh rumah
Panek alah baparantian
Palak alah baparanginan

Di caliak kapado barih adaik
Alah sudah minum jo makan
Makan lah tibo di nan kanyang
Minum lah tibo di nan sajuak
Lampisan di baliak itu
Lah batimbang baso jo basi
Kan alah samo kito caliak
Siriah sahalai lah bacabiak
Rokok sabatang lah di isok

Ujuik nyo siriah nan katangah
Kami suruhan niniak mamak
Di lapeh angku jo pangulu
Sarato mandeh jo bapak
Mambao kato jo buatan
Isi nyo ma anta tando
Sarato manakuak hari

Malenggang babuah tangan
Adaik limbago kami bao
Tak guno di urai bana
Banamo ragam bungo adaik
Nan taunjuak kahadapan angku
Dek angku mintak di tarimo

Sakitu rundiang nan katangah
Kok ado labiah jo kurang
Aluran barih nak bapaek
Tibo di takuak nak batabang
Nak samo tibo di tampek nyo
Di harap bunyi nak kumbali
Ma alum pulang pado angku

Bareh Kuniang Anak Daro

Assalamualaikum w.w.

Jawek lah salam alek datang
Lai koh ba urang dateh rumah
Dari jauh kami lah datang
Usah bak cando basilengah

Kulari indak kulari sajo
Kulari datang dari padang
Indak kami kamari sajo
Gadang mungkasuik nan di jalang

Jawab dari pangka :

Waalaiikum salam warahmatullah
Panjawek salam alek tibo
Pasai manjanguah dari rumah
Ba'a dek kakak lambek tibo
Indak do kami basilengah
Rusuah mananti kakak juo

Tarakuik tabang ka rimbo
Inggok di kayu nan sabatang
Nan kami tuntuik nan alah tibo
Nan kami cinto nan alah datang

Tumbuhan si cerek di pematang
Enggeran anak buruang nuri
Ba'a mangko talambek datang
Kami lah cameh dek mananti

Jaek dari alek :

Tumbuhan ci cerek di pematang
Karakok manjulai ka mingkudu
Mangko kami talambek datang
Jalan bakelok bakeh lalu

Lai parimbo rang di siko
Lai paruntun aka kacang
Lai pa ibo rang di siko
Lai panyantun di anak dagang

Jawek dari pangka :

Ramilah pasa Padang Panjang
Rami dek anak Kurai Taji
Pintu tabukak lapiak takambang
Kami lah sadio dek mananti

Hari tarang angin barambuih
Hujan nan labek nanlah taduah
Komah lah ado jalan nan luruih
Nan babelok juo kakak tampuah

Datang baiak lah pasumandan
Rimbun rimbun batuo tuo
Ambiak api baka kumayan
Minantu baru joloang tibo

Kok lapuak lapuak baganti
Nan ratak ratak di simpai
Nan tirih di pati juo
Kok buliah bak kandak hati
Bak umpamo tangguak jo bingkai
Maragang labu melah kito

Jawek dari alek :

Sapanjang panyambahan dari kakak
Itu lah kato sabananyo
Bogo kamalah ka di asak
Batin mancinto kakak juo

Cubadak tengah hilaman
Urek manjulai dalam sawah
Dek tatagun kami di halaman

Di sangko kakak tak di rumah

Jaweh dari pangka :

Salam datang salam kumbali
Adaik nan lamo di pakai kan
Nak tampak putih nyo hati
Kami nan taguah jo janji

Cubadak tengah hilaman
Di juluak jo ampu kaki
Usah lamo tagak di halaman
Itu cibuaq basuah lah kaki

Jawek dari alek :

Rami lah pasa kurai taji
Kadai an tumpak batumpak
Usah kami mambasuah kaki
Kami bajalan ba aleh tapak

Jawek dari pangka :

Cubadak tengah hilaman
Urek nyo tindiah batindiah
Usah lamo tagak di halaman
Marilah naiak makan siriah

Putiah kapeh nak samo nyato
Putiah hati baka ada an
Di rumah kito bacarito
Lapiak lah sudah di bantangan

Jawek dari alek :

Kalau baitu bunyi kato
Lah sajuak di dalam hati
Sayo tingkek janjang batanggo
Assalamu'alaikum panyudahi

Panyambahan Manjanguak Di Babarapo Nagari

Ket : panyambahan manjanguak atau takziah bahaso nan banyak di pakai maso kini, panyambahan iko hanyo nan lazim untuak babarapo nagari sajo, kutiko kito datang manjanguak ka rumah urang nan sadang kamalangan, untuak mintak izin ma urak selo, mako di pakai lah panyambahan nan sarupo iko, mungkin ado contoh nan lain pado sabagian nagari, bukan panyambahan nan iko satu saru nyo

Panyambahan manjanguak di babarapo Nagari

Mano angku
Sayo angku
Ka angku rundiang ba tiboan
Laluan lah angku

Sa ujuik salam jo simpuah
Sabarek bungka nan piawai
Nareco luruih main daun
Di dalam sidang karapatan
Sayo susun jari nan sapuluah
Nyampang tak tapek buah andai
Ka tuhan sayo mintak ampun
Rundiang ka angku batiboan
Arati nyo rundiang nan ka sayo tiboan
Mahadok kapado angku
Nan bak pitua dalam adaik
Kalau basiang di nan tumbuah
Jikok manimbang di nan ado
Tumbuah sarupo iko kini

Sapihak ka diri kami
Lah ba pakai nan bak pitua
Adaik rusuah tunai manunai
Tagamang jawek bajawek

Adaik sakik samo di silau
Kamatian samo manjanguak

Pado wakatu iko kini
Salah surang dunsanak kito
Di bunyi nan kami danga
Tantangan

Lah bapulang karahatullah
Innalillahi wa inna ilaihi rajiun

Di ateh andak alai nyo
Hiduik juo lah baliau nagko
Agak sahari duo hari
Mungkin sapakan duo pakan
Walau babulan jo ba musim

Apolah sabab dek baitu
Karano nan pi'il dek baliau
Kapai tampek bata nyo
Ka pulang bakeh ba barito
Indak dapek sakandak padi
Kandak tanah mako nyo tumbuhan
Indak dapek bak kandak hati
Kandak Allah nan kayo sungguah

Ba'a kok di diri kami
Walau pun kami nan basamo
Datang indak makanan panggia
Lareh indak makanan kaik
Sajak satapak turun tanggo
Mulo salangkah dari rumah
Lah datang kami kamari
Mancaliak kan muko nan janiah
Jo hati nan amaik suci

Ba'a jikok di angku lah kini tu
Iyo lah silang nan bapangka
Jumlah karajo nan bajunjuang
Walau mato panuah dek aia
Bogo arang panuah dek kasiak

Kok datang kami alah bananti
Lah bacaliak kan muko nan janiah
Jo hati nan amaik suci
Di caliak kapado barih adaik
Lah batimbang baso jo basi
Lah katangah siriah jo pinang

Ba ato nyo lai kini
Sapihak kami nan datang
Lamo tagak paniang kok datang
Lamo duduak panek kok tibo

Antaro kami jo angku
Lah bak kayu di tengah padang
Nan ba urek taguah ka bumi
Nan ba pucuk cewang ka langik
Babuah ba bungo labek
Lah kalareh buah nan masak
Izin jo rela dari tampuak

Sakitu sajo parundiangan
Di harok bunyi mak kumbali
Pulang ma alum pado angku

Pangka Balabeh

Panarimo jo pamulai parundiangan

Sungguah pun iyo angku surang
Nan di tuntui nan basabuik gala
Batin dek adat nan basamo
Pangana batin ka nan rapek
Ujuik nyo salam ka nan banyak
Nyato tawalak ka ukuran
Tabayang barih jo balabeh
Iyo bak andai kato bida
Takana curiang nan dauu
Di andai pusako lamo
Kalau basiang dinan tumbuhan
Jikok manimbang di nan ado
Tumbuhan sarupo iko kini.

Kok hanyo rundiang nan ka tangah
Di agak di dalam hati
Di timbang dalam itihat
Sapatat hati jo jantuang
Sakato budi jo aka
Budi manumpu ka ilmu
Paham babisiak dalam batin
Rila jo maaf sayo mintak
Jo bana angku sayo jalang

Kok di agak tujuan kato
Nyato taraju tak bapaliang
Dalam sari'aik nan bapakai
Bana nareco bayang adaik
Manuruik barih cupak gantang
Cupak lah tarang samato
Ibaraik bulek tak basandiang
Simpai nan taguah tak berulak
Limbago nan sayuik kito bilai

Dalam sari'aik jo hakikaik
Jo bana angku sayo jalang

Katangah salam ta kambang
Kapado sagalo tuan rumah
Walau indak bajawek tangan
Salam balirik kasado nyo
Rundiang kok ado ba nan sumbang
Pado tuhan tangan tatadah
Sayo nak mintak di maaf kan
Ka angku bana tatumpah nyo

Pihak di rundiang nan mandatang
Takilek bagai caramin
Mambayang umpamo paneh
Lah nyato kanduangan buek
Bantuak talago balatak kan
Batang lah tampak tasanda nyo
Rila jo maaf di pabanyak
Jo bana juo angku sayo jalang

Badariak tonggak rumah gadang
Mananti pinang nan sa didih
Antah kumbali antah indak
Dek lambek rago di jalan
Rundiang kok ado banan sumbang
Kok talipua sayo di barih
Barilah maaf banyak banyak
Rundiang ka angku di pulangan

Jikok nyo rundiang nan mandatang
Takilek bagai caramin
Mambayang umpamo paneh
Lah nyato kanduangan buek
Bantuak talago balatak kan
Batang lah tampak tasanda nyo
Rila jo maaf di pabanyak
Jo bana juo angku sayo jalang

Di timbang tujuan kato
Dalam sari'aik nan bapakai
Lah dalam bungka jo taraju
Pado rundiang nampak mambayang
Hakikaik paha alah samo
Lahia jo batin tak batikai
Barilah maaf dek pangulu
Jo bana angku sayo jalang

Loroang di rundiang nan katangah
Badiri mungkin jo patuik
Sarantak paham jo bicaro
Lahia jo batin sa ukuran
Ka tuhan tangan tatadah
Barih balabeh sayo turuik
Jo maaf sayo bukak kato
Bana ka angku batiboan

Rundiang nan tibo dari angku
Takilek bagai caramin
Tabayang umpamo paneh
Mangilek mangalimantang
Rundiang kalua kok nyo ragu
Barilah maaf lahia batin
Kok indak nan sayuik nan ta uleh
Jo bana angku sayo jalang

Aia mancuwa jo kayu tanam
Ujuang dek luak tanah data
Masuak ka ranah pasia jambak
Lapeh ka padang ujuang karang
Niniak mamak kunjuangan salam
Bintiak jo ragi kok batuka
Barilah maaf banyak banyak
Jo bana angku sayo jalang

Kato pitua bundo kanduang
Jadi pakaian rakyat banyak
Bapakai juo sampai kini
Dalam adat acok tabincang
Jo salam rundiang sayo anjuang
Rila jo maaf sayo pintak
Langkah kok panjang pado kaki
Jo bana angku sayo jalang

Alua patuik jalan batampuah
Suri banang tuladaan kain
Cupak panuah pusako tatap
Manuruik barih cupak gantang
Gantang tatap sukatan panuah
Bungka sapadi tak bamain
Rila jo ma'af sayo mintak
Jo bana angku sayo jalang

Salam talayang di nan rapek
Bungka paliangan di nareco
Adaik bamain dalam itu
Manuruik barih cupak gantang
Jo salam rundiang sayo angkek
Gawa jo kilaf kok basuo
Maafkan sayo dek pangulu
Jo bana angku sayo jalang

Batutua manuju bana
Mufakaik duduak barapak
Tando baradat di nagari
Jadi padoman ranah minang
Dahulu kato basitina
Rila jo maaf sayo mintak
Elok lah kato di simpani
Jo bana angku sayo jalang

Kito sa ujuik sa pangana
Adat berundiang dalam rapek

Tando baradat di nagari
Mancari mufakaik dalam sidang
Dahulu kato basitina
Kamudian rundiang basicapek
Rila jo maaf pamanuahi
Jo bana angku sayo jalang

Nan tabincang dek bundo kanduang
Ka padoman luak nan tigo
Makin di gali makin kabua
Tiok di sapuah nyo manggulang
Warih salam lah sayo anjuang
Kok salah indak di sangajo
Maaf kan kato nan talanjua
Jo bana angku sayo jalang

Di timbang tujuan kato
Dalam sari'aik nan bapakai
Lah dalam bungka jo taraju
Dalam rundiang nampak mambayang
Hakikaik paham alah samo
Lahia jo batin tak batikai
Barilah maaf dek pangulu
Jo bana angku sayo jalang

Loroang di rundiang nan lah tibo
Takilek bagai caramin
Mambayang umpamo paneh
Kanduangan buek lah mambayang
Batang lah tampak tasanda nyo
Nak samo suci lahia batin
Rila jo maaf di pakameh
Jo bana angku sayo jalang

Adaik ampek asa nyo ampek
Pituah dari tigo luak
Lapeh karantau katigo nyo
Pusako kito ranah minang

Jo salam rundiang sayo angkek
Rila jo maaf sayo mintak
Gawa jo kilaf kok tasuo
Jo bana angku sayo jalang

Adaik kato mahadang bana
Kamudian rundiang basicapek
Ulah kamat wakatu habih
Hari nan elok jan tabuang
Bintiak jo ragi jan batuka
Jo maaf rundiang sayo angkek
Indak sayo malipua barih
Jo bana angku sayo jalang

Pitalah jo bungo tanjuang
Ka tigo jo gunuang rajo
Anak koto dari batipuah
Kabasaran nyo tuan gadang
Salam jo rundiang sayo anjuang
Khilaf kilapaik kok basuo
Sayo susun jari nan sapuluah
Jo bana angku sayo jalang

Minangkabau punyo pitua
Jadi pakaian niniak jo mamak
Tando baradat di nagari
Dalam adat sabatang panjang
Dahulu kato basitina
Rila jo maaf sayo mintak
Elok lah kato di simpani
Jo bana angku sayo jalang

Di bukik si ulang ali
Di pintu balai nan gadang
Aua sarumpun di ateh nyo
Aua kiramat banamoan
Langkah kok panjang pado kaki
Rundiang ko ado bana nan sumbang

Rila jo maaf dari sayo
Bana ka angku sayo tiboan

Aia nan mahantam turun
Pulai nan bapangkek naiak
Manningakan rueh jo buku
Jadi pusako ranah minang
Jari sapuluah sayo susun
Rundiang nan raib kok tabatiak
Mamintak maaf ka pangulu
Jo bana angku sayo jalang

Adaik ampek cupak nan duo
Jatuah ka alam tigo luak
Tigo limbago nan tajali
Gantiang putuih di tuan gadang
Salam jo sambah dari sayo
Rila jo maaf banyak banyak
Sambah jo simpuah manjalani
Jo bana angku sayo jalang

Salam talayang tantang alua
Tiok suatu kan bapangka
Niaik jo naza balabuahan
Adat limbago bapancalang
Rundiang kok ado nan basaua
Lahia jo batin kok batuka
Rila jo maaf di puhun kan
Jo bana angku sayo jalang

Tantangan sambah jo manyambah
Kok kurang taratik jo mujilih
Kok kurang lelo jo sopan
Dek cameh sumangek hilang
Sambah manyambah kapado Allah
Kok talipua sayo di barih
Maaf ka angku di puhunkan
Jo bana angku sayo jalang

Pikia nan palito hati
Nanang nan baribu aka
Aniang itu hulu bicaro
Sampi kini jadi padoman
Langkah kok panjang pado kaki
Bintiak jo ragi kok batuka
Barilah maaf badan sayo
Ka angku bana batiboan

Batipuah nagari gadang
Sapuluah anak koto nyo
Bapaga kubu bakuliliang
Tuan gadang duduak di sinan
Rundiang kok ado banan sumbang
Barilah maaf basan sayo
Dalam bulek jan tampak sandiang
Ka rundiang bana batiboan

Sa ujuik salam jo simpuah
Sabarek bungka nan piawai
Nareco luruih main daun
Di dalam sidang karapatan
Sayo susun jari nan sapuluah
Nyampang tak tapek buah andai
Ka tuhan sayo mintak ampun
Rundiang ka angku batiboan

Nan tuo luak tanah data
Nan bunsu luak limo puluah
Luak agam luak nan tengah
Jadi pusako ranah minang
Bintiak jo ragi kok batuka
Sayo susun jari nan sapuluah
Pado tuhan tangan tatadah
Jo bana angku Sayo jalang

Warih nan dari bundo kanduang
Nyato pakaian tigo luak
Lukisan adat nan usali
Pusako dari niniak moyang
Jo salam rundiang sayo anjuang
Rila jo maaf sayo pintak
Langkah kok panjang pado kaki
Jo bana angku sayo jalang

Pihak di rundiang nan katangah
Takilek bagai caramin
Mambayang umpamo paneh
Dari timua datang nyo cewang
Ka tuhan tangan tatadah
Nak samo suci lahia batin
Kok untuang di gunjai nan tauleh
Jo bana angku sayo jalang

Cupak panuah gantang balanjuang
Jatuah ka alam tigo luak
Warih dek niniak nan dahulu
Tiok takuak makanan tabang
Jo salam sambah sayo anjuang
Rila jo maaf sayo mintak
Rundiang kok ado banan ragu
Jo bana sayo jalang

Jikok pakaian bundo kanduang
Ka padoman luak nan tigo
Makin di kakeh makin kabua
Lah di sapuah mako manggulang
Adaik salam lah sayo anjuang
Kok salah indak di sangajo
Maaf kan kato kok talanjua
Jo bana angku sayo jalang

Di pikia tujuan kato
Niaik jo naza balabuahan

Rundiang sabuah sayo gamak
Lamo di bungkuh kok nyo usang
Gawa jo kilaf kok basuo
Nyampang tasabuik di nan bukan
Rila jo maaf sayo mintak
Jo bana angku sayo jalang

Daulu kato basitina
Dek azan wakatu cupua
Ulah Qamat wakatu habih
Elok lah rundiang basicapek
Basicapek sayo jo angku

Daulu kato basitina
Kamudian rundiang ba sicapek
Dek nan sunaik wajib kok tingga
Jan hilang galuak dek manimbo
Maaf di mintak banyak banyak
Ba sicapek sayo jo angku

Ujuik andai buah rundiangan
Bapalun paham nan haluih
Dalam lilitan aka budi
Salam indak bajawek tangan
Lahia jo batin jan ba diguih
Ka angku rundiang kumbali

Tasabuik tanjuang nan ampek
Lubuak nan tigo alah tantu
Ganggaman parpatiah nan sabatang
Jo salam tangan sayo angkek
Rila jo maaf ka pangulu
Jo bana angku sayo jalang

Jalan nan pasa kito tampuah
Suri banang tuladan kain
Manuruik barih cupak gantang

Sayo susun jari nan sapuluah
Nak samo sunyi lahia batin
Jo bana angku sayo jalang

Ka ilia saranguah dayuang
Kamudiak sa antak galah
Kato pitua nan tajali
Sayo angkek tangan di anjuang
Pado tuhan tangan tatadah
Ka angku rundiang kumbali

Lubuaik nan tigo alah tantu
Bahagian lareh caniago
Ganggaman parpatiah nan sabatang
Rundiang kok ado ba nan ragu
Rila jo maaf dari sayo
Jo bana angku sayo jalang

Nan titian biaso lapuak
Janji kok mungkia padanan nyo
Tantu talalai manyubarang
Agak batanang angku duduak
Gawa jo khilaf kok basuo
Jo bana angku sayo jalang

Adaik mancupak lah di papek
Nan sapadi bapantang luak
Baitu adaik ranah minang
Jo salam tangan sayo angkek
Rila jo maaf sayo mintak
Jo bana angku sayo jalang

Kain palakaik unduang unduang
Salendang sutan ka kualo
Basah di timpo hujan pagi
Jo salam rundiang sayo anjuang
Gawa jo khilaf kok basuo
Ka angku rundiang kumbali

Kok hanyo rundiang nan mandatang
Nan talimpah di muko rapek
Nan tatumpah ka diri sayo
Rundiang kok ado ba nan sumbang
Rila jo maaf di patapek
Ka angku rundiang kumbali nyo

Bintiak jo ragi jan batuka
Basamo kito mamaham kan
Jadi pusako ranah minang
Adat ba kato ba sitina
Rila jo maaf di puhun kan
Jo bana angku sayo jalang

Salam nan tibo bakeh sayo
Takilek barih jo balabeh
Kiro nyo alua bapatutan
Gawa jo khilaf kok basuo
Maaf di rundiang kok tak kameh
Maaf ka angku di tiboan

Kok di tiliak padoman alua
Tabayang mungkin jo patuik
Nareco kato lah di timbang
Kok untuang rundiang jan basaua
Kok kalu lidah dek manyabuik
Jo bana angku sayo jalang

Barakik rakik ka hulu
Baranang ranang ka tapi
Samo di ambiak ka padoman
Rundiang kok ado ba nan ragu
Bari maaf manyusun jari
Bana ka angku ba tiboan

Nan senjang makanan papek
Nan sayuik samo di uleh

Nan senteang makanan bilai
Jo maaf rundiang sayo ankek
Tutua sayo kok tak tabateh
Jo maaf rundiang di pasampai

Nampak basuriah bak sipasin
Jajak bak bakiak alah nyato
Dalam aia guriah mangasan
Nak suci lahia jo batin
Barilah maaf badan sayo
Ka angku rundiang batiboan

Sikilang jo aia bangih
Pasisia banda sapuluah
Itu lah rantau banamoan
Mamaek kok indak tantang barih
Sayo susun jari nan sapuluah
Bana ka angku ba tiboan

Nan salilik gunuang marapi
Saedaran gunuang pasaman
Barih balabeh ranah minang
Langkah kok panjang pado kaki
Rila jo maaf di puhun kan
Jo bana angku sayo jalang

Adaik limbago hutang tumbuah
Dalam undang tasabuik juo
Ameh samato tahan uji
Sayo susun jari nan sapuluah
Gawa jo khilaf kok basuo
Ka angku rundiang kumbali

Kamudiak balai kamuniang
Kabaruah ka subang anak
Balimo suku di sinan
Rundiang sayo kok tampak sandiang
Rila jo maaf sayo mintak

Ka angku rundiang ba tiboan

Sungai jambu jo lubuak atan
Camin taruih di koto pili
Dalam tambo acok tasabuik
Jambo kok panjang pado tangan
Salam jo simpuah pamanuahi
Jo bana angku sayo runuik

Ikua koto kapalo koto
Baitu juo di sabuik kan
Masuak ganggaman tuan gadang
Di atok langik jo bicaro
Bumi nan indak katirisan
Jo bana angku sayo jalang

Salam ta'azim dari sayo
Randah nan di anjuang tinggi
Ketek nan di amba gadang
Dek alah mupakaik dauhu nyo
Rila jo ma'af pamanuahi
Jo bana angku sayo jalang

Assalamu'alaikum dari muluik
Warahmatullah panyudahi
Tando nyo kito sa andiko
Rundiang kok salah dek manyabuik
Maaf jo rila pamanuahi
Ka angku rundiang tatumpah nyo

Patitih pamenan andai
Gurindam pamenan kato
Waruh parpatiah nan sabatang
Bintiak jo raga kok batikai
Rila jo maaf dari sayo
Jo bana angku sayo jalang

Di kana tujuan rundiang
Di hadapan niniak jo mamak
Urang sa adaik sapusako
Dalam bulek kok nampak sandiang
Barilah maaf banyak banyak
Ka angku bana kumbali nyo

Adaik jo syarak sajinjiangan
Dek sakato mako batuah
Kok salisiah kusuik nagari
Rila jo maaf di unjuak kan
Pado tuhan tangan tatadah
Ka angku rundiang kumbali

Di tiliak takadin kato
Di timbang nareco adaik
Takilek cupak jo gantang
Rila jo maaf dari sayo
Nyampang kurang rukun jo saraik
Jo bana angku sayo jalang

Cucua ka bumi tampak nyato
Mamutiah bungo kambang api
Elok di singa paneh patang
Nyampang sukatan kok nyo ampo
Salam jo simpuah pamanuahi
Jo bana angku sayo jalang

Nan sulik hanyuik ka hulu
Kalau bacupak di nan data
Baitu warih cupak gantang
Bari maaf sayo dek pangulu
Kato kok indak di nan bana
Jo bana angku sayo jalang

Kalau mambilang dari aso
Jikok mangaji sampai sudah
Tuah di caliak ka nan manang

Kok sasek tujuang kato kato
Pado tuhan tangan tatadah
Jo bana angku sayo jalang

Jikok nyo lareh koto pili
Lareh nyo balanggam tujuang
Baitu pitua ranah minang
Kok salah toloang pelok i
Sayo susun jari nan sapuluah
Jo bana angku Sayo jalang

Di balah batuang tigo balah
Sumbiang baliuang tigo jari
Cancang tak tapek ba andasan
Di anjuang salam jo lidah
Barang nan gawa di ampuni
Ka angku, rundiang ba tiboan

Niniak moyang punyo pitua
Sampai kini jadi padoman
Jadi pakaian rang di minang
Adat ba kato ba sitina
Rila jo maaf di puhun kan
Jo bana angku, sayo jalang

Badarak tonggak rumah gadang
Mangganggu pasangan rasuak
Tagajai sambuangan paran
Luruih kok indak bak di banang
Kok salah pintu tampek masuak
Maaf ka angku di unjuak kan

Nampak basuriah bak sipasin
Jajak bak bakiak alah nyato
Dalah aia gurih mangasan
Nak suci lahia jo batin
Barilah maaf badan sayo
Ka angku rundiang batiboan

Jikok mambilang di nan sampai
Datang gayuang takanak sambuik
Tibo kato ba diri jawab
Hanyo ba ato nyolai kini
Di ateh duduak nan sa amparan
Di tagak nan sadidih bandua
Di ganjua suruik bak batanam
Di anjak anjak bak manuga
Bukik nan tinggi nak di daki
Lurah dalam nak di turuni

Nan jadi bana di angku
Rimbun bak bungo kacubuang
Rampak bak bungo kalikih
Bak ukia jatuh ka papan
Bak dawaik lakek ka karateh
Bagai mangkuto tanduak ameh
Tapi samantang pun baitu
Antaro sayo jo angku
Aia naiak roda baputa
Tumpia tumpia ma injek alu
Lah luluah jamua di lasuang
Di indang di tampi tareh
Lah basisiah bareh jo atah
Bareh caruah ka di bao pulang
Dadak ka tingga jo malukuik
Rusuah jo gamang ka bacarai
Pulang ma alum pado angku

Asah padoman di samokan
Asah kamudi di batuakan
Kok indak tajajak tanah tapi
Bukan kudaraik dari kito
Hanyo kuaso dari tuhan
Kini baitu lah di angku
Tabang mambubuang katitiran
Manyese tabang punai tanah

Nan lia nak tabang jauhah
Nan jinak cakau daulu

Hanyo ba ato nyo lai kini
Sabalun gayuang di sambuik
Isi nyo kato ka di jawab
Parahu ka turun ka lautan
Langkok ja sauah jo pandayuang
Cukuik kamudi jo padoman
Agak jo agiah kok batuka
Padoman batin kok tagelek
Angan lanteh ma'rifat lancuang
Takruang sampan di lautan
Mintak di japuik jo si koci
Putuiah suto uleh kulindan
Iko lah bana pado angku

Tantangan sambah jo manyambah
Kok kurang taratik jo mujilih
Kok kurang lelo jo sopan
Sambah manyambah pado Allah
Rila jo maaf sayo mintak
Jo bana angku sayo jalang

TESTIMONI

Musra Dahrizal Katik Jo Mangkuto, yang sering saya sebut sebagai “Ensiklopedia Minangkabau berjalan,” menghadirkan karya penting yang merekam ragam panyambahan dalam adat dan budaya Minangkabau secara sistematis, teliti, dan lengkap. Buku ini memuat tuturan panyambahan yang menjadi bagian penting dalam tata upacara adat dan struktur sosial masyarakat, memperlihatkan bagaimana bahasa adat berfungsi dalam menjaga ketertiban, penghormatan, dan hubungan sosial yang harmonis. Keutuhan penyajiannya menjadikan buku ini sebagai referensi tepercaya bagi peneliti, mahasiswa, maupun pegiat budaya yang ingin memahami praktik tutur adat Minangkabau dalam konteks kebudayaan yang hidup.

Lebih dari sekadar panduan teknis, buku ini menjadi sumber rujukan yang menampilkan nilai, etika, dan struktur sosial yang terpelihara dalam setiap prosesi adat Minangkabau. Panyambahan bukan hanya seremoni, tetapi juga ekspresi nilai kolektif masyarakat yang terikat pada prinsip musyawarah, mufakat, dan penghargaan terhadap peran-peran sosial dalam komunitas. Melalui karya ini, Musra Dahrizal Katik Jo Mangkuto telah berkontribusi penting dalam merawat memori budaya Minangkabau dan menyediakan dasar yang kuat bagi revitalisasi adat dalam kehidupan sosial kontemporer.

Prof. Pramono, Ph.D.,

Guru Besar Kajian Manuskrip Universitas Andalas

Saya menyambut gembira terbitnya buku *Ragam Panyambahan Adat Budaya Minangkabau*. Saya sungguh menghargai upaya penulis yang telah merampungkan buku ini. Sebab buku ini memiliki fungsi penting dalam menjaga adat dan tradisi Minangkabau. Selain menyampaikan maksud dan tujuan, alua pasambahan juga mengajarkan nilai-nilai kerendahan hati, penghormatan, dan kebersamaan dalam masyarakat.

Selama Minangkabau masih ada, selama masih lahir generasi-generasi penerus di Minangkabau saya menaruh harapan agar tradisi, adat serta budaya selalu dilestarikan. Semoga buku ini dapat menjadi salah satu sumber inspirasi bagi siapa pun yang membacanya terutama masyarakat Minang di manapun berada.

H. Rony Mulyadi, SE, Dt. Bungsu.

Sebagai seorang penghulu dan Datuk dalam nagari koto gadang Agam saya sangat salut sekaligus hormat dengan Mak Katik. Dengan usianya yang tidak muda lagi masih memperlihatkan eksistensi beliau dalam menjaga dan melestarikan kebudayaan Minangkabau khususnya dalam hal panyambahan. Beliau memperkenalkan Minangkabau tidak hanya ke pelosok-pelosok nagari yang ada di Sumatera Barat, namun lebih dari itu beliau berhasil mengenalkan Minangkabau hingga ke manca negara.

H. Andi Akmad Dara., S.E. M.AP. Dt. Tjumano.

Anggota DPR RI tiga periode dari tahun 2014 hingga 2029 dari partai Golkar.

Menjadi anggota BKSAP DPR RI sejak 2018 hingga 2024

Anggota Dewan pembina partai Golkar

Wakil ketua BPP KKS (Kerukunan Keluarga Sulawesi Selatan 2025-2030)

TENTANG PENULIS



Musra Dahrizal Katik Rajo Mangkuto, yang akrab disapa **Mak Katik** (lahir 18 Agustus 1940) adalah seorang budayawan, seniman, dan pengajar. Ia dikenal sebagai pemertah budaya dan Adat Minangkabau.

Pernah menjadi dosen tamu untuk University of Hawaii, Manoa, Amerika Serikat, dan Akademi Seni Warisan Budaya Kebangsaan Malaysia. Di Universitas Andalas, Padang Sumatera Barat mengajar mata kuliah Ethnologi Minangkabau dan Falsafah Adat Minangkabau.

Mak Katik adalah putra Batipuah, Tanah Datar, Sumatera Barat, dan merupakan anak kedua dari delapan bersaudara. Pada tahun 1963. Semenjak tahun 1959, Mak Katik sudah belajar adat istiadat Minangkabau secara lengkap pada tiga orang guru yang kebetulan sekampung dengannya, yaitu Rangkai Tuah Kabun, Mak Elek Jaka, dan Datuak Tongga. Setiap malam, ia menulis pelajaran berupa naskah dalam bentuk paragraf per paragraf pada kertas rokok.

Mak Katik mempelajari seluruh aspek adat istiadat dan budaya Minangkabau dari ketiga guru tersebut, seperti membuat pantun, naskah randai, (kesenian dalam bentuk perpaduan sandiwara dan gerak tari yang berasal dari pencak silat), bermain saluang (alat musik tiup), menguasai Silat Minangkabau, hingga memainkan talampong (alat musik pukul). Mak Katik terus menimba ilmu hingga ketiga gurunya meninggal dunia pada tahun 1980-an.

Tahun 2005 mengajarkan Randai di University of Hawaii, Manoa, Amerika Serikat.

